




BIBLIOTHECA  
UNIV. JAGELL.  
CRACOVENSIS

176469

Mag. St. Dr.

G

pro S. p. X. Kam. Spisic



176469

1

2 Libris Laureis pro Lat. pro  
Hugayka

13

X

X

X

Ximund

X

X

X

X

X

De octaria

Anno 1734



Stolych A. Z. Selygami S.  
dobry Monety socht dudkami  
Stolych, Siostafow Z. Siostaf  
Seden, worozfu drelchorozu.  
w Miynen iaf Mowi Nad Michalskim

Joannes Madyski.



BREVIARIUM.  
ASCETICO-POLITICUM.

*Hoc est:*

LV. Breves Meditationes,  
& Spirituales Lectiones.

STATUI  
POLITICO  
CHRISTIANO.

*Sive*

Personis Sæcularibus  
Christianæ pietati addictis.

*a*

JOSEPHO Libero Barone ab Eidtner,  
C. E. W. C.

Oblatæ & Dedicatæ.

CUM LICENTIA ORDINARII.

---

*Wratislavia,*

Typis CASPARI RUDOLPHI MÜLLER,  
Elect: & Episc: Typ: Aulici.  
M DCC XXI.

*Ex libris Francisci Josephi Katosinski.*

*Vade populus meus, intra  
in cubicula tua, claude  
ostia tua super te, abscon-  
dere modicum ad mo-  
mentum. Isaia 26. v. 20.*

*Hæc meditare, in his esto:  
ut profectus tuus manife-  
stus sit omnibus. 1 Tim. 4.  
v. 15.*



*Benevolo Lectori.*

**Q**Uamvis homo Sæcularis, eum virtutis gradum conscendere non teneatur, ad quem Sacerdos, vel Religiosus obligatur; certum tamen est: *quemlibet hominem*, si beatitudinem consequi velit æternam, *conformiter ad statum vocationis suæ, virtutes sectando, & vitia fugiendo, DEO servire debere.* Omnes enim homines, Peregrini, & viatores sunt, in Patriam cœlestem tendere nati. E quibus: tametsi sæculares, magis difficili, lubrica, & prærupta incedentes via, ad æqualem cum Religiosis profectum adstringi non possint; progredi tamen & ipsi debent: si præfixum peregrinationis terminum attingere velint. Si enim: *nemo mittens manum suam ad aratrum, & respi-*



*ciens retrò, aptus est Regno D E I. Lucae*  
*9. v. 62. minùs certè eidem consequen-*  
*do aptus erit, qui non modò respicien-*  
*do progredi cunctatur; sed insuper*  
*nunquam procendo, cœlo appropinqua-*  
*re dedignatur: aut retrogradè incedendo,*  
*lubens ab eo elongatur. Unde per-*  
*spicuum fit: errare, & quidem valde*  
*periculosè errare, omnes illos Domi-*  
*nos Sæculares, qui, hoc ipso, quòd (ut*  
*suprà dicitur) eum virtutis gradum at-*  
*tingere non teneantur, ad quem, ratione*  
*sublimioris vocationis suæ, Religiosi obli-*  
*gantur; quodlibet pietatis exercitium:*  
*de Mundo in Claustra, velut in quod-*  
*dam exilium, relegant: & id ad se nul-*  
*lo modò pertinere putant. Quasi: aut*  
*virtutem illam, ad quam nihilominus in*  
*statu suo tenentur (& quæ, tametsi mi-*  
*nor sit obligatione Religiosorum, inter*  
*multiplices tamen obstrepentis Sæculi*  
*turbas, haud minorem exigit conatum*  
*eorum, quàm in quiete Claustrali consti-*  
*tutorum, virtus major petat istorum)*  
*sinè omni exercitio sint adepturi, & ad-*  
*eptam*

ceptam inamissibiliter retenturi ; aut ,  
 virtutem nullam exercendo , Cœlum  
 ( quod vim patitur , *Matth. 11. v. 12.* )  
 absque labore consecuturi. Aliud e-  
 nim est : *minus à Sæcularibus quàm à Re-*  
*ligiosis exigi* , aliud : *nihil prorsus requiri.*  
 Aliud inquam est : ab eis non peti , nec  
 eisdem svaderi , ut : dum virtute Justi-  
 tiæ , ad certa forensia , & Politica nego-  
 tia tractanda obligantur , se interim ora-  
 tionibus , & Meditationibus , ità totos  
 dedant , qvò eadem , cum gravi Rei-pu-  
 blicæ damno , penitus negligant , vel  
 perfunctoriè tantùm persolvant ; aliud :  
*eosdem salutis suæ prorsus oblitos , sine*  
*omni conatu , cœlum conscensuros.* Un-  
 de , ità faciendum est unum , ut non  
 omittatur & alterum. Ità serviendum  
 Rei-publicæ , ut non obliviscamur ani-  
 mæ. Ità dextrè dividendum tempus :  
 ut de profundo curarum sæcularium  
 caput frequentiùs erigentes , ea etiam  
 recogitemus , & diligenter curemus ,  
 quæ ad obtinendam salutem nostram  
 conducentia sunt , & necessaria. Hoc



autem, ut eò commodius, à quolibet, quantumvis maximis negotijs politicis occupato, præstari possit; præsens libellus facillimam exhibebit methodum. Ità breviter, discretè, & prorsus *politice* cum Dominis *Politicis* acturus: ut ad valde prolixas, & difficulter practicabiles devotiones, eos non sit adstricturus, necessaria autem sufficienter insinuaturus. Id unum intendendo: ut Christianè vivant, finem creationis suæ præ oculis habeant, peccata diligenter evitent, virtutes, statui suo proportionatas, sectentur: & novissimorum suorum sedulò recordentur. Atque sic (benedicente Deo) ex *Politicis*, *Archi-Politici* evadant, arte prorsus mirabili, & plusquàm *Politica*: ità *deinde in ceptis Mundo servituri*, ut *simul Deo sint placituri*,



## Annotatio.

*De modo meditandi.*

**P**iè meditari, aliud non est, quàm: tres potentias animæ, Dei obsequio impendere. Ità, ut *Memoria*, breviter rem meditandam in animum revocet. *Intellectus*, desuper secundùm lumen sanctæ fidei discurrat. Et *Voluntas*, ab intellectu mota, propositum aliquod, Christiano homine dignum, circa eandem rem concipiat, suoque tempore in effectum deducat. Hoc ergo ut bene fiat: ante omnia præmittat Meditans *Orationem præparatoriam*, quæ in sequentibus actibus consistere debet; Id est: in *actu Fidei*, quò DEUM præsentem, seque videntem concipiat. In *actu Adorationis*, quò præsentem profundissimâ humilitate adoret. Et in *duplici petitione*: quarum primâ *intellectum à Deo illuminari*, secundâ verò *voluntatem, ad cognitâs veritates amplectendas, inflammari* deponat. Præmissa

hac oratione præparatoria, Meditationis ipsius, per puncta divise, singula verba accuratè consideret, & veritatem per ea propositam, meliore quò poterit modo, secum ipse ratiocinando, discutiat. Dein, vitam suam ad trutinam cognitæ veritatis summa cum diligentia revocando, perpendat: num ei veritati conformiter vixerit? & *si ei conformiter vixit*, humillimas gratias DEO agat. *Si verò non*: omni conatu causam, & radicem negligentiae suae inquiret: ut eam funditus evellere, seqve veraciter emendare possit. Post hoc: generosò voluntatis actu præterita detestando, firmissimum concipiat propositum: *vitam suam, ad normam cognitæ veritatis, in posterum omnino instituendi*. Quod propositum, ut efficax sit, in merè generali conclusione nequaquam consistere debet: qui enim generaliter tantum proponit, v. gr. *volo vitam meam in posterum emendare, & Deum non amplius offendere*: qui, inquam, sic generaliter tantum proponit, mul-

tuum

*tum quidem promittit, sed ordinariè nihil servat. Unde, præter ejuscemodi generale propositum, aliud particulare, & quidem in extirpationem malæ radicis, ex qua negligentiam suam pullulasse agnovit, directè tendens, elicere debet. In exemplo: Facta quarta Meditatione, quæ infra habetur, & de negotio salutis tractat, veritas, quam, singula ibi breviter insinuata diligenter ponderando, agnovit, fuisset: cuilibet magis cordi esse debere salutem suam, quàm reliqua omnia negotia sua; eò quòd, tametsi reliqua omnia perderet, hoc solum assecutus felicissimus adhuc esset in æternum; cùm è contra, alijs omnibus ad nutum cedentibus, hoc uno neglecto: miser futurus sit in æternum. Facta, inquam, quarta meditatione, & plenè penetrata veritate jam dicta, mox vitam suam diligentius inspiciendo perpendat: num ei veritati conformiter vixerit. Id est: num re vera salutem suam, præ alijs omnibus negotijs, cordi sibi sumpsisset, de illa frequenter, & sollicitè, cogitaverit, eam*



*efficaciter desideraverit : & media , ad  
 eam assequendam à Deo ordinata , diligen-  
 ter adhibuerit , nec quidquam ei contrari-  
 um egerit. Quæ si ita fuerint : gratias  
 agat omnium bonorum largitori DEO ,  
 & constantem in bene cœptis perseve-  
 rantiam ab eo petat. Si verò in aliquo  
 culpabilem se fuisseprehenderit : pro-  
 fundissimâ humilitate veniam postu-  
 lando , emendationem proponat ; &  
 statim : nè in generali , atque adeò merè  
 speculativo , hoc emendationis propo-  
 sito sistat : causam , & radicem , abomina-  
 bilis in tam gravi negotio negligentie suæ ,  
 diligenter inquirat , ut eam funditus era-  
 dicare , séque veraciter emendare pos-  
 sit. Cùmque , ut facilè videbit , hujus  
 negligentie causa , & radix haud alia  
 fuerit , quàm nimia de rebus terrenis solli-  
 citudo , vi cujus , sæcularibus negotijs  
 ita totum se tradidit , ut , diebus plurimis ,  
 salutis suæ prorsus oblitus , de ea nihil co-  
 gitaverit ; ea propter : malam hanc ra-  
 dicem penitus evulsurus , in particulari  
 proponat : in posterum die quolibet , perac-  
 tis*

tis confvetis matutinis precibus , *per*  
*quartā unius horæ partem, juxta materias*  
*in hoc libello suo ordine distributas, pie*  
*vacare meditationi.* Sic enim, haud du-  
 biè, salutis suæ magis memor vivet, &  
 consequenter, *generale emendationis pro-*  
*positum*, quod paulò antè conceperat,  
 non sinè maximo animæ ejus bono,  
*practicè efficax evadet*, & meditatio op-  
 tatum assequetur finem. His ità per-  
 actis, colloquio meditationem finiat.  
*Colloquium autem istud aliud non est, quàm*  
*familiaris quidem, sed simul reverens, hu-*  
*nilis, & devota allocutio SS. Trinitatis,*  
*vel Christi Domini, vel Beatissimæ Vir-*  
*ginis, vel Sancti Angeli custodis &c.* in  
 qua meditans, quasi personaliter coram  
 SS. Trinitate, vel Christo Domino, vel  
 Beatissima Virgine &c. &c. constitu-  
 tus, varias subinde personas agit: v. g.  
 si alloquatur SS. Trinitatem: *creaturæ*  
*loquentis cum Creatore: infimi vassalli cum*  
*supremo suo Monarcha &c.* Si Christum  
 Dominum alloquatur: *Filii cum Patre,*  
*ægroti cum Medico, discipuli cum Magi-*  
stro

*stro &c.* Si Beatissimam Virginem, Sanctum Angelum custodem, vel aliquem sanctum suum Tutelarem: *mendicum divite, clientis cum Patrono. &c. &c.* Atque: seu consilium in dubijs, seu auxilium in necessitatibus, & periculis, implorat. Finito colloquio, & terminata meditatione: oret unum *Pater, & Ave*, in gratiarum actionem pro luminibus ea meditatione sibi à DEO concessis; constantemque in novo proposito perseverantiam denuo petat.

## MEDITATIO I.

*De creatione, & fine creationis universorum.*

- I. DEUS ex nihilo crevit omnia:  
Et inter omnia etiam me.
- II. Me creavit propter se:  
Ut ei serviens, ipso fruatur in æternum.



III. Reliqua creavit propter me :  
 Ut mihi serviant, ad consequendum  
 finem creationis meæ.

Fructus.

*Sordes ejus in pedibus ejus, nec recordata est  
 finis sui. Thren. 1. v. 9.*

Frequens mea hodierna cogitatio,  
 finis mei erit recordatio. *Pater noster.*  
*Ave Maria.*

### *Lectio spiritualis.*

**Q**uantumvis dignitatem Divinam,  
 per se, & in se infinitam, *præcise*  
*propter se*, ac independenter ab alijs qui-  
 buscunque motivis, venerari, & obse-  
 quijs omnibus honorari oportere, ip-  
 sum lumen naturale, quò Deus *illu-*  
*minat omnem hominem venientem in hunc*  
*mundum. Joan: 1. v. 9.* cuilibet sufficien-  
 ter ostendat homini; tamen, ut obliga-  
 tioni nostræ tantò promptius satisfaciamus,  
 & finem creationis nostræ eò li-  
 bentius impleamus, tres sequentes ra-  
 tiones præterea perpendamus:

I. In-

I. Innumera beneficia, quæ nobis contulit *DEUS*: quæ confert de præsentī: & quæ deinceps conferre intendit.

II. *DEUM*, obsequijs nostris, utpote: *Ens sufficientissimum sibi*, nullatenus indigere. *Dixi Domino: Deus meus es tu, quoniam bonorum meorum non eges. Ps. 15. v. 2. respectu cujus servi inutiles sumus. Lucæ 17. v. 10. perfectissimam ejusdem felicitatem nec bonis operibus augere, nec peccatis nostris turbare valentes; dicente Sancto Job cap. 35. v. 6. & 7. Si peccaveris, quid ei nocebis? & si multiplicatæ fuerint iniquitates tuæ, quid facies contra eum? Porro si justè egeris, quid donabis ei, aut quid de manu tua accipiet? Et consequenter: non ipsius Dei, sed nostrum negotium nos tractare, nostrum proprium utile præcisè observare: dum legem ejus adimplendo, illi quidem famulamur; sed eô famulatu, nobis, non illi, felicitatem æternam lucratur.*

III. Exemplum omnium aliarum creaturarum. Quæ enim creatura suo  
non

non obtemperat Creatori? quæ eidem ad  
nutum servire recusat? *Stellæ --- vocatæ  
sunt, & dixerunt: adsumus. Baruch. 3. v.  
34. & 35. A facie Domini mota est terra.  
Psf. 113. v. 7. Imperavit ventis & mari, &  
facta est tranquillitas magna. Matth. 8.  
v. 26. Dixit Dominus pisci: & evomuit  
Jonam. Jonæ 2. v. 11. Præcepit corvis, &  
paverunt Eliam. 3 Reg. 17. v. 4. & 6.  
&c. &c.*

## MEDITATIO II.

### *De pretio animæ Humanæ.*

I. Animam Hominis pluris æstimat  
*DEUS* toto Mundo:

*Quia eam proprio redemit sanguine.*

II. Pluris æstimat *Diabolus* toto Mundo:  
*Quia pro ea dare voluit totum Mun-*  
*dum. Matth. 4. v. 9.*

III. Pluris æstimare debet *Homo* toto  
Mundo:

*Quia quid prodest homini, si Mundum  
universum lucretur, animæ verò  
sue detrimentum patiatur? Matth.  
16. v. 26.*

*Fru-*

## Fructus.

*Quam dabit homo commutationem pro anima sua? Matth. 16. v. 26.*

Custodiæ, & protectioni Beatissimæ Dei Matris, Sancti Angeli tutelaræ, & Sancti N. Patroni mei, animam meam devotissimè commendabo. *Pater noster. Ave Maria.*

*Lectio spiritualis.*

**Q**Uàm bene dixerit S. Paulus : *habemus thesaurum in vasis fictilibus.* 2 Cor. 4. v. 7. facile intelligit, qui ingens pretium animæ suæ, & pericula hujus vitæ, diligenter expendit. Certè thesaurum habemus, qui totius mundi valorem in hoc ipso, longè superat: quòd pretiosissimam Cœli terræque Domini imaginem præseferat, & ab ejus infinitudine dignificetur, cujus similitudo dici meretur. Sed hunc ipsum thesaurum portamus *in vase fictili*, id est: *in corpore fragili*, & ad omne peccatum proclivi. Cautè igitur eum portare debe-



debemus, nè eum damnò nostrò dilapidemus. Quare autem multi, prorsus incuriè, hunc ingentem portent thesaurum : triplex potissimùm ratio reddi potest.

I. *Quia pretium hujus Divinæ imaginis non intelligunt.* Quod facilè intelligerent, si bilancem crucis Christi assumerent, & quantum eam æstimaverit ipse, attentius ponderarent. Omnia enim tormenta, quæ pro omnibus sustinuit Christus, pro qualibet anima singillatim, si opus fuisset, indubitanter sustinuisset; & si denuo mori posset, denuo sustinere paratus esset. Quod innuens S. Paulus *ad Gal. 2. v. 20.* ac si non in communi pro omnibus hominibus, sed pro ipso solo in particulari, Christus mortem subivisset, de se ipso solo, in singulari, dicit: Christus *dilexit me, & tradidit semetipsum pro me.*

II. *Quia hosti Diabolo nimium credunt,* pericula amissionis ejus parvi facienti, & vitæ delicias multum extollenti. Qui serpentinò astû eis blandiendo, dicit:

B

non

*non facile in æternum perire posse animam,  
quæ, etsi in peccatum cadat, media habet,  
per quæ resurgat.*

III. *Quia irreparabile amissionis eius  
damnum, non satis perspiciunt. Quod  
quidem perspicerent, si eam æternam  
& unicam esse attentius considerarent.  
Ipsa enim æterna est: quam quolibet  
peccato perdere possumus, & si tandem  
perdamus, in æternum non amplius  
recuperamus. Ipsa unica est: quam si  
semel amittamus, aliam non habemus,  
quam substituiamus.*

## MEDITATIO III.

### *De dignitate hominis Chri- stiani.*

Memento Christiane dignitatis tuæ:

I. Ad imaginem DEI es creatus. *Gen. 1.  
v. 27.*

In ejus nomine baptizatus. *Matth. 28.  
v. 19.*

Ad

Ad ei correignandum destinatus. *ad Rom. 8. v. 17.*

II. Innumeris privilegijs te Deus valla-  
vit. *Pf. 8. v. 6.*

Custodiæ Angelicæ sollicitè com-  
mendavit. *Pf. 90. v. 11.*

Omnem creaturam pedibus tuis sub-  
stravit. *Pf. 8. v. 8.*

III. DEUM audes vocare Patrem. *Matth. 6. v. 9.*

Filium ejus fortitus es fratrem.: *Rom. 8. v. 29.*

Spiritum Sanctum Tutorem,  
cœlestis gratiæ largitorem. *Joan. 14. v. 26.*

### Fructus.

*Videte qualem charitatem dedit nobis Pa-  
ter, ut Filij Dei nominemur, & simus.*  
*1 Joan. 3. v. 1.*

Ad magna natus, viles recusabo co-  
natus. *Pater noster. Ave Maria.*

### Lectio spiritualis.

**Q**uemadmodum propriæ vilitatis,  
& primævi nihili nostri humilis re-

cogitatio, universo prodest generi humano: docens unumquemque nostrum solidè subsistere *in se*, nè inani superbiæ ventô tollatur *supra se*. Ità seria supernaturalis præ eminentiæ nostræ meditatio, præprimis necessaria est homini Christiano: ut per eam firmetur *in se*, nè comparatus iumentis insipientibus. Ps. 48. v. 21. committat *indigna se*, & decedat *infra se*. Idque triplici potissimum de causa.

I. Quia talis meditatio, per quam ad imaginem Dei creatos, splendidissimo SS. Triadis nomine gloriosè signatos, & ad corregnandum Deo nos meminisse vocatos: excitat hominem, *ad ea, quæ sursum sunt*, ferventiùs inquirenda; & *ea, quæ infra sunt*, generosè contemnenda.

II. Docet peccata vitare, quæ sola de dignitate nostra nos deturbare, & servituti Diabolicæ æternùm possunt mancipare.

III. Svadet adversa patienter tolerare, ut in Regno Christi mereamur Regnare,



nare, à quo, pati nolentes, cogentur exulare, & quò per multas tribulationes oportet nos intrare.

## MEDITATIO IV.

### *De negotio salutis.*

Consecutio salutis æternæ:

I. Est negotium, totaliter, & unicè meum.

Si ego illud neglexero; quis illud assumet pro me?

II. Est negotium, totaliter, & unicè meum, de toto me, de mea anima, & de meo corpore.

Si ego illud non ursero: quis illud urgebit pro me?

III. Est negotium, totaliter & unicè meum, de toto me, per totam æternitatem duraturo.

Si ego illud non evicero: quis illud evincet pro me?

Fructus.

*Populus verò meus oblitus est mei diebus innumeris. Jeremiæ 2. v. 32.*

Imposterum, ut minùs per quartam  
unius horæ partem, de DEO, & salute  
mea, singulis diebus piè meditabor.  
*Pater noster. Ave Maria.*

## *Lectio spiritualis.*

**I**Nter cæteras rationes, ob quas uni-  
genitus DEI Filius incarnari, & homo  
fieri voluit, hæc etiam fuisse videtur:  
*Ut homines aliquem saltèm haberent ho-*  
*minem, cui omni ex parte fidere, & cum*  
*quo prorsus securè conversari possent.* Præ-  
ter hunc enim Divinum hominem, nul-  
lus alius invenibilis est homo, cui in hoc  
mundo, *omni ex parte*, fidere possi-  
mus.

I. Nobis enim ipsis fidere non aude-  
mus. Quia: *unusquisque nostrùm ten-*  
*tatur à concupiscentia sua abstractus, &*  
*illectus.* Jacobi i. v. 14.

II. Alijs etiam fidere non possumus.  
Quia hi: vel *inimici* nostri sunt, vel  
*amici*, aut *nec amici, nec inimici.* Si  
sint *Inimici*: jam certum est, cum eis  
securè nos conversari non posse: *quis*  
*enim*

*enim fidat inimico ? Si autem sint amici: nec his semper fidendum esse, suo nos periculo præmonet S. Job: quem seducere, & ad impatientiam inducere conabantur amici. Si denique nec amici, nec inimici, hoc est: si indifferentes sint; facile quidem credere possumus, illos nobis non multum boni præstituros; sed, nè eorum nos lædat conversatio, securi esse non valemus. Quia: si amico fidendum non est, minùs certè fidendum erit illi: qui quàmvis non inimicus, amicus non est.*

III. Cùmque ipso teste DEO, non sit bonum, esse hominem solum. Gen. 2. v. 18. & simul, nemini plenè fidere audentibus, periculosissimum sit non esse solos; ea propter: nè etiam cum soli sumus, simus soli; & quando soli esse non possumus, hoc est: quando, statu & negotijs nostris id deposcentibus, cum hominibus conversari debemus, absque periculo salutis nostræ cum iisdem conversemur: DEI clementia nobis de aliquo providit homine, cui non solum



securè fidere possimus, sed ipsa etiam  
 conversatione illius, contra pericula  
 dolosæ conversationis humanæ munia-  
 mur. Hic autem homo, est Deus-Ho-  
 mo *CHRISTUS JESUS*. Cum  
 hoc ergo fidelissimo homine frequen-  
 tissimè conversemur, & impofterum  
 die quolibet, *persolutis precibus no-  
 stris matutinis*, antequam cum reliquis  
 hominibus conversari incipiamus, in  
 sacram solitudinem paulisper seceden-  
 tes, vocem ejus, qui libenter sermoci-  
 natur in deserto, & animæ nostræ loqui  
 cupit in deserto, dicens: *Ducam eam in  
 solitudinem: & loquar ad cor ejus. Osee*  
*2. v. 14.* attentè ibi audiamus: atque de  
 salute nostra piè meditando, cor no-  
 strum ei sincerè aperiāmus, gravissi-  
 mumque salutis negotium, ante alia  
 negotia nostra, *illi soli*, commen-  
 demus soli.

ME.

## MEDITATIO V.

### *De ordine negotiorum.*

- I. Ut negotia nostra bene procedant:  
Temporalia æternis non antecedant.
- II. Diligenter examinentur:  
num salutis animæ non contrariantur.
- III. Prius, quàm à nobis inchoentur:  
DEO humiliter commendentur.

#### Fructus.

*Nonne anima plus est, quàm esca? Matth.  
6. v. 25.*

*Quare ego omnis labor hominis in ore  
ejus? Eccles: 6. v. 7. Pater noster. Ave  
Maria.*

### *Lectio spiritualis.*

**V**alde pauci in hoc Mundo reperiun-  
tur, qui cum veritate dicere pos-  
sint, quod de se ipso dixit S. Psalmista  
David *Pf. 118. v 109.* inqviens: *Anima  
mea in manibus meis semper.* id est: *semper  
operor circa illam, ut salvem illam.* Pleri-  
que enim corpori totum tribuentes,

A 5

nullam

nullam, aut planè exiguam, curam gerunt animæ suæ. Dum :

I. *Negotijs secularibus ita implicantur, ut animæ suæ penitus obliviscantur.* Alijs temporaliter serviunt, se ipsos spiritualiter negligunt.

Hos verò ex hortans Apostolus I ad Theff. 4. v. 10. & II. inquit: *Rogamus autem vos Fratres, --- ut vestrum negotium agatis.* Et Christus ipse, in persona Marthæ, præmonere voluit, dicens: *Martha, Martha, sollicita es, & turbaris erga plurima, porro unum est necessarium.* Luca 10. v. 41. & 42. *Quod unum si negligatur, frustrà alijs insudatur.*

II. *Bona temporalia querunt præ æternis;* eòq; ordine præpostero, amittunt utraque suò damnò. In cujus rei figuram S. Patriarcha Isaac, benedicens Jacob filium suum, dicebat: *Det tibi Deus de rore cæli, & de pingvedine terræ.* Gen. 27. v. 28. Prophetico Spiritu de eo prædicens: quòd primo loco *cælestia*, secundo autem loco *terrena* sit quæsiturus, ac ità utraque habiturus, & in rei  
veritate



veritate *benedictus* futurus. Esau autem, eisdem ferè verbis, sed non eodem ordine dispositis benedicens, agebat: *in pinguedine terræ, & in rore cœli desuper, erit benedictio tua. Gen. 27. v. 39. & 40.* Quasi de eo prænoscens: quòd maiore cura temporalia sit quæsiturus, & *primo loco* ea habiturus, ac ità utraque amissurus, & in rei veritate *maledictus*, non *benedictus*, futurus.

III. *Maxima pericula quæ eos circumstant, incauti non considerant.* Cùm tamen circa picem continuo versari, & ab ea non coinquinari, si non impossibile, valde tamen sit difficile, & sollicita circumspèctione egeat, multàque diligentia opus habeat.

## MEDITATIO VI.

### *De necessitate Bonorum Operum.*

Bona Opera necessaria sunt ad consequendam salutem æternam.

- I. *Quia nolentes non salvantur.*
- II. *Salvari nolunt, qui salvari non conantur.*
- III. *Non conantur, qui Dei gratiæ per opera bona non cooperantur.*

Fructus.

*Non omnis, qui dicit mihi, Domine, Domine, intrabit in Regnum cælorum: sed qui facit voluntatem Patris mei, qui in cælis est, ipse intrabit in Regnum cælorum. Matth. 7. n. 21.*

*Hac est enim voluntas Dei, sanctificatio vestra. 1 Thessal. 4. v. 3.*

Hodie in hoc determinato virtutis actu N. me diligenter exercebo, *Pater noster. Ave Maria.*

### *Lectio spiritualis.*

**Q**uemadmodum in Paradiso terrestri nulla arbor erat sterilis: uti colligitur ex verbis illis dictis Adamo: *Ex omni ligno Paradisi comede. Gen. 2. v. 16.* Ità in Ecclesia Dei militante, ait S. Gregorius Nyssenus, per Paradisum terrestrem significata, nullus homo debet fruc-

fructibus bonorum operum carere.  
Idq̄ve triplici potissimū de causa.

I. *Quoniam fides sinè operibus mortua est.* Jacobi 2. v. 20. nec proderit credidisse in Christum, si opera non fuerint secundū Christum. Sicut enim benedictionem Patris non obtinisset Jacob, nisi pelliculis hædinis manus suas obvolvendo, similes pilosis manibus primogeniti Esau, eidem Patri obtulisset. Gen. 27. v. 23. Itā & nos, à Deo Patre benedictionem, & hæreditatem cœlestem, non obtinebimus, nisi Christo Filio ejus, qui est *primogenitus in multis fratribus.* Rom. 8. v. 29. quoad manus, hoc est: *quoad virtutum opera*, similes comparuerimus. Quin & ipse Christus, hæreditate Patris sui indignos censebit, in quibus opera fidei correspondentia non videbit. Continget ergo talibus, quòd contigit Euphrateis illis, qui vada Jordanis à Galaaditis adversarijs suis occupata transire volentes, de vocabulo *scibboleth* (quod interpretatur spica) interrogati, illud pronuntiare

re nequibant, atque ità ab iisdem Ga-  
laaditis cogniti, occidebantur. *Judicium*  
12. v. 6. Jordanis enim, *fluvius Judicij*  
exponitur, & judicium denotat Christi:  
in quo omnes homines, *despica bonorum*  
*operum* interrogabuntur; quam nisi  
absque errore protulerint, in ipso Jor-  
danis transitu æternùm peribunt.

II. *Quia nemo coronatur nisi legitime*  
*certaverit.* 2 ad *Tim.* 2. v. 5. legitime au-  
tem non certat, quia aërem tantùm ver-  
berat, *verbo Christianus, opere vanus.*

III. *Quia non decet adultos, solò indufiō*  
*vestitos comparere in cælo.* Solò autem  
indufiō vestiti comparerent, si sola fide  
in recessu cordis latente, & per charita-  
tem ad extrà non operante, instructi  
prodirent. Oportet ergo ut imitentur  
prudentem illam mulierem, de qua  
*Proverbiorum* 31. v. 13. narrat Salomon;  
quòd: *quæsi verit lanam & linum, & o-*  
*perata sit consilio manuum suarum.* Quæ-  
sivit *linum*: per quod notatur *vestis in-*  
*terna*, velut interula; & simul quæsi-  
vit *lanam*: per quam signatur *vestis ex-*  
*terna,*



*terna*, velut tunica. Noverat enim: quòd sicut nemo, *præter solos infantes*, absque rubore in publicum prodit solò indusiò tectus, ita nemo adultus, sola ea fide, *quæ in corde latet*, decenter vestiatur: sed pro honestate sua, etiam vestem externam, id est: *fidei conversationem bonam*, induere, & *consilio manuum suarum* stolam immortalitatis sibi promereri debeat.

## MEDITATIO VII.

### *De peccato veniali deliberatè commissò.*

Peccatum veniale deliberatè commissum.

I. Est malum, omnibus Mundi malis longè majus, & solo peccato mortali minus.

Quia unde quaque infinitæ *DEI* majestatis aliqualis offensio.

II. Perfectam erga *DEUM* charitatem minuit,

Fer-

Fervorem devotionis exstingvit,  
 Rerum spiritualium nauscam parit.  
 III. Severè punitur à Deo : diversis in  
 hac vita permixtis infortunijs, per-  
 secutionibus, & tentationibus, &c.  
 In altera autem vita, gravissimis  
 purgatorij pœnis.

Fructus.

*Estote ergo vos perfecti, sicut & Pater ve-  
 ster cœlestis perfectus est. Matth. 5.  
 v. 48.*

Quoties hoc N. peccatum veniale,  
 deliberatè impofterum commiserò, to-  
 tiens hanc N. mulctam pecuniariam,  
 pauperibus erogandam, à me ipso exi-  
 gam, vel hoc N. opus pœnale mox per-  
 solvam. *Pater noster. Ave Maria.*

### *Lectio spiritualis.*

**P**Eccatum veniale est duplex: unum,  
 quod *ex fragilitate humana* commit-  
 titur: alterum, quod *ex mera malitia,*  
*cum plena advertentia,* perpetratur.

De primo dicitur: *Jacobi 3. v. 2. In  
 multis offendimus omnes. Quia etiam  
 viri*

viri Sancti, sæpiùs ex humana fragilitate cadunt. De secundo autem dicit Spiritus Sanctus *Eccles: 19. v. 1. qui spernit modica, paulatim decidet.* hoc est: qui non cavet peccata venialia, tandem cadet in peccata mortalia. Idq̃ve triplici potissimùm de causa.

I. Quia quemadmodum filius, qui nollet vitare offensas Patris, *nisi gravissimas*, ob quas scilicet ex hæredari, & è domo Paterna ejici mereretur: *speciales* illos favores, quos alij magis morigeri filij, *qui Patrem suum etiam in minimis offendere timent*, ab eodem Patre accipiunt, nequaquam consequeretur; ita & anima, quæ benignissimum DEUM, & Patrem suum, solis peccatis *mortalibus* contemnere timet, peccatis autem *venialibus* offendere non curat: quamvis propterea jus ad hæreditatem cœlestem non amittat, nec continuo è domo Paterna ejiciatur; *ordinariè* tamen, illis *specialissimis* & *efficacissimis* gratiæ auxilijs à Deo destituitur, quibus ipse filios suos magis dilec-

tos prævenire solet, & finè quibus homo aut est in periculo cadendi in peccata mortalia, aut defacto cadit in illa.

II. Quia ejúscemodi peccata venialia, sunt quædam ægritudo animæ, & eosdem proportionaliter præstant effectus in anima, quos ægritudo corporis præstare solet in humano corpore. Nimirum: imbecillitatem, defectumque virium ad exercendas virtutes, & vincendas tentationes. Ac proinde: quemadmodum ægritudo corporis, *nisi in tempore ei obvietur*; adferre solet mortem corporis: ita peccata venialia, utpote ægritudo animi, *nisi tempestivè curentur*, persæpè causant mortem animæ, hoc est: *pertrahunt hominem in peccatum mortale*. Ut proinde non immeritò cum Regulo illo *Joan. 4. v. 49.* orare debeamus: *Domine, descende priusquàm moriatur filius meus.* hoc est: sana me à tepiditate mea, priusquàm invaleseat incuria mea, & reatum venialem, culpa sequatur mortalis.

III. Quia, *ut bene notat S. Thomas*, per  
peccata



peccata venialia, paulatim affvescit homo rationis leges violare, & dissonantiam culpæ non timere: ut tandem audeat in magnis, qui audebat in parvis. Ex quo apparet, gravissimè falli eos, qui peccata venialia parvum putant esse malum. Quia certè parvum malum non est, quod ad gravissimum disponit malum. Consideremus igitur finem, ut comprehendamus peccatorum venialium gravitatem. Respiciamus ubi solent terminari, ut discamus omni conatu illa vitare. Recordemur, per peccata venialia nos devenire posse ad mortalia, & ut tantò certius nobis obtingat cum Christo regnare, etiam venialiter timeamus peccare.

## MEDITATIO VIII.

### *De pænis Purgatorij.*

I. Pœnæ purgatorij: excedunt omnia mundi tormenta. Quia sunt altioris ordinis, ipsam penetrantes animam.

II. Accuratissima Divinæ Justitiæ bilan-  
ce ponderantur. Quia *non exies  
inde, donec reddas novissimum qua-  
drantem. Matth. 5. v. 26.*

III. Gravissima Omnipotentis DEI ma-  
nu infliguntur. Quia hæc dicit  
Dominus: *convertam manum me-  
am ad te, & excoquam ad purum  
scoriam tuam. Isa: 1. v. 25.*

### Fructus.

*Ipse autem salvus erit; sic tamen quasi  
per ignem. 1 ad Cor. 3. v 15.*

Non reputabo modica, propter quæ  
pati deberem tanta. *Pater noster. Ave  
Maria.*

## Lectio Spiritualis.

**P**Eccatum, aliud est *mortale*, aliud *ve-  
niale*. Peccatum mortale, præter  
reatum *culpæ gravis*, involvit reatum  
*pœnæ*, non solum *temporalis*, sed eti-  
am *æternæ*. Peccatum autem venia-  
le, præter reatum *culpæ levis*, reatum  
habet solius *pœnæ temporalis*. Rea-  
tus

tus *culpæ* cujusvis peccati, five gravis, five levis, aufertur ex integro *per quamlibet pœnitentiam veram*; reatus autem *pœnæ*, non semper per quamlibet pœnitentiam veram ita tollitur ex integro, ut condonata culpa peccati mortalis, & consequenter cessante reatu pœnæ æternæ, hoc ipso etiam semper cesset integer reatus pœnæ temporalis, eidem peccato alioquin debitæ: aut remissa culpa peccati venialis, illicò etiam condonetur ejusdem peccati pœna totalis; quin nonnunquam, *ob minorem pœnitentis fervorem*, pro peccatis mortalibus, præsertim gravioribus, tota, aut non tota, subeunda adhuc restet pœna temporalis, & pro peccatis venialibus, aliqua subindè remaneat pars pœnæ totalis. Unde pœnitens David, etiam postquam à Nathan Propheta audivisset, peccatum suum *quoad reatum culpæ*, & *pœnæ æternæ*, à Deo sibi condonatum esse: *Dominus quoque transulit peccatum tuum: non morieris. 2 Reg. 12. v. 13.* id est: *non morieris morte æternâ:*

seu, quod idem est: *non punieris propter illud pœnâ aternâ*; adhuc nihilominus, de reatu *pœnæ temporalis*, peccato suo gravi æqvè debitæ, multum sollicitus, instabat clamans: *Amplius lava me ab iniquitate mea, & à peccato meo munda me. Ps. 50. v. 4.* Et *Ecclesiasticus cap. 5. v. 5.* quemlibet admonens peccatorem ait: *De propitiato peccato noli esse sinè metu.* Quasi dicat: noli putare, per quamlibet pœnitentiam tuam, per quam peccati veniam impetrâsti, hoc ipso Divinæ justitiæ pro peccato tuo, præsertim graviore, etiam *quod ad reatum pœnæ temporalis* ita satisfactum esse, ut nihil formidabile pro eo tibi jam restet subeundum. Ipse enim, id est Christus, *Purgabit filios Levi, & colabit eos quasi aurum, & quasi argentum. Malachie 3. v. 2. & 3.* hoc est: etiam prædestinatos, seu cœlo jam destinatos, & post actam pœnitentiam absque peccato mortali in gratia sua mortuos, (*Levi enim, hæbraice assumptus dicitur, assumptus autem est omnis prædestinatus,*



*tus, juxta illud Matth. 24. v. 40. unus as-*  
*sumetur, & unus relinquetur)* colabit, &  
 à residua peccati scoria, quam antece-  
 dens pœnitentia nondum plenè deter-  
 fit, in furno Purgatorij, adinstar auri,  
 diligentissimè purgabit, quoadusque  
 toti inveniantur mundi, & conspectu  
 ejus omnimodè digni. *Quamvis enim*  
*culpa venialis non ità coinquinat ani-*  
*mam, ut DEO execrabilem reddat, nec*  
*cicatrix jam Sanati (per pœnitentiam)*  
 vulneris mortalis, tantam deformita-  
 tem habeat, ut animam cælo *pro sem-*  
*per* excludat: adhuc tamen & *pilus ha-*  
*bet umbram suam*, & quilibet, tametsi  
 minimus, peccati reatus, per antece-  
 dentem pœnitentiam non plenè subla-  
 tus, aliquvaliter saltèm nitorem obscu-  
 rat animæ, purissimósque DEI offendit  
 oculos, juxta illud *Cant. 4. v. 9. vulnerâ-*  
*sti, hoc est: offendisti, cor meum soror*  
*mea sponsa ----- in uno crine colli tui.*  
 Unde, quia in civitatem cœlestem non  
 intrabit aliquod coinquinatum. *Apoc. 21.*  
*v. 27. per ignem Purgatorij mundari*

debet anima, priusquàm beata cœli sub-  
intret limina. Hæc autem purgatio,  
multo rigidior erit, quàm sit illa, quam  
in hac vita, sive per immiſſionem diver-  
ſarum calamitatũ ipſe DEUS, sive per  
ſpontaneam pœnitentiam ipſe ſolet in-  
ſtituere reus. Idq̃ve triplici potiſſi-  
mũ de cauſa.

I. *Quia præſens tempus eſt tempus mi-  
ſericordiæ, futurum autem diſtrictæ erit  
Juſtitia. Juxta illud Pf. 100. v. 1. Miſe-  
ricordiam, & Judicium cantabo tibi Do-  
mine.* Prius miſericordiam, deinde ju-  
diciũ: nempe miſericordiam *in præ-  
ſenti*, judiciũ *in futuro ſæculo.*

II. *Quia ibi locus erit vindictivæ tan-  
tũ executionis, ſecluſo concurſu meri-  
torie cooperationis, cujus unica chari-  
tatis ſcintilla plũs efficeret, quàm uni-  
verſa purgatorij favilla.*

III. *Quia ipſa mors, ſeu ſigillum con-  
firmativum vitæ, quaſi intimũs appri-  
mendo, indurat remanentem ſcoriam pec-  
cati, ut ad tollendam illam fortiore jam  
purga-*

pugatione, & multo rigidiore opus sit  
abrafione.

## MEDITATIO IX.

### *De juvandis animabus Purgatorij.*

- I. Animæ purgatorij adjutorio nostro  
summè *indigent*. Quia sunt in  
maximis tormentis, è quibus ipsæ  
emergere non possunt.
- II. *Merentur* juvari. Quia sunt cognatæ  
nostræ per sanguinem CHRI-  
STI.
- III. *Gratæ nobis erunt*. Quia, cùm sint  
animæ sanctæ, cœlo destinatæ;  
tanti beneficij non obliviscentur  
ingratæ.

#### Fructus.

*Oblivioni datus sum, tanquam mortuus à  
corde. Ps. 30. v. 13.*

Omne opus bonum, quod hac die fa-  
ciam, pro Animabus purgatorij DEO  
offeram. *Pater noster. Ave Maria.*

*Lectio spiritualis.*

**V**ivi facile obliuiscuntur defunctorum. Vix enim defuncti corpus sepulchro infertur, & jam nullus est, qui illius recordetur. *Perijt memoria eorum cum sonitu*, inquit David *Pf. 9. v. 8.* quasi dicat: quàm diù *sonant campana* mortuo parentantes, tam diù reperies aliquos defunctum deplorantes; ast ubi campanæ desierint sonare, etiam homines cessabunt plorare; ac tandem evanescente penitus æris campani sono, è memoria illorum totaliter excidet defunctus homo.

Quod quidem adeò verum est: ut ab hac universali censura, nec sanguine conjunctissimos eximere possim cognatos: quia & isti non rarò suorum obliuiscuntur defunctorum, &, quamvis eorum hæredes sint bonorum, obliuionem tamen erga illos animum gerunt *alienorum*, juxta illud *Psalmi 48. v. 12. Et relinquent alienis diuitias suas.* Hujus autem communissimæ obliuionis, &  
cru-



crudelissimæ defunctorum derelictionis, triplex potissimum ratio reddi potest.

I. Quia vivi non vident defunctos Purgatorij pœnas tolerantes, nec eos audiunt ibidem suspirantes. Quos certè si audirent, & viderent, *misereor super turbam* exclamarent, & pro posse eosdem adjuvarent.

II. Quia meritum boni operis sibi minui credunt, dum illud animabus Purgatorii cedunt.

III. Quia seriò non recogitant verba illa Christi, *Luca 6. v. 38. eandem quippe mensurâ, qua mensi fueritis, remetietur vobis.* Sed, cur ô Christiane, affectas oculis videre, quod certiore fide obligaristenerere? cur times operis tui diminutionem, per fraternæ charitatis meritoriam adjectionem? cur non juvas alios, providens ipse tibi, nè

& tu aliquando ab alijs deseraris ibi?

# MEDITATIO X.

## *De bona prolium educatione.*

- I. A bona educatione, pendet bona vita  
Filiorum. Quia: *Adolescens jux-  
ta viam suam, etiam cum senuerit,  
non recedet ab ea. Prov. 22. v. 6.*
- II. Bonam vitam plerumque terminat  
bona mors. Quia, *ut ait S. Ber-  
nardus Serm. 28. in parv. Qualis  
vita, finis ita.*
- III. Bonam denique mortem ultrò se-  
quitur beata cœli fors. Quia: *hæc  
momentum est, unde pendet æterni-  
tas. Cum igitur animas filiorum,  
commiserit DEUS curæ Progeni-  
torum: ut eas probentur curare,  
piè studeant filios educare.*

### Fructus.

*Noli subtrahere à puero disciplinam: Si  
enim percusseris eum virgâ, non morie-  
tur. Tu virgâ percuties eum: & ani-  
mam*

*mam ejus de inferno liberabis. Prov.*

23. v. 13. & 14.

Hæc N.N. in prolibus meis emendabo, & in his N.N. magis eisdem invigilabo. *Paternoster. Ave Maria.*

### *Lectio spiritualis.*

**Q**Uàm verum sit illud *Gen. 8. v. 21.* *Sensus enim & cogitatio humani cordis in malum prona sunt ab adolescentia sua.* Hoc est: maximum augmentum proclivitatæ ad malum ab adolescentia accipiunt, dum adolescentes virtutis iter in ea non incipiunt; nemo est qui ignoret. Juventus enim, ob communem naturæ humanæ in malum propensionem, per sanguinis sui naturalem fervorem, & Spirituum vitalium singularem vigorem, ad quamlibet levitatem, quasi ad motus calcaribus, per se ipsâ plerumque incitatur; & si eo tempore à moderatoribus negligatur, nec fræno bonæ educationis tempestivè constringatur, sensim ita depravatur, ut vitio pro natura invalescente, & proclivitate

clivitate ad malum in dies crescente, ad virtutis tramitem deinde non ampliùs reducat. Cùm enim virtus consistat in arduo, nisi quis eidem à teneris assvescat, facilè illud Davidicum recantat: *non possum sic incedere, quia non usum habeo.* 1 Reg. 17. v. 39. è contra: qui in juventute piè educatur, toto passim vitæ decursu pius comprobatur. Idq̃ve triplici potissimùm de causa.

I. Quia, qui, mediante bona educatione, ab ipsis penè incunabulis pietati, & virtuti assvescit, illud, quod alijs virtutem difficillimam reddit, ipse jam superavit. Unde Jeremias Propheta *Ihrenorum* 3. v. 27. ait: *bonum est viro, cùm portaverit jugum ab adolescentia sua, rationem versu sequente subjungens: quia levavit super se.* Quasi dicat: quemadmodum qui gravem sarcinam portare intendit, maximam difficultatem in prima ejus elevatione sentit: postquam autem illam in humeros sustulit, jam non adeò difficulter eam portat; ita, qui, mediante pia educatione, onus præ-

præceptorum DEI à teneris portare incepit, iam onum ipsum *levavit super se*, & in humeros sustulit, unde & finè magna difficultate illud deinceps portare poterit.

II. Quia primi habitus acquisiti, specialem efficaciam habent, & potentissimè inclinant hominem ad actus similes, iuxta illud tritum: *quo semel est imbuta recens, servabit odorem testæ diu.*

III. Quia talibus peculiariter assistit Deus, dans in bono perseverare, qui bene dedit inchoare.

## MEDITATIO XI.

### *De modo bonæ prolium educationis.*

Qui proles suas bene educare volunt:

I. Ipsi sint boni. Quia *non potest arbor mala, bonos fructus facere. Matth. 7. v. 18.*

II. Instent apud DEUM oratione, ut proficiant apud proles exhortatione.

Quia



Quia: *neque qui plantat est aliquid, neque qui rigat: sed qui incrementum dat,*  
**DEUS.** 1 Cor. 3. v. 7.

III. Quæ docent verbo, firment exemplo. Quia: *verba movent, exempla trahunt.*

### Fructus.

*Qui autem scandalizaverit unum de pusillis istis, qui in me credunt, expedit ei, ut suspendatur mola asinaria in collo ejus, & demergatur in profundum maris.*  
**Matth. 18. v. 6.**

Domesticis diligenter oportebit invigilare, nè iuventutem, verbo, aut exemplo, præsumant scandalizare. *Pater noster. Ave Maria.*

### Lectio spiritualis.

**Q**Uamvis verum sit, etiam à malis Parentibus bonos subindè procreari filios, plerumque tamen accidit, quod tritum proverbium dicit: *Mali corvi, mala ova.* Unde tametsi S. Josepho Angelus in Ægypto apparens expressè dixerit: *Surge & accipe puerum, & Matrem*

trem ejus, & vade in terram Israel: defuncti sunt enim, qui querebant animam pueri, Matth. 2, v. 20. Dum tamen audiuit: quòd Archelaus regnaret in Judæa pro Herode patre suo, naturali horrore concussus, timuit illo ire, ibid. v. 22. Probabiliter existimans: Filium crudelissimi infanticidæ, haud meliorem futurum patre suo. Et vice versa: quamvis ex optimis Parentibus pessimi nonnunquam nascantur filij, quia tamen plerumque accidere solet: ut si boni sint Parentes, bonæ etiam sint eorum proles; Mulier illa Lucæ II. v. 27. ex sanctitate Christi, sanctitatem Matris ejus non malè intulit, inquit: *Beatus venter qui te portavit; & ubera, que suxisti.* Quare autem filij ordinariè tales sint, quales eorum Parentes, triplex potissimum ratio reddi potest.

I. Quia mali non merentur, ut bonos habeant filios; bonis autem hoc solatium ordinariè concedit DEUS, ut similes sibi videant proles suas.

II. Quia & aviculæ juniores, *naturali*

D

im-

*impulsu*, eô tonô solent cantillare, quem seniores aves consueverunt observare.

III. Quia virtutis iter arduum est, cui tenera iuventus se committere naturaliter timet, dum Parentes, *quos amat*, viâ alterâ incedere videt. Nec sufficit, quòd ad amplectendam viam virtutis exhortationibus ab eis impellatur, nisi insuper manuducatur, & ipsi viæ comites fiant atque ductores, qui ad eam eligendam fuerant hortatores. *Frustra enim perstrepunt verba, si eis contradicant exempla.* Unde etiam, populum Israel admonere volenti Isaïæ, præcepit DEUS: *Quasi tuba exalta vocem tuam, Isaïæ 58. v. 1.* ac si disceret: *quæ doces verbo, firmæ exemplo.* Tuba enim, dum ore inflatur, manû sustentatur, & denotat: verbis opera nostra concordare debere, si fructuosè velimus alios admonere.

## MEDITATIO XII.

### *De fiducia in DEI Providentia.*

- I. DEUS *omniscius* est:  
novit præsentēs, & futuras omnes,  
necessitates nostras.
- II. *Omnipotens* est:  
valet in cunctis providere nobis.
- III. *Piissimus* est:  
non deerit sperantibus in se.

Fructus.

*Dominus sollicitus est mei. Ps. 39. v. 18.*

Socordiâ quidem DEUM non tenta-  
bo, in ipsum tamen præprimis sperabo.  
*Pater noster. Ave Maria.*

### *Lectio spiritualis.*

**M**ulti Christiani nostri temporis, si-  
miles sunt illis Assyrijs, qui puta-  
bant: DEUM Israel DEUM esse mon-  
tium, & non etiam DEUM vallium.

*Dixerunt Syri: DEUS montium est Do-  
minus, & non est DEUS vallium. 3 Reg.*

D 2. 20. v. 28.

20. v. 28. Videntur enim sibi imaginari :  
 DEUM *Cælestium* tantum, & *sublimi-*  
*um honorum* largitorem esse, *terreno-*  
*rum* autem, non esse datorem. Unde  
 hæc à DEO vix petunt, sed Pseudopo-  
 liticis principijs dementati, propriâ in-  
 dustriâ ea acquirere, & conservare se  
 posse credunt. Sed : *Tuum Domine*  
*Regnum---* *tuæ Divitiæ, tua est gloria --*  
*-- tua sunt omnia.* 1 Paralip: 29. v. 11. 12.  
 & 14. *Non possumus ad felicitatis statu-*  
*ram nostram adjicere cubitum unum.* Lu-  
 ca 12. v. 25 sed nec capillus de capite no-  
 stro peribit, sinè voluntate tua. Luca 21  
 v. 18. tuæ igitur Providentiæ nos secu-  
 rè committimus, tuæ Divinæ ordina-  
 tioni utiliter submittimus.

I. *Quia tu amas nos :* Qui ex nihilo  
 fecisti, tuô sanguine redemisti, innume-  
 ris beneficijs prævenisti, & plura adhuc  
 à te sperare docuisti nos.

II. *Quia tu solus nosti quæ desint no-*  
*bis :* Qui solus potes providere nobis.

III. *Quia tu solus potes ex malis bona*  
*facere :* & omne quod timemus, in bo-  
 num nostrum vertere. ME-



## MEDITATIO XIII.

*De reverentia Templis  
debita.*

- I. Tempa: DEI sunt Palatia ,  
gratiæ ejus gazophylacia.
- II. Divino cultui consecrata ,  
multipliciter privilegiata.
- III. Meritoriè honorantur ,  
non impunè violantur.

*Fructus.*

*Domus mea , Domus orationis est. Lucæ  
19. v. 46.*

Confabulari , aut , tempore Divino-  
rum , oculis hinc indè per templum va-  
gari nec mihi ipsi , nec meis subordina-  
tis imposterum licebit. *Pater noster.*  
*Ave Maria.*

*Lectio spiritualis.*

**M**irantur aliqui : cur DEUS Pasto-  
ribus Bethlehemiticis nativitatem  
Christi citiùs intimari fecerit , quàm a-  
lijs viris sanctis , eo tempore viventibus ?

Iplis enim, nocte ipsa nativitatis Christi  
 apparuit Angelus, inquiens: *Evange-*  
*lizo vobis gaudium magnum, quod erit*  
*omni populo: quia natus est vobis hodie*  
*Salvator. Lucæ 2. v. 10. & 11.* cùm tamen,  
 nulli virorum Sanctorum eo tempore  
 degentium, quid simile accidisse lega-  
 tur. Sed, si perpendamus quantopere  
 DEUS honorem Templorum suorum  
 zelet, & quantam Templis suis reve-  
 rentiam exhiberi velit, facile hujus rei  
 causam intelligemus. Perspicuum e-  
 nim est: stabulum illud Bethlehemitic-  
 um, per Filij DEI nativitatem, in *Tem-*  
*plum*, seu locum DEO sacratum, trans-  
 mutatum fuisse. Cùm ergo Pastores  
 isti in vicinia pascere greges suos, &  
 haud dubiè in stabulo illo subindè com-  
 morari solerent: voluit eos, *sine omni*  
*dilatione*, ipsa nativitatis nocte, de sa-  
 cratissimo illo mysterio ibidem con-  
 summato præmonere DEUS: nè forte  
 iterum eo convenirent, & non cum ea  
 reverentia, quæ Templum DEI decet,  
 ibidem se gererent. Quàm Zelosè au-  
 tem

tem DEUS honorem Templorum suorum defendat, & quàm severè eos, qui in Templo peccant, punire soleat, patet:

I. Ex severissima punitione Heliodori, qui, 2 *Mach.* 3. fastuosè Templum Ierosolymitanum ingressus, illud thesauro suo spoliare volebat. Et ex alijs exemplis veteris legis.

II. Ex punitione, quâ Christus ipse punivit Judæos, in Templo nundinas instituentes. Neque enim ullum aliud scelus, *verberum inflictione* punivisse legitur *mitissimus JESUS*, præterquam solam Templi profanationem. Nec punitio illa levis fuit. Quia tametsi S. Evangelista *Joannes cap. 2. v. 15.* dicat: eum solummodo de quibusdam funiculis fecisse *quasi flagellum*, suffecit tamen exiguum hoc instrumentum, *ab Omnipotente ejus brachio agitatum*, ad penetrandum durissimam pellem, & infringendum ferream cervicem Judæorum, ut ictus illos sufferre non valentes, qua data porta è Templo pro-

perare, & præcipiti fuga sibi consulere debuerint.

III. Ex horrenda æternæ damnationis comminatione, quam profanatoribus Templorum, per os Apostoli sui Pauli, minatur DEUS, dicens: *Si quis autem Templum DEI violaverit, disperdet illum DEUS.* 1 Cor. 3. v. 17.

## MEDITATIO XIV.

### *De Sacerdotibus honorandis.*

- I. Sacerdotes: sunt *ministri Christi*, & *dispensatores mysteriorum DEI.* 1 Cor. 4. v. 1.
- II. Angelis potestate majores, Seraphinis officio digniores.
- III. In sortem Domini segregati, servitio illius destinati.

#### Fructus.

*Qui vos spernit, me spernit.* Luca 10. v. 16.  
 Sacerdotes bonos, æstimabo; malos, ob Sanctitatem ordinis, honorabo.  
*Pater noster. Ave Maria.*

*Lectio Spiritualis.*

**P**Riusquàm de Sacerdotali dignitate, & plusquàm Angelica potestate, ac ejus, qui Sacerdotibus præstari debet, honoris qualitate, tecum agam *Chare Lector*; indulge mihi quæso, ut seposito tantisper calamo, miseram sortem meam prius deplem: qui præter ipsum Sacerdotij gradum, nihil honore dignum in me reperio, & tamen, *ob bonum tuum*, de honorandis DEI Sacerdotibus, tibi scribere debeo. Tu quidem meritum apud DEUM non perdis, etsi Sacerdos, ob sua peccata, honore videatur indignus, quem ei impendis; quin imò, tantò majus præmium mereris, quantò magis Sacerdos *malus*, non ob meritum suum, sed *ob characterem Sacerdotalem*, & *DEI præceptum*, à te censetur honorari; *ast ego majoris damnationis reus efficior*, si, *malè vivendo*, Sacerdotij honore abutor, eumque culpâ meâ profano. Quòd autem, non solùm *boni*, sed & *mali Sacerdotes* sint honorandi:



I. *Verbo & exemplo suo ipse nos docuit Christus: qui, etiam perversissimis Phariseis, ob Sacerdotij præminentiam, honorem exhiberi voluit, & obedientiam. Honorem quidem: dum leprosum à se mundatum ad illos misit dicens: Vade, ostende te Sacerdoti, & offer munus, quod præcepit Moyses, in testimonium illis. Matth. 8. v. 4. obedientiam autem, cum dixit: super cathedram Moysi sederunt scribæ, & Pharisei. Omnia ergo, quaecunque dixerint vobis, servate, & facite: secundum opera verò eorum nolite facere. Matth. 23. v. 2. & 3. Quin imò tam grave censebat Sacerdotes inhonorare, ut, qui atrocissima crimina, sibi falso objecta, tacendo dissimulavit, & crudelissima tormenta, quasi agnellus macello destinatus, sine balatu subivit: dum in domo Annæ, tanquam dignitatis Sacerdotalis contemptor, percussus fuisset à servo, dicente: sic respondes Pontifici? Joan. 18. v. 22. non modò obiecti criminis suspicionem à se removerit, sed insuper, quasi alapa illa, hoc titulo*

*tulo inflicta*, gravior fuerit alijs tormen-  
tis, de hac sola conquestus, dixerit: *si*  
*malè*, id est, irreverenter, *locutus sum*, *te-*  
*stimonium perhibe de malo*: *si autem bene*,  
*quid me cedis?* *ibid.* v. 23.

II. *Docuerunt nos Sancti DEI*: qui  
dum adhuc in carne vivebant, Sacerdo-  
tes mirè honorabant. Inter quos Sanc-  
tus Franciscus Seraphicus, teste S. Bo-  
naventura in ejus vita, frequentius dice-  
re solebat: *si Sacerdoti, & Angelo simul*  
*obviarem, Sacerdoti prius, quàm Angelo,*  
*me inclinarem.* Nec mirum. Ipsi e-  
nim Angeli Sacerdotium novæ legis  
submissè venerantur, & Sacerdotibus  
primatum cedere, nullatenus gravan-  
tur. Cujus rei exemplum narrat Sanc-  
tus Franciscus Salesius, *relatus à R. P.*  
*Paulo Segneri, Parte 3. Christiani instru-*  
*cti, Discursu 24. n. 4.* de quodam Cano-  
nico suo: qui ob singularem vitæ inno-  
centiam S. Angelo Custodi mirè familia-  
ris, eundem visibili specie sibi præsen-  
tem habebat. Cùmque Sacerdos non-  
dum esset: Angelus Custos, quoties  
per

per aliquam portam, seu locum aliquē angustiores transeundum erat, Canonicum illum, utpote dignior, semper *antecedebat*, & in pari incessu à *dextris* ejus ambulabat; cū autem Canonicus ille *Sacerdos* factus fuisset: ex tunc Angelus Custos *non amplius eum antecede-  
bat*, sed præcedentiam eidem, quasi digniori, semper relinquebat, & in pari incessu à *sinistris* ejusdem imposterum incedebat.

III. *Ipsa sūadet ratio.* Nunquam siquidem, omnibus retrò seculis, teste *Baronio in Annalibus*, tam barbarus in Mundo exstitit Populus, qui Sacerdotibus suis specialem non detulisset honorem. Cū enim naturali lumine cognosceret: *Divinitatem aliquam coli oportere*; naturali etiam lumine cognoscebat: *Divinitatis illius Ministros honorari debere.* Nunc autem, proh dolor! *Armatus videtur*, inquit Doctissimus Oleaster, *Orbis omnis contra eos, qui se DEI ministerio tradi-*  
*derunt.*

# MEDITATIO XV.

## *De Iudicio temerario.*

Qui Judicare præsumit Proximum suum :

- I. *Offendit gravissimè Deum: quia usurpat sibi, quod DEUS ipse reservavit sibi.*
- II. *Exponit se manifesto periculo erroris. Quia non novit secreta cordis.*
- III. *Sæpenumero damnificat sibi ipsi: dum cogitur solvere de proprio, quod, nullô suô lucrô, temerè dampsit alieno.*

### Fructus.

*Nolite judicare, ut non judicemini. Matth.*

*7. v. 1.*

*Excusa intentionem si opus non potes, puta ignorantiam, puta subreptionem, puta casum. S. Bernardus ser. 40. Pater noster. Ave Maria.*

### *Lectio spiritualis.*

**Q**uibusdam nihil rectum videtur, quid-

quidquid Proximus operetur. Omnia enim finistrô oculô observantes, sinistre interpretantur, ac in singulis factis, mali aliquid suspicantur. Hujus autem ad observandum, & temerè judicandum, nimiae proclivitatis eorum, triplex potissimùm ratio reddi potest.

I. *Quia ipsi sunt mali.* Qui enim malus est, facilè etiam alium malum esse suspicatur. Hinc, Lutherus: qui Monasteria Monialium in lupanaria convertit, & in Luxuriæ fœcibus impudicus volutabatur: Sacerdotum Catholicorum cœlibatum audacter conviciabatur, & eosdem promiscuè fornicarios, impudentissimè criminabatur. Cainus quoque, quia ipse homicida erat, omnes homines homicidas futuros credebatur, dicens: *Omnis igitur, qui invenerit me, occidet me. Gen. 4. v. 14.* Et damnatus Epulo, cùm à Lazaro, in sinu Abrahæ quiescente, opem desideraret, non ipsum Lazarum, sed Abrahamum inclamabat, dicens: *Pater Abraham, miserere mei, & mitte Lazarum, ut intin-*  
gat



gat extremum digiti sui in aquam, ut refrigeret linguam meam. *Lucae 16. v. 24.*

Quia scilicet: cum ipse malus fuerit, & nec micæ de mensa sua decedentes viventi Lazaro faverit, malum etiam credebatur Lazarum, qui, *animo se de eo vindicandi*, hoc obsequium ei esset denegaturus, nisi auctoritate Abrahamæ ad id compelleretur.

II. *Quia sunt superbi*: qui neminem se meliorem credunt.

III. *Quia leves sunt animo*. Quibus quælibet vana suspicio, aut à garrulis, & inconsideratis hominibus facta relatio, ad condemnandum, & sceleris arguendum proximum, sufficiens appareret ratio. Quomodo Totila Gothorum Rex, teste *S. Gregorio lib. 6. Dialogorum, cap. 3.* cum vidisset Sanctum Cassium Episcopum Narniensem in facie rubicundum, hanc futili apparentia illico persuasus, bibulum eum credidit, & Sanctitati ejus injurius fuit.

Quam gravis autem apud DEUM sit hæc levitas, & quantum per illam pro-

proximi lædatur charitas , docet nos  
 Christus æterna veritas ; dum *Pf.* 108.  
*v.4.* potiùs contra suos *detractores*, quàm  
 contra ipsos conqueritur *crucifixores*,  
 inquit : *pro eo, ut me diligere, de-*  
*traherent mihi.* Quasi, ut bene observat  
*S. Augustinus*, hoc plus ei doluerit, &  
 omnis Judaicæ ingratitude summa  
 fuerit.

## MEDITATIO XVI.

### *De alienis peccatis occultis non propalandis.*

Occulta peccata publicare, & publi-  
 cando proximum diffamare:

- I. *Est peccatum non facilè remissibile.*  
 Quia quoad damnum emergens  
 difficulter reparabile.
- II. *Est peccatum à paucis curatum.* Quia  
 à paucis bene consideratum.
- III. *Est peccatum valde nocivum.* Quia  
 scandali causativum. Fruc.

## Fructus.

*Qui sine peccato est vestrum, primus in illam lapidem mittat. Joan: 8. v. 7.*

Falcem meam in messem alienam non immittam, qui in proprio campo quod metam habeo, & innumeris defectibus ipse scateo. *Pater noster. Ave Maria.*

*Lectio spiritualis.*

**Q**UOD infernalis lupo, seu, juratus hostis noster Diabolus, subinde pellem ovinam assumat, & in Angelum lucis se transformando, incautos decipiat; Christo nos præmonente, & experientiâ ipsâ docente, comprobamus. Novit enim astutissimus serpens, venena sua celare, & sub specie boni illa propinare: ut tantò avidius hauriantur, quantò minùs observantur. Hæc autem fraus, vel maximè ab illo practicatur, dum in conversationibus publicis, aliorum peccata occulta propalandi, occasio datur. Tunc enim non rarò, etiam illi, qui alioquin videbantur scrupulosi,

pulosi, tam laxi fiunt, & desidiofi: ut non modò licentiâ detractricis lingvæ se peccare non credant; sed insuper gloriæ DEI sibi in eo videantur Zelatores, in quo alienorum defectuum, culpabiles fiunt propalatores; juxta illud *Joan. 16. v. 2. Venit hora, ut omnis qui interficit vos, seu (quod morte ipsa acerbius est) honore vestro exspoliât vos, arbitretur obsequium se præstare DEO.* Sed advertere deberent ejuscemodi inconsiderati homines:

I. Id repugnare lumini naturali, dictanti: *Quod tibi non vis fieri, alteri nè feceris.*

II. Hoc modo non corrigi defectus alienos, cùm talis indiscreta propalatio defectuum occultorum, normam præscriptæ à DEO correctionis fraternæ non teneat, & consequenter, fructuosa esse nequeat.

III. Per talem propalationem, præsertim, si occulta illa peccata, quæ publicè alijs narrantur, à Sacerdotibus perpetrata dicantur, grave scandalum generari, & in-

& insuper *Sacerdotalis ordinis contemptum, universaliter procurari*; ex quo audacia peccandi apud *Laicos* mirè crescit, & fervor Religionis valde tepescit. Cui malo jam olim, in veteri lege, obviare volens DEUS: quamvis pro singulis ferme *Laicorum peccatis*, particularia quædam assignaverit sacrificia, pro peccatis tamen *Sacerdotum*, nulla ordinavit. Nè scilicet, ut pulchre observat doctissimus *Oleaster, in cap. 15. Num: populus sciret peccata Sacerdotum, & exinde occasionem fumeret, tantò audaciùs similia perpetrandi, & ob eadem perpetrata, Sacerdotes contemnendi. Quò etiam respexisse videtur, æterna laude dignissimus, Romanorum Imperator Constantinus, qui, teste Eusebio, Nicephoro, & Theodoro, ob bonum commune Religionis, in tantum peccata Sacerdotum occultari cupiebat, ut diceret: si proprijs oculis viderem Sacerdotem peccantem, Chlamidem meam exuerem, & cooperirem eum, nè ab aliquo videretur.* Non quòd putaret; majorem



*peccandi libertatem præstari debere Sacerdotibus ; aut hos majore compassione dignos esse : qui revera, coram DEO, multò magis culpabiles existunt, & pro peccatis suis, multò graviores pœnas merentur, quàm Laici: sed, ut scandala impediuntur, quæ ex divulgatione Sacerdotalium peccatorum per se oriuntur ; & maximas strages in Ecclesia causant, dum, extraordinario fœtore malæ exempli Laicos inficiendo, faciliore successu, pertrahunt in ruinam.*

## MEDITATIO XVII.

*De Concionibus, & Spiritualibus exhortationibus, diligenter frequentandis.*

Sacræ Conciones, diligenter sunt audiendæ;

I. Quia

- I. Quia, in eis loquitur nobis DEUS: qui non solis Apostolis, sed & Concionatoribus, *in officio predicationis eosdem sequentibus*, dixisse intelligitur: *qui vos audit, me audit. Lucæ 10. v. 16.*
- II. Quia, verbum DEI, est *gladius spiritûs*, ad Eph. 6. v. 17. quod dum negligitur, spiritualis armatura abjicitur, & fortalitium mentis robore præfidiario spoliatur.
- III. Quia ab attenta *hujus, vel illius, determinatæ* exhortationis auscultatione, quorumdam æterna pendebat salus, & nostra æquè pendere potest. Ergo *quamlibet* periculosè negligimus.

## Fructus.

*Oves meæ vocem meam audiunt. Joan. 10. v. 27.*

Dominicis, & festis diebus, auditione solius Missæ non contentabor, sed concioni etiam interesse conabor. *Pater noster. Ave Maria.*

## Lectio Spiritualis.

**Q**Uòd non immeritò S. Paulus Apostolus *1 ad Corinth. 4. v. 13.* conquestus fuerit, dicens: *tanquam purgamenta hujus mundi facti sumus, omnium peripsema.* Facile intelligit, qui eum Principem concionatorum fuisse meminit. Eamdem enim querelam, etiam nostri temporis Concionatores innovare possent; quòd scilicet: cùm veritatem loqui, & vitia redarguere debeant, majori hominum parti facti exosi, à plurimis contemnantur, à multis odio habeantur, à paucis audiantur. Cùm tamen, sacras admonitiones, & legis DIVINÆ explanationes diligenter auscultare, *omnibus, cujuscunque statûs hominibus*, valde proficuum sit, & sumè necessarium. Idq̃ve triplici potissimùm de causa.

I. Quia **DEUS**, ordinariè, vult homines docere per homines, & convertere per homines. Cujus exemplum habemus in ipso Sancto Paulo, quem adhuc  
infi-

infidelem, propriâ virtute quidem prostravit, in fide autem, & lege sua, per se ipsum non instruxit, sed quærentem quid se facere oporteret? Damascum misit ad Ananiam, dicens: ibi dicetur tibi, quid te oporteat facere. *Actor: 9. v. 7.*

II. *Quia, si quis ignorat, ignorabitur.*  
*1 Cor. 14. v. 38.* hoc est: qui ea addiscere non vult, quæ Christianus scire tenetur, reprobabitur à DEO, & audiet aliquando, terribile illud: *nescio vos.*  
*Matth. 25. v. 12.* In cuius rei figuram, cum DEUS in lege veteri, omnia primogenita pecorum sibi offerri, seu immolari, præcepisset: *solius asinae primogenitum repudiavit.* Et vel ove permutari, vel interfici mandavit, *Exodi 13. v. 13.* Spirituales siquidem asini, quin imò, *primogeniti*, seu, maximi asini omnium asinorum dici merentur, qui ea, quæ salutem suam æternam concernunt, & quæ, ante reliqua omnia, scire deberent, nec sciunt, nec scire currant. Hi ergo, nisi mutantur in oves, de quibus inquit Christus *Joan. 10. v. 27. oves*

*meæ vocem meam audiunt. h. e. nisi à Concionatoribus, & Catechistis, verbum DEI audire velint, & ea, quæ ad consequendam salutem æternam scire debent, sedulò addiscant: occidentur, & libro vitæ non inscribentur, cui non nisi oves Christi, inscriptæ reperientur.*

III. *Quia, etiam viri doctissimi, & in lege DEI instructissimi: qui aliena admonitione, aut instructione, se minime indigere putant, subinde valde illâ indigent. Nunquid enim David non satis doctus, aut in lege DEI non satis instructus erat? & tamen in luto peccatorum suorum tam diu hæsit, donec redargueretur à Nathan. 2 Regum 12. v. 13. Accedit: quòd sæpè fallamur in opinione nostra, & subinde putemus, nos in hac vel illa materia versatissimos, & instructissimos esse: cùm interim idiotæ simus, & ignorantes. Id autem vel maxime verum est: dum agitur de cognoscendis proprijs defectibus, tunc enim plerique tantò magis sunt cæci, quantò magis docti; quia tantò magis superbi, & existimatione propria excæcati.* ME-



## MEDITATIO XVIII.

*De Sacro-Sancto Missæ  
Sacrificio.*

- I. Sacrificium Missæ: est incruenta Fi-  
lij DEI oblatio,  
Vitæ & Passionis illius repræsentatio,  
Ejus erga nos amoris rememoratio.
- II. Offeritur pro vivis, & defunctis,  
Plurimum prodest singulis, & cunc-  
tis,  
Christo capiti charitate junctis.
- III. Plus tamen prodest præsentibus,  
Missam devotè audientibus,  
quàm profit absentibus.

## Fructus.

*Ab ortu enim solis usque ad occasum, mag-  
num est nomen meum in Gentibus: &  
in omni loco sacrificatur, & offertur no-  
mini meo oblatio munda. Malachie 1.*

v. II.

Die quolibet, Sacro-Sancto Missæ  
Sacrificio devotè interesse conabor. *Pa-  
ter noster. Ave Maria.*

E §

Lectio

*Lectio spiritualis.*

**D**E quo sibi olim valde gratulabantur Judæi, dicentes: *nec est alia natio tam grandis, quæ habeat DEOS appropinquantes sibi, sicut DEUS noster adest cunctis obsecrationibus nostris. Deut. 4. v. 7.* De hoc, multò majore cum emphasi, hodiedum sibi gratulari possunt fideles Christiani, qui DEUM suum die quolibet in templo præsentem invenire, & in Sacro-Sancto Missæ Sacrificio, eidem possunt inservire. Idque triplici potissimum de causa.

I. Quia, taliter eidem assistendo, & Missam devotè audiendo, non modò cum sibi benignè habent præsentem, sed insuper, multò largiorem quam olim Judæi, gratiæ ejus in se derivant torrentem. Pro ipsis enim in eadem Missa specialiter orat Sacerdos, per verba: *Et omnium circumstantium &c.* & ipsi, unà cum Sacerdote, idem Sacrificium DEO offerre censentur; dicente eodem: *Suscipe Sancta Trinitas hanc oblationem, quam tibi offerimus &c.*

II. Quia

II. *Quia, orationes eorum, quas fundunt tempore Missæ, magis efficaces fiunt ratione Missæ.* Cùm enim sacrificium hoc sit munus DEO gratissimum, & id ipsum, ut *suprà* dicitur, non à solo Sacerdote, sed etiam à *præsentibus*, & cum eo *unum corpus morale efficientibus*, DIVINÆ Majestati offeratur; preces adstantium, quæ per se præcisè minùs efficaces essent, accedente tanti muneris oblatione, efficacissimæ fiunt, & ingens pondus acquirunt.

III. *Quia, præcipua mysteria vitæ & passionis Christi, per Missam eis ad vivũ representantur, ut ea gratò animò reco'ant, & de eorũ recogitatione, tantò magis in spiritu proficiant.* Dum enim Sacerdos sacras vestes in Sacrario induit, sumus Pontifex, secundum ordinem Melchisedech, Christus Dominus, in utero virginis carnem nostram assumpsisse, & habitu inventus fuisse ut homo, intelligitur. Qui idem, divinissimus Sacerdos, calicem accepit, & cum eo ad altare processit, cùm ab ipso incarnationis instanti, usque ad  
aram

aram crucis, *vita ejus integra, passio fu-*  
*it continua.* Dixit introitum, cum Neo-  
 natus infantulus primam vocem, si-  
 milem alijs, emisit, plorans. *Gloria in*  
*excelsis Deo*, decantaverunt in ejus Na-  
 tivitate Angeli. *Epistolam* intimato-  
 riam adventûs ejus, prælegit tabella-  
 rius, & præcursor illius Joannes Bap-  
 tista, dicens: *Ecce agnus Dei, ecce qui*  
*tollit peccatum Mundi.* Joan. 1. v. 29. *Evangelium* dixit ipse Christus, qui iter fa-  
 ciebat per civitates & castella, prædicans &  
 evangelizans regnum DEI. Luca 8. v. 1.  
*Credo*, adjunxit Populus. Joan. 7. v. 49.  
*Sanctus*, seu, *benedictus qui venit in no-*  
*mine Domini*, decantaverunt turbæ, in  
 die Palmarum. Matth. 21. v. 9. *Conse-*  
*cratio* facta est in cœna, *Elevatio* in cru-  
 ce. *Memento* dixit latro pœnitens,  
 Luca 23. v. 42. *Pater noster* recitavit  
 Christus, dicens: *Pater dimitte illis &c.*  
 Luca 23. v. 34. *Pacem* dedit, dum Matri  
 suæ valedicens, Joannem ei in filium  
 adoptavit. *Sacram hostiam* divisit, dum  
 inclinato capite, spiritum emisit. *Par-*  
tem

*tem illius calici immisit, dum ad limbum se ipsum demisit. Agnus Dei, & Domine non sum dignus in æquivalenti pronuntiârunt: qui de monte Calvario revertebantur: percutientes pectora sua. Lucæ 23. v. 48. Sumptionem peregit Joseph ab Arimathæa, qui sumpsit corpus JESU, & posuit illud in monumento suo novo. Matth. 27. v. 60. Ite missa est, intonuit Christus, dicens: consummatum est. Joan. 19. v. 30. Benedictionem dedit, cùm benedixit discipulos, ascensurus in cœlum, Lucæ 24. v. 51. Ultimum Evangelium Apostoli legerunt, dum illud, post ascensionem ejus, in universo Mundo prædicaverunt.*

## MEDITATIO XIX.

*De frequenti, & devota,  
SS. Eucharistiæ  
sumptione.*

*Ad cœleste hoc convivium, devotè  
frequentandum.*

I. Ipse



I. Ipse nos invitat Christus, dicens: *Venite, comedite panem meum, & bibite vinum, quod miscui vobis. Prov. 9. v. 5.*

II. Propria urget utilitas, quia: *Si quis manducaverit ex hoc pane, vivet in eternum. Joan. 6. v. 52.*

III. Evidens compellit necessitas: *quod nostra sanctetur infirmitas, & contra insultus Diaboli, roboretur debilitas.*

### Fructus.

*Gustate, & videte quoniam suavis est Dominus. Ps. 33. v. 9.*

Imposterum, ut minus, quater per annum devotè communicabo. *Pater noster. Ave Maria.*

## Lectio Spiritualis.

**S**eptem spicæ plenæ & formosæ, quas *Gen. 41. v. 5.* in culmo uno pullulare conspexit Pharaon: ad litteram quidem significabant panis abundantiam, per annos septem, in Ægypto futuram; mysticè autem denotabant septem Sacra-

Sacramenta novæ legis, quæ ab uno eodémque culmo *Christo Domino* profecta, non vacua & egena elementa, ut in lege veteri, sed plena gratiæ & virtutis, omnem Christianum Orbem, affluentiam spirituali, toto temporis septennio, usque ad Mundi sabbatum & finem, pascunt ac nutriunt. Inter hæc autem, virtute, & cœlesti dulcedine, plurimum excellit augustissimum Eucharistiæ Sacramentum, *cujus* prorsus mirabilem *suavitatem*, inquit S. Thomas opusculo 50. *nullus dignè exprimere sufficit, per quod Spiritualis dulcedo in suo fonte gustatur.* Unde de illo bene intelligitur illud *Psalmi 80. v. 17. de petra melle saturavit eos.* hoc est: Divinam bonitatem, eos, qui ad hoc Sacramentum devotè accedunt, *de petra*, quæ, interprete Sancto Paulo, Christus ipse est, *Petra autem erat Christus.* 1 ad Cor. 10. v. 4. melle, seu dulcedine cœlesti, *omne delectamentum in se habente*, in quantum ipsi capere, seu desiderare possunt, ad plenam eorum saturitatem replere, & super ex-  
 plere.

plere. Dummodo tamen hæc tria ab ipsis fiant:

I. *Ut removeantur ea, quæ Sacramenti hujus suavitatem, & uberioris gratiæ influxum, impedire noscuntur.* Præ primis autem, præmisso accurato examine, conscientia mundetur per pœnitentiã, & omne virus peccati, per sacramentalem confessionem, evomatur. Non enim stabit Arca DEI cum Idolo Dagon, nec in templo cordis nostri fructuosè recipietur DEUS, dum, per malitiam peccati, adhuc in eo habitat Diabolus. Quia Christus ipse, *Marci 2. v. 22.* monet: *Nemo mittit vinum novum in utres vetes: alioquin dirumpet vinum utres.* Utì, non modò spiritualiter, sed & corporaliter, contigit proditori Judæ, qui dum in ultima cœna, novum vinum *Eucharisticum*, à vetustate peccati per pœnitentiam non renovatus, indignè sumpsit; paulò post: crepuit medius: & diffusa sunt omnia viscera ejus. *Actor. 1. v. 18.*

II. *Ut præmittatur preparatio debita.* Quæ cor nostrum dignum faciat Christi recepta:

receptaculum. Hujus autem præparationis modum docet nos Sunamitis illa, quæ volens Prophetæ Eliseo mansionem congruam in domo sua præparare, dicebat ad virum suum: *faciamus ergo ei cœnaculum parvum, & ponamus ei in eo lectulum, & mensam, & sellam, & candelabrum.* 4 Regum 4. v. 10. per *candelabrum*, indicatur fides; per *lectulum*, denotatur requies à laboribus, curis, & negotijs sæculi, seu, cor pacatum & devotioni intentum; per *sellam*, significatur præmeditatio futuri cœlestis convivij; per *mensam* autem, fames, & spirituale desiderium cibi hujus Divinissimi, designatur.

III. *Ut Cœleste hoc convivium sæpius accedatur;* quô fervor devotionis in nobis augeatur, &, per ejuscemodi sanctam hospitalitatem, Christus magis devinciatur.

## MEDITATIO XX.

*De otio vitando.*

- I. Otium: est Mater vitiorum,  
pestilens eruca bonorum,  
omnium origo malorum.
- II. Pretiosi jactura temporis,  
schola magistri Dæmonis,  
sepulchrum vivi hominis.
- III. Molle pulvinar Diaboli,  
pestis, & fuligio animi,  
quietum iter tartari.

Fructus.

*Si quis non vult operari, nec manducet,*  
2. ad Thess. 3. v. 10.

Pro ratione statûs mei, tempus mihi in singulas horas ita distribuam, ut semper honestè, & utiliter me occupatum videam. *Pater noster. Ave Maria.*

*Lectio spiritualis.*

**Q**uemlibet hominem, quantæcunq; dignitatis, aut præ eminentiæ existat, *pro ratione statûs sui* laborare, & otium



otium vitare debere, in ipsa primi hominis creatione, ostendit DEUS: dum Adamum, quem universi Orbis Monarcham constituit, laborare nihilominus, & operari voluit, atque in Paradisum voluptatis, eâ conditione, introduxit: *ut operaretur & custodiret illum. Gen. 2. v. 15.* Unde S. Job, nulla inter nobiles & ignobiles facta distinctione, indiscriminatim agit: *homo nascitur ad laborem, & avis ad volatum. Job. 5. v. 7.* Quamvis enim, non omnes idem deceat labor, sed alius maneat rusticos, alius viros honoratos; otium tamen vitare oportet omnes, sive subditos, sive Prælatos. Idque triplici potissimum de causa.

I. *Quia, qui otio se tradit, de vitio in vitium cadit.* Et præ primis quidem, homo otiosus, ordinariè fit homo libidinofus. Dum, sicut aqua, inquit S. Laurentius Justinianus, lib. de perfect: grad. c. 9. *quæ caret decursu, ac jacet in fo- veis, putrescit, ac humano usui aliena efficitur, repleturque animalibus venenatis*

*ac noxijs: Ità & corpus otij tabe confectum, concupiscentiarum carnalium parit insaniam.* Cujus exemplum habemus in Rege David, qui, quamdiù in bello se exercebat, libidinem nesciebat; ast postquam bellare cessavit, & in solario domûs Regiæ otiosus obambulavit, turpe adulterium perpetravit. 2. Reg. 11. v. 2. & 4. Salomon quoque filius ejus, tamdiù castus, quamdiù curis ædificij occupatus fuit, postquam autem, absoluto ædificio, quieti se dedit, mulieres adamavit, 3 Reg. 11. v. 1.

II. *Quia, qui otio asvescit, illud deinceps deferere nescit.* Grave enim malum, inquit S. Chrysostomus, homil: 15. in Gen. *est otium, facitque ut facilia omnia videantur difficilia.*

III. *Quia, homo piger & otiosus, nemini proficiuus, omnibus exosus.*

## MEDITATIO

## XXI.

*De vitandis peccandi occasionibus.*

Occasiones peccandi nolle vitare, & tamen in peccatum se non casurum  
putare:

- I. Est *actus summæ temeritatis*,  
humanæ immemor infirmitatis.
- II. *Actus summæ superbiæ*,  
soliditatem obtendens, sanctitatis cu-  
jusdam super humanæ.
- III. *Actus summæ stultitiæ*,  
contradicens summæ sapientiæ, di-  
centi: *Qui amat periculum, in illo  
peribit. Eccl. 3. v. 27.*

## Fructus.

*Qui autem cavet laqueos, securus erit.  
Prov. II. v. 15.*

Infirmitatis meæ sedulò recordabor;  
&, nè iterum cadam, has N.N. occasio-  
nes vitare conabor. *Pater noster. Ave  
Maria.*

## Lectio spiritualis.

**D**Euteromij cap. 21. v. 12. præcepit DEUS, ut Mulier Gentilis Hebræo nuptura: *radat cæsariem, & circumcidat ungues.* Hoc est, *ut explicat Lyranus in moral:* Anima à peccatis per veram pœnitentiam ad DEUM reversura, & Christo sponso suo deinceps *fideliter adhæsura*, non modò *radere debet cæsariem*, seu: *præterita vitia deponere*; sed etiam *ungues præcidere*, hoc est: *peccandi occasiones rescindere*, quæ *veluti acutissimi ungues* illam denuo *cruentare possent*, & deformare. Idque triplici potissimum de causa.

I. *Quia, quod secûs viam non septam negligenter seminatur, à prætereuntibus plerumque concultatur; juxta illud Lucæ 8. Aliud cecidit secûs viam, & concultum est.* Unde, si pericula non curamus, & viam Diabolo non claudamus, haud mirum erit, si ab eo nos superari, & fastuosè contingat concultari. Multò enim difficilius videtur occasio-  
nes

nes peccandi non vitare, & tamen peccatum non perpetrare, quàm rugienti leoni intrepidè obviare, & finè armis illum debellare. Hinc Samson, cùm juxta vineam obviasset leoni, maluit cum illo pugnare, quàm eum declinando, vineam intrare, *Judic. 14. v. 5. & 6.* cùm enim Nazaræus esset, cui *uvæ comedere non licebat*, *Num. 6. v. 3.* magis timuit: nè, dum vineam intraret, & uvis appropinquaret, gula eum superaret; quàm nè occurrens leo, illum devoraret.

II. *Quia, nisi occasiones peccandi diligenter vitemus priora peccata, certò certius repetemus.* Qui enim non vitat occasiones peccandi, affectum aliquem retinet ad peccatum, per quem, à Diabolo, in priorem facilè retrahitur statum. In cujus rei figuram *Exodi 10. v. 11.* Astutissimus Pharaon, *plagâ locustarum perpulsus*, dimittere quidem voluit viros *Israel* de *Ægypto*, ut sacrificarent Domino, dicens: *ite tantùm viri, & sacrificate Domino*; uxores tamen, & proles eorum in pignus remanere,



aut saltem, eorum pecora in Ægypto retinere, cupiebat; haud vanè sperans: eosdem ob hæc, quibus affectuosè adhærebant, in Ægyptum iterum redituros. Sed astutiam, simul & periculum, advertens Moyses, non modò primam conditionem respuit, sed nec secundam admittere voluit, dicens: *cuncti greges pergent nobiscum: non remanebit ex eis ungula. ibid. v. 26.*

III. Quia, eodem præcepto quò prohibemur peccare, proximas peccandi occasiones jubemur vitare. Quas dum liberè non vitamus, hoc ipso legem DEI violamus. Et hinc, dum Evam in paradiso interrogasset serpens: quare de fructu ligni scientiæ boni & mali non manducaret? Ipsa optimè respondit, dicens: *Præcepit nobis DEUS, nè comederemus, & nè tangeremus illud. Gen. 3. v. 3.* Quamvis enim in sacris litteris non legatur DEUS explicitè prohibuisse Adamo & Evæ, etiam tactum prædicti fructus, sed solum illius esum, *Gen. 2. v. 17.* Quia tamen cum tangere, & ori applicare, valde

valde periculosum erat, & occasionem proximam violandi præcepti præbebat; ea propter, in præcepto *non edendi*, meritò imbibitum intelligebatur præceptum, etiam *non tangendi*.

## MEDITATIO XXII.

### *De peccato Mortali.*

- I. Peccatum Mortale: *est venenum fortissimum*; quia immortalis animæ occisio.
- II. *Monstrum turpissimum*; quia, DEI, tam in se, quàm erga nos infinite boni, enormis offensio.
- III. *Damnum gravissimum*; quia, felicissimæ æternitatis amissio.

Fructus.

*Miserere mei D E U S, secundum magnam misericordiam tuam. Psalm 50.*

v. 3.

Quinque vulnera Christi crucifixi devotè osculabor, peccatorum meo-

rum veniam enixè precabor. *Pater  
noster. Ave Maria.*

## *Lectio spiritualis.*

**N**ON caret fundamento suo, complurium Ascetarum opinio, assistentium: cuius homini, arcanò Divinæ Sapientiæ consiliò, quemadmodum numerum, & mensuram dierum: ità etiam, determinatam mensuram condonandorum peccatorum, præfinitam esse. Quæ mensura, non est omnibus una; sed, quemadmodum præfinitam mensuram dierum, alij ipsa prima vitæ die quâ vivere incipiunt, alij autem, non nisi in ultima senectâ adimplent: ità & hanc condonandorum peccatorum mensuram, quidam primò quò peccare cœperunt, quidam secundo, vel tertio, quidam autem, non nisi centesimo, aut millesimo, complent peccato. Sed, five primò, five centesimò aut millesimò peccato eam quis compleat: quemadmodum semel completa mensura dierum, nulla jam homini conceditur vitæ dies, ità  
com.

*completa hac condonandorum peccatorum  
 mensura, ejuscemodi peccatori nulla jam  
 conceditur peccatorum venia; sed Divina  
 Justitia indubitanter profilit ad ultio-  
 nem. Et, vel ipso præfinitæ mensuræ  
 completivi peccati momento, morte  
 repentina, illicò è vivis tollit peccan-  
 tem, vel, si morte repentina eum illi-  
 cò non tollat, specialem tamen assis-  
 tentiam, & auxilia gratiæ efficacis (quæ-  
 admodum post primum fratricidij pec-  
 catum Caino) ex tunc illi omnino de-  
 negat; quibus destitutus homo, veram  
 de peccatis suis pœnitentiam non est  
 acturus, sed finaliter impœnitens, cer-  
 tò certiùs æternum periturus. Juxta  
 illud scripturæ: *super tribus sceleribus  
 Damasci, & super quatuor non convertam  
 eum. Amos. I. v. 3. Implete mensuram  
 Patrum vestrorum. Qua impleta: Ser-  
 pertes genimina viperarum, quomodo fu-  
 gietis a judicio gehennæ? Matth. 23. v. 32.  
 & 33. Necdum completæ sunt iniquitates  
 Amorrhæorum usque ad præsens tempus.  
 Gen. 15. v. 16. Quem posteriorem scrip-  
 turæ**

turæ locum specialiter expendens S. Augustinus, libro de vita Christiana cap. 4. inquit: Nondum sunt expleta peccata Amorrhæorum usque adhuc. *Quò exemplò manifestissimè instruimur, & docemur, singulos secundum peccatorum suorum plenitudinem consummari, & tandiù, ut convertantur, sustineri, quamdiù cumulum suorum non habuerint delictorum consummatum.* Et paulò superius: *Esse autem certum peccatorum modum, atque mensuram, DEI ipsius testimonio comprobatur. Et, quòd unusquisque vel celerius, vel tardius, prout peccatorum suorum modum expleverit, judicetur, evidentissimè quidem demonstratur.* Cui subscribens S. Ambrosius, ait: *DEI verba sunt, non sunt completa peccata Amorrhæorum, per quod ostendit, mensuram quamdam esse delictorum.* Et, præter alios, etiam doctissimus Cornelius à Lapide, in cap. 5. Zachariæ, v. 6. assentitur, dicens: *Amphoram esse mensuram peccatorum cuiusque tum hominis, tum populi, qua impleta,*  
*DEI*



*DE I vindicta profilit ad ultionem.* Hac ergo prorsus terribili, sufficiente tamen fundamento provisa, opinione præsupposita: considera jam, ô Christiane! in quàm manifesto æternæ damnationis periculo animam tuam constituas, quoties, ad perpetrandum quodcunque peccatum mortale, te resolvis. Si enim:

I. *Cuilibet homini, quemadmodum mensura dierum, ita etiam certa condonandorum peccatorum mensura à DEO est præfinita, & hæc, non omnibus una, sed aliquibus major, aliquibus minor constituta credatur.* Si:

II. *Tu ignoras quot peccata tibi DEUS, in arcano sapientiæ suæ consilio, condonare decreverit.* Et consequenter:

III. *Certus non sis: utrum hoc ipsum peccatum, quod actu perpetrare intendis, non sit futurum mensuræ tuæ ultimum completivum, post quod veniam à DEO non amplius sis obtenturus, sed certò certius æternum periturus.* Ah! quomodo tamen peccare potes? & tantæ incerti-

certitudinī salutem tuam æternam exponere audes!

## MEDITATIO XXIII.

### *De temeritate peccantis.*

- I. Peccator dum peccat; contemnit DE-  
UM infinito dignum honore: dum  
spernit legem, *vidente Legislatore*, &  
conculcat pretium redemptionis,  
Christi sanguinem, *præsente Redem-  
ptore*.
- II. Immemor nativæ vilitatis, subditus  
esse renuit infinitæ DEI majestatis,  
eamque, Physicō concursû, suis ser-  
vire cogit peccatis.
- III. Nec de cœli curat delicijs, nec æquē  
judicat de Orci supplicijs, sed ruens  
in malum cursu præcipiti: *illicite vo-  
luptatis fruiturus melle modico, satiari  
non timet æterno toxico*.

Fructus

## Fructus.

*Tibi soli peccavi, & malum coram te feci.*

*Pf. 50. v. 6.*

Cum opportunissimum, contra Diabolicas tentationes remedium, sit fervens oratio: *orate, ut non intretis in tentationem. Matth. 26. v. 41.* hæc autem, efficacior sit in templo, seu in domo orationis, efficacissima verò, sub incruento Missæ Sacrificio; dum scilicet: oblatione Sacro-Sancti corporis & sanguinis Dominici, placatâ DEI Justitiâ facilius consequi possumus Misericordiam. Ea propter: quoties deinceps eidem Sacrificio adfuero, toties, dum per Sacerdotem corpus & sanguis **CHRISTI** elevabitur: eo, profundissimâ humilitate, adorato, in hunc modum, præsentem ibi alloquar Salvatorem: *O super omnia dilecte JESU! qui dixisti: si exaltatus fuero à terra, omnia traham ad me ipsum. Joan. 12. v. 32. accipe quæso, & attrahere cor meum, ut in posterum constanter diligam te, & prius moriar,*

*Jaimez et adieu.*

*riar, quàm peccando divider à te. Pa-  
ter noster. Ave Maria.*

## *Lectio Spiritualis.*

**I**Nter innumeras Idololatriæ species,  
quibus, cæca Mortalitas DEOS sibi  
finxit: & adoravit; prima fuit ado-  
raotium *Solem simul & Lunam*. Quæ  
dein', tractu temporis, in duas divisa  
est sectas: dum alij prætermisso *Solis*  
cultu, solam adorabant *Lunam*, alij ne-  
glectâ *Lunâ*, venerabantur *Solem*. Hu-  
jus autem divisionis, teste *Sancto Cyrillo*  
*Jerosolymitano Catech. 4.* hæc causa fuit:  
ut qui adorabant *Solem*, *occidente Sole*,  
*noctis tempore sinè DEO essent*, qui au-  
tem adorabant *Lunam*, *de Die DEUM*  
*non haberent*. Homines enim isti si-  
mul *DEUM habere*, & simul peccare  
volebant; cùmque intolerabile puta-  
rent: à *DEO suo videri*, & simul eum  
offendere; ut tempus peccandi habe-  
rent, diviserunt tempus, & DEOS  
suos: Quique *Solem* adorabant, post  
occasum *Solis*, *noctu peccabant*, qui  
autem

autem adorabant *Lunam*, peccabant de *Die*. Sed, ô anima mea! *sicut tenebræ ejus, ita & lumen ejus. Ps. 138. v. 12.* DEUS tuus quem adoras, tam bene te peccantem videt de nocte, quàm videat de die. *Palpebræ enim ejus interrogant filios hominum. Ps. 10. v. 5.* & tunc etiam, quando oculos clausos, seu palpebris tectos, habere videtur, intima cordis nostri clarè intuetur; cave ergo: nè, quod Ethnici horrebant, tu præsumas, & in conspectu *DEI* tui peccare audeas. Cave, nè minùs apud te possit fides tua, quàm posset oculus tuus, & quæ infinitam illius majestatem præsentem si videres, offendere non auderes; præsentem fide credendo, nè contemnas peccando. Scito enim:

I. Te peccare, in conspectu *Judicis tui*. Qui potestatem habet, ipsò peccati momentò, te mittere in *gehennam*. *Luce 12. v. 5.*

II. In conspectu *summi Benefactoris tui*. Qui tibi tanta præstitit, & propriò te redemit sanguine.

G

III. In



III. In conspectu *amantissimi Patris tui*. Qui amore infinitô dilexit , & diligit te.

## MEDITATIO XXIV.

### *De pœnis peccati Mortalis.*

- I. *Unicum peccatum mortale* : è Cœlo ejecit Luciferum : & omnes ei adhærentes.
- II. Innumeris subjecit miserijs Adamũ : & omnes ab eo descendentes.
- III. Æternis involvit ignibus : omnes in eo morientes.

#### Fructus.

*Principium sapientiæ : timor Domini.*  
*Prov. 9. v. 10.*

Nè Divina ultio me præveniat , in his N. N. vitam meam veraciter emendabo , & nunquam amplius eadem iterabo. *Pater noster. Ave Maria.*

*Lectio*

*Lectio Spiritualis.*

**P**roprijssimus quidem titulus peccati mortalis ille est, quem ipsi tribuit S. David. *Pf. 18. v. 13.* dicens: *ab occultis meis munda me.* Eò quòd, omne peccatum mortale tantæ sit malitiæ essentialis, ut hæc capacitatem intellectûs creati excedens, omnibus sit *occulta*, solique intellectui Divino *perfectè nota*, qui solus, infinitam Majestatem suam per peccatum offensam, comprehensivè cognoscit. Nè tamen similes simus illis, de quibus conqueritur Spiritus Sanctus *Proverb. 19. v. 28.* inquiens: *Os impiorum devorat iniquitatem*, hoc est: absque prævia masticatione, seu consideratione, peccatum deglutiant peccatores, & *bibunt velut aquam iniquitatem*; cujus quidditatem comprehendere non valemus, saltèm effectus, & pœnas illius, paulisper consideremus, ut ità, prægustata quodammodo amaritudine pœnæ peccati, illud tantò diligentius vitemus, quanto magis pœ-

nas illius horremus. Hæ autem sunt  
sequentes:

I. Intellectûs cœcitas: *Et ipsi nihil  
horum intellexerunt. Lucæ 18. v. 34. Vo-  
luntatis perversitas: Sensus enim & co-  
gitatio humani cordis in malum prona sunt  
ab adolescentia sua. Gen. 8. v. 21. Sterili-  
tas terræ: Posuit flumina in desertum, &  
exitus aquarum in sitim; terram fructi-  
feram in salsuginem, à malitia inhabitan-  
tium in ea. Ps. 106. v. 33. & 34. Pestis:  
Fames: Bellum: Et persequar eos in  
gladio, & in fame, & in pestilentia --- eò,  
quòd non audierint verba mea. Jeremia 29.  
v. 18. & 19. Morbi: observa diligenter nè  
incurras plagam lepræ. Deut. 24. v. 8. id est;  
nè incurras peccatum, propter quod in-  
fligitur pœna lepræ, & omnes morbi. Bre-  
vitas vitæ: Timor Domini apponet dies:  
& anni impiorum breviabuntur. Prov.  
10. v. 27. Mors corporis: per unum ho-  
minem peccatum in hunc Mundum intra-  
vit, & per peccatum mors, ad Rom: 5. v. 12.  
Mors animæ, seu privatio gratiæ Divi-  
næ: Quocunque enim die comederis ex*

eo, morte morieris. *Gen. 2. v. 17.* Et denique, omnia mala mundi: *Transgressi sunt leges, mutaverunt jus, dissipaverunt fœdus sempiternum. Propter hoc maledictio vorabit terram. Isaïæ 24. v. 5. & 6.*

II. Gignit conscientię vermem: *Occidi virum in vulnus meum, & Adolescentulum in livorem meum. Gen. 4. v. 23.* Hominem in bestiam mutat, dum bestiales affectiones in eo prædominari facit: *comparatus est jumentis insipientibus, & similis factus est illis. Ps. 48. v. 21.* Diabolo similem reddit: *Ego Ecclesiastes fui Rex Israel in Jerusalem. Eccles. 1. v. 12.* quod Chaldæus vertit: *Ego Asmodæus fui Rex Israel in Jerusalem.* Quasi dicat, ex mente interpretis Chaldæi, Sapientissimus Solomon: quando in luxuriæ fœcibus hærebam, non hominis præferebam imaginem ad DEI similitudinem facti, sed Dæmonis Asmodæi imago eram, qui lasciviæ & incontinentiæ præpositus dicitur. Totum perturbat Orbem terrarum: *Regnum à Gente in Gentem transfertur propter injustitias. Eccles. 10. v. 8.*

III. Aures Divinas obstruit, nè audiant deprecationem peccatoris: *scimus autem, quia peccatores DEUS non audit.* Joan. 9. v. 31. Omnes labores humanos præmio æterno indignos reddit; id enim figurabat nocturna piscatio discipulorum, dicentium: *Per totam noctem laborantes, nihil cepimus.* Lucæ 5. v. 5. ubi *per noctem*, status peccati, seu carentia luminis gratiæ Divinæ, significabatur. Bona opera antecedenter facta, unô rictû absumit, quasi nunquam exstitissent: *non enim qui operantur iniquitatem, in vijs ejus ambularunt.* Ps. 118. v. 3. quasi dicat: *qui peccant, nihil unquam boni fecerunt.* Hoc est: tam parum illis priora eorum bona opera profunt, ac si illa nunquam fecissent; quia hæc dicit Dominus: *Si autem averterit se justus à justitia sua, & fecerit iniquitatem --- omnes justitiæ ejus, quas fecerat, non recordabuntur.* Ezech.

18. v. 24.



# MEDITATIO XXV.

## *De vitio Superbiæ.*

Quid superbis *terra* & *cinis*? *Eccles:*

10. v. 9.

I. Qui quod *es*, non à te ipso, sed à DEO  
*es*, & nisi in ipso, nihiles: *in ipso*  
*enim vivimus, movemur, & sumus.*

*Actorum* 17. v. 28.

II. Qui quod *habes*, non à te ipso, sed à  
DEO habes, & nisi ab ipso, nihil  
habes: *quid autem habes, quod non*  
*accepisti?* 1. *ad Cor.* 4. v. 7.

III. Qui quod *potes*, in ipso *potes*, &  
*sinè ipso nihil potes: sinè me nihil*  
*potestis facere.* *Joan.* 15. v. 5.

Fructus.

*DEUS* superbis *resistit.* *Jacobi* 4. v. 6.

Dum *superbæ cogitationes* caput  
meum turbabunt, ad eas propulsandas,  
*cinere*, aut *terræ pulvere*, in modum  
*crucis* me ipsum signans, dicam: me-  
mento homo *quia pulvis es, & in pulve-*

*rem reverteris. Gen. 3. v. 19. Pater noster.  
Ave Maria.*

### *Lectio spiritualis.*

**P**effima hæreditas à Protoparente nostro Adamo nobis relicta, *Superbia est.* Vi cuius, innatò quodam pruritù, semper in altum nitimur. Et quemadmodum ipse Protoparens noster, quavis totius universi Monarcha à DEO constitutus esset, adhuc nihilominus altius semper eluctari, ac tandem ipsi DEO affimilari volebat: *eritis sicut Dij. Gen. 3. v. 5. & 22.* ità plerique nostrum, sorte sua nunquam contenti, altiore semper honoris gradum ascendere cupiunt, & *non est finis acquisitionis eorum: Baruch. 3. v. 18.* quia *superbia eorum -- ascendit semper. Ps. 73. v. 23.* Cùm tamen revera non sit cur superbiamus, quin potius, sub potente manu DEI, nos omnimodè humiliare debeamus.

I. Recogitando: *quid fuerimus ante pauculos annos?* Dum ex nihilo creati, in Sordibus nati, laboriosissimè educati,

ti, maximis miserijs eramus impliciti. Talis enim prioris miseriæ humilis recogitatio, superbiam domat. Quod bene sciens Pharaon, fratribus Joseph, quos de terra Chanaan in Ægyptum invitabat, ut omnem supellectilem suam pariter in Ægyptum adferrent, providè mandabat, dicens: *Properate quantocyùs venientes, nec dimittatis quidquam de supellectili vestra: quia omnes opes Ægypti vestræ erunt.* Gen. 45. v. 19. & 20. Non quasi, his paupertatis exuvijs, opus fiat habituri, qui omnes Ægypti divitias erant adepturi; sed, ut attritos illos centones, & reliquam pauperculam supellectilem, quâ in terra Chanaan utebantur, apud se retinentes, & subindè intuentes, primævi statûs sui admonerentur, & occasione præsentis exaltationis, superbiam non inflarentur: sed in humili gratiarum actione, præstitæ sibi à Pharaone gratiæ, tantò fructuosius recordarentur. Moyse etiam, quem Ducem Populi Israel constituit DEUS, illam ipsam virgam, quâ

prius gregem Soceri sui pascebat , in  
sceptrum dedit , *Exodi 4. v. 17.* ut eam  
præ oculis habendo, *prioris statûs sui non*  
*oblivisceretur* , & occasione *præsentis*  
*prælationis* , superbiâ non extolleretur.

II. *Quid simus defacto ?* Quò magis  
enim In hoc Mundo honorati, porentes,  
Nobiles, & divites sumus: tantò ma-  
jorem causam humilitatis, & timoris,  
habemus; quia: qui coram Mundo  
primi, hi coram DEO solent esse ulti-  
mi, juxta illud *Deut. 28. v. 43.* *Advena,*  
*qui tecum versatur in terra, ascendet su-*  
*per te, eritque sublimior: tu autem de-*  
*scendes, & eris inferior.* Advena au-  
tem, peregrinus, & ignotus Mundo est,  
qui ab eo non curatur, spernitur, igno-  
ratur, ut *pauper, rudis, ignobilis &c.* Ci-  
vis verò Mundi vocatur, qui Mundum  
amat, & ab eo amatur, possessionibus  
augetur, commoditatibus providetur.

III. *Quid futuri simus deinceps?* Fini-  
tâ enim vitæ scenâ, mors omnes æqua-  
bit. Et, quemadmodum *vivens* Da-  
vid, *Rex & Dominus* in Sacra Scriptura  
passim

passim vocatus, *post mortem suam*, jam non *Rex*, sed *David tantum* fuit appellatus: *Dormivit igitur David cum Patribus suis, & sepultus est in civitate David. 3. Reg. 2. v. 10.* Ita & nos, quacunque demum prærogativâ in hoc misero Mundo insigniti, postquam tandem è vita cesserimus, plebeis cineribus similes erimus.

## MEDITATIO XXVI.

### *De vitio Ingratitudinis.*

- I. Vitium Ingratitudinis: est *vitium valde commune*, quia toto Orbe impune.
- II. *Vitium summè nocivum*: quia ulterius beneficentiæ præclusivum.
- III. *Vitium plusquàm brutale*: quia ipsis bestiis contrà-naturale.

#### Fructus.

*Grati estote. ad Coloss. 3. v. 15.*

Pro acceptis beneficijs, tam DEO,  
quàm



quàm hominibus, me gratum exhibebo. *Pater noster. Ave Maria.*

## *Lectio Spiritualis.*

**N**Efario ingratitude vitio, *inquit Seneca*, nulla ab humanis legibus pœna constituitur. Eò, quòd vel totus ferè terrarum Orbis, hóc vitiò infectus, alioquin puniri deberet; vel certè, hujus immanis vitij tantus sit reatus: ut condigna ei pœna ab homine nequeat excogitari, sed Divinæ potius ultioni debeat reservari. Quòd autem totus penè terrarum Orbis hóc morbô laboret, figura jam olim præcessit in decem illis leprosis, à Christo Domino, *Lucae 17.* mundatis. De quibus ipse dixit: *nónne decem mundati sunt, & novem ubi sunt? non est inventus qui rediret, & daret gloriam DEO, nisi hic alienigena.* Ubi redeuntem illum, non ideo tantùm *alienigenam* vocasse videtur, quòd non *Judæus*, sed *Samaritanus* fuerit; sed vel maximè ideo: quod à consuetudine totius ferè ter-

terrarum Orbis *alienus* effectus, gratiam pro gratia reddens, *contra patrium morem aliorum hominum*, gratum se stiterit, gratiæ largitori. Cur autem plerique pro acceptis beneficijs ingratos se exhibeant, triplex potissimum ratio reddi potest:

I. *Quia, plerique homines, beneficia sibi præstita non agnoscunt.* Ut v.gr. *morbos, calamitates, infortunia, & cruces diversas*, pro eorum correctione à DEO immittas; has enim, potiùs hostiles incursus, quàm cœlestis gratiæ putant decursus.

II. *Quia, agnita beneficia non multum curant, quæ meritis suis debita putant.* Uti Propheta Jonas, qui lætatus quidem fuit cum hedera super caput ejus excrevit, & umbram ei præstitit, *Jonæ 4. v. 6.* DEO tamen, ob tam miraculosum beneficium, gratias non agebat, quod fortè meritis suis debitum credebatur.

III. *Quia, non ipsi Benefactori, sed alijs causis ea assignant, aut propriæ industriæ falso*

*falso adscribunt.* Hæc autem maxima est ingratitudo, quam summoperè de-  
testabatur S. Job. c. 31. v. 26. & 27. inqui-  
ens: Si--- osculatus sum manum meam  
ore, hoc est: si mihi ipsi blandien-  
do, bona opera mea, viribus meis natu-  
ralibus me effecisse dixi, *quæ est iniqui-  
tas maxima, ibid. v. 28. quia, ingratitudo  
maxima.*

## MEDITATIO XXVII.

### *De vitio Gulæ & Ebrietatis.*

Gula & Ebrietas:

- I. Mater est Luxuriæ,  
Soror Acediæ,  
Nutrix discordiæ.
- II. Filia Otiositatis,  
Præambula Paupertatis,  
Hostis sanitatis.
- III. Cerebri confusio,  
Stultiloquij occasio,  
Hominis in bestiam transmutatio.

Fruc-

## Fructus.

*Retribuebant mihi mala pro bonis. Ps. 34.*

*v. 12.*

Donis DEI non ampliùs abutar contra DEUM, ad offendendum eum. *Pater noster. Ave Maria.*

## *Lectio Spiritualis.*

**V**ERUM quidem dixit Architriclinus *Joan: 2. v. 10.* iniquiens: *Omnis homo primum bonum vinum ponit: & cum inebriati fuerint, tunc id, quod deterius est.* Eò, quòd, tametsi omnes homines *duplicia vina* proponenda non habeant: omne tamen vinum, quantumvis unum idemque existat: quò diutius proponitur & largius hauritur, eo deterius efficiatur: dum vitio *Ebrietatis*, in causam mutatur *omnigenæ perversitatis*. Sed nec minùs verum dixit, Spiritus Sanctus *Deut. 32. v. 15.* iniquiens: *Incrassatus est dilectus, & recalcitravit: incrassatus, impingvatus, dilatatus, dereliquit DEUM factorem suum.* Intemperantia enim voracitatis, germana est

Soror

Soror *Ebrietatis*, huic sanguine juncta,  
& mali proprietate ab ea non disjuncta.  
Idque triplici potissimum de causa.

I. *Quia*, utraque hæc superfluitas,  
quamvis sanitatem corporis destruat, pe-  
tulantiam tamen carnis mirè confortat.  
Quod enim *Iudicum* 6. v. 38. & 40. visum  
est contingere in vellere Gedeonis, id  
passim contingit in anima. Cum ce-  
cidit ros *in vellus*, tunc area circumja-  
cens sicca fuit; cum autem ros ceci-  
dit *in aream* vellus ficcum, & aridum  
remanfit. Ità, si per subtractionem  
superfluatorum, arescat terra carnis nos-  
træ, vellus animæ cœlesti perfunditur  
rore gratiæ. Si verò caro nostra ma-  
deat Ebrietate, & cibi potusve impin-  
gvetur superfluitate, deficiunt vires  
animæ, & Spiritus petulantiam carnis  
frænare nequit, quin in omne vitium  
feratur, & frænô rationis se stringi non  
patiatur. Unde, quemadmodum An-  
gelus cum Patriarcha Jacob luctans, ut  
eum superaret, *nervum femoris ejus te-  
tigit*, ex quo femur emarcuit, & Jacob,  
qui



qui è nervis ad luctandum vires sumebat, claudicare & deficere incipiebat. *Gen. 32. v. 25.* Ità & Spiritus, si carnis petulantiam frænare velit: tangere illam debet in ventre, seu in nervo fortitudinis suæ, & subtrahere voluptati, quod superfluit necessitati; tunc enim claudicabit caro, & passionibus illius superabiles erunt.

II. *Quia, utraque Luxuriam incendit.* Dum, ut bene observat S Hieronymus, *Venter mero æstuans, citò despumat in libidines.* Et S. Basilus lib. de vera Virginitate, inquit: *Ventre enim distento epulis, necesse est ea, quæ sub ipso sunt, membra, ex humoris redundantia in profundo ferventis, ad propria & naturalia officia moveri; quippe superior venter suppetit illis incentiva libidinis.*

III. *Quia, utraque ad quodlibet vitium perpetrandum hominē audacem facit.* Ut proinde Anna, Samuelis Mater, non immerito Ebrios filios Belial, hoc est: filios absq; iugo, seu, filios effrenes, nominari debere putaverit, & Sacerdoti Heli, qui eam

H                      Ebrie-

Ebrietatis arguebat, aptè responderit, dicens: *nè reputes ancillam tuam quasi unam de filiabus Belial.* 1. Reg. 1. v. 16. Et S. David, non abs re, omnem malitiam populi Judæorum, *adipsi*, seu, *pinguedini*, per saginationem voracitatis acquisitæ, adscripserit, dicens: *prodiit quasi ex adipe iniquitas eorum.* Ps. 72. v. 7. Quia: caro *Ebrietate* madida, & *epulis* impingvata, omnem malitiam excogitare nata.

## MEDITATIO XXVIII.

### *De vitio Avaritiæ.*

- I. *Aváro, nihil est scelestius, quia: & animam suam venalem habet.* Eccles. 10. v. 10.
- II. *Nihil crudelius, quia: ut multiplicet opes, vivos excoriat pauperes.*
- III. *Nihil vesanius, quia: congregat laboriosè, quod moriens deserat dolorosè.*

Fructus.

*Avarus non implebitur pecuniâ.* Eccles. 5. v. 9. Hodie

Hodie largiorem eleemosynam pauperibus erogabo. *Pater noster. Ave Maria.*

## *Lectio spiritualis.*

**O**Mnes quidem peccatores cæci sunt, quia lumine gratiæ Divinæ destituntur. Si tamen, quis eorum magis cæcus sit, quærat: haud malè Avarus indigitatur. Avaro enim, non solum divitiæ, quæ bonæ non sunt, bonæ falsò videntur: sed etiam curæ & angustia divitiarum, quæ ipsi bonæ non videntur, pro bonis, & exoptabilibus, ab eo habentur. Atque ità pessimo labore præ ceteris occupatur, & in maiore damnationis periculo, infelix versatur. Idque triplici potissimum de causa.

1. Quia, ut ait *Apostolus 1. ad Timoth. 6. v. 9.* qui volunt divites fieri, incidunt in tentationem, & in laqueum Diaboli. Sensim enim, invalescente cupiditate, intantum excæcatur mente Avarus, ut amore pecuniæ, & terrenæ possessionis adipiscendæ gratiâ, nullum scelus per-

petrare timens : nec Justitiam , nec conscientiam , nec animam , quin nec Christum ipsum , instar Judæ proditoris , vendere abhorreat.

II. Quia affectus Avaritiæ , non modò *mente* , sed & *corpore* , intantum excacare potest hominem , ut , à se ipso totus alienus effectus , præ cupiditate nec sciat , quid faciat. Exemplum habemus in Ariolo Balaam , qui *Num. 22.* cupiditate promissi sibi à Rege Balac auri dementatus , strata , conscensaque asina sua , ad maledicendum populo Israel properabat. Et tamen ab Angelo , qui *corporea* , seu *visibili* assumpta specie , eidem occurrerat , progredi strictò gladiò prohiberetur , asinam tamen suam , quæ viso Angelo gressum retrahebat , ad progrediendum , multâ verberatione , impellebat ; quia scilicet , *cupiditate promissi auri excacatus* , minùs quàm asina videns , quem illa cernebat , ipse prohibentem Angelum aut non videbat , aut videre non volebat. Quin imò , etiam postquam asina , stupendo prorsus miraculo

lo, articulatâ voce loqui incepisset, tanta novitate nihil motus, quia à se ipso alienus totus, mortem asinæ minatur, nisi illicò progrediatur: *Utinam habeam gladium, ut te percuterem!* Ergo, reponit bestia: *Nonne animal tuum sum, cui semper sedere consuevisti usque in presentem diem?* *ibid. v. 30* Quasi diceret: Cur me vis occidere, quæ jumentum tuum sum, quò occisò, te ipsum damnificabis, & utili obsequio meo privabis? & ecce! quem *nec Angelus, visibili specie apparens*, à proposito absterre-  
re, *nec miraculum loquentis asinæ, ad rationis tramitem poterat revocare*, dum audit: *utilitati suæ* occisionem bestię repugnare, eam *ex tunc* mitiùs incipit tractare. Statimque aperti sunt oculi ejus, & *vidit Angelum stantem in via.* *ibid. v. 31.* O maledicta habendi, & possessa conservandi cupiditas! quanta efficis mala! quanta impedis bona! quàm efficaciter persvades hominibus, quæ, te seclusa, nec ipse persvasisset Diabolus.



III. Quia Avaritia, majorem quam alia scelera relationem habet ad infernum, eique prorsus similis existit: quæ, non secus ac infernus, nunquam dicit: *sufficit*. Huic ergo dum locum in corde damus, & eam initio non domamus, illa sensim cum annis crescit, &, nisi in inferno, terminari nescit. Quod ipsi quoque Gentiles aliquomodo observasse videntur, qui DEO Avaritiæ, infernum pro domicilio, assignârunt.

## MEDITATIO XXIX.

### *De vitio Luxuriæ.*

Peccatum Luxuriæ:

- I. *Est peccatum turpissimum*, quod, si reveletur, pudore suffundit hominem, quantumvis impudentissimum.
- II. *Est peccatum communissimum*, quia carni nostræ acceptissimum.
- III. *Est peccatum periculosissimum*, quia emendatu difficillimum.

Fructus.

## Fructus.

*Pepigi fœdus cum oculis meis, ut nè cogitare quidem de Virgine. Job. 31. v. 1.*

Non solum *proximas*, sed etiam *remotas occasiones* hujus sordidissimi, & periculosissimi vitij, diligenter vitabo, & corporis mei sensus pro posse frænabo. *Pater noster. Ave Maria.*

*Lectio spiritualis.*

**P**Rotoparentem nostrum Adamum, absque peccati fomite in statu innocentiae creatum, & copiosissimis naturæ ac gratiæ donis vallatum, atque in Paradiso terrestri à DEO ipso collocatum, amor *fœminæ ab indè ejecit*, dum nolens blandientem contristare, oblatum ab ipsa pomum nescivit recusare, & svadente ipsa, præsumpsit manducare. *Gen. 3. v. 6.* Qui idem inordinatus amor, *impuro insuper junctus amor*, majorem etiam posteritatis ejus partem hodie dum usque cœlo excludit, & in infernum detrudit. Idque triplici potissimum de causa.

I. Quia, ejuscemodiamor, seu peccatum *Luxuriæ*, est unum ex tribus universalissimis vitijs, quibus totus scatet terrarum Orbis; juxta illud: 1. *Joan.* 2. v. 16. *Omne, quod est in Mundo, concupiscentia carnis est*, id est: *Luxuria*, & *concupiscentia oculorum*, id est: *Avaritia*, & *superbia vitæ*, seu: *Arrogantia*. Inter quæ, concupiscentia carnis primo nominatur loco, quia primatum in eis obtinet, & plurimos perdit. Ut proinde S. Remigius in cap. 1. *Epist. ad Rom.* indubitanter dixerit: *Demptis parvulis, paucos propter hoc vitium salvari.*

II. Quia, facillimus in illud est descensus: eò, quòd, ut suprà citatus ait S. Remigius: *hæc pestis*, seu potius propensio in illam, *connaturalis nobis sit.*

III. Quia, valde difficilis ab eo est regressus; juxta illud *Lucæ* 14. v. 20. *Uxorem duxi, & ideo non possum venire.* Ubi quidem, *Uxoris nomine*, status Matrimonij nequaquam reprobat, nec ejusdem licitus usus aliquatenus damnatur, maxima tamen vis obscenæ libidinis, & diffi-

*difficillima ab ea ad DEUM conversio*,  
 clarè satis indicatur. Quam proinde  
 S. Paulus, non solùm inter miracula re-  
 ferre, sed & miraculis ipsis videtur an-  
 teferre : dum, *ad Hebræos* II. v. 31. post  
 recensita varia, & prorsus stupenda  
 prodigia, mediante fide perpetrata, tan-  
 dem ait : *fide Rahab meretrix non periit*  
*cum incredulis, excipiens exploratores cum*  
*pace.* Quasi dicat : non solùm fides stu-  
 penda opera causavit in Abraham, Isaac,  
 & Jacob ; *sed insuper* ( quod magis mi-  
 randum ) *etiam meretricem Rahab sal-*  
*vam fecit.* Statimque subjungit : *Et quid*  
*adhuc dicam ?* *ibid.* v. 32. quasi ulteriora  
 verba eum deficerent, nec in commen-  
 dationem fidei majus miraculum addu-  
 cere posset : quàm, quòd etiam mere-  
 tricem, *vitio carnis assuetam*, convertere  
 potuerit, & salvare. Ergo principijs  
 obsta mi Christiane, & hominem æquè  
 fragilem te esse sciens, à quo, ut ait Au-  
 gustinus, *humani nihil sit alienum*, non  
 modò proximas, sed & remotas, hujus  
 periculosissimi vitij fuge occasiones,

*fuge fornicationem 1. ad Cor. 6. v. 18. ne  
infigaris in hoc limo profundi. Ps. 68. v. 3.  
ex quo, de mille vix emergit unus, & de  
multis millibus, vix salvatur unus.*

## MEDITATIO XXX.

### *De vera Pœnitentia.*

Pœnitentia vera:

- I. Debet esse sincera: *delictum meum  
cognitum tibi feci: & injustitiam me-  
am non abscondi. Ps. 31. v. 5.*
- II. Sufficiens: *facite ergo fructum dig-  
num Pœnitentiæ. Matth. 3. v. 8.*
- III. Seria: quæ non modò peccata de-  
inceps vitet, sed etiam occasiones,  
*seu vias ad illa, imposterum decli-  
net: odivi omnem viam iniquitatis.  
P. 118. v. 104.*

Fructus.

*Misericordias Domini in æternum cantabo.  
Ps. 88. v. 1.*

Et gratias agam infinitæ DEI bonita-  
ti, quæ tempus pœnitentiæ mihi con-  
cessit,



cessit, quod tot alijs negavit. *Pater noster. Ave Maria.*

## *Lectio spiritualis.*

**V**alde pauci inveniuntur, qui candorem innocentiae baptismalis, toto vitae decursu, à fuligine præservent peccati mortalis: plurimis enim contingit, quod passim contingere solet corvis, qui albi quidem nascuntur, sed paulò post, toti nigri visuntur. Et tamen indubitanter dixit, magnus Ecclesiae Doctor, Sanctus Ambrosius: lib. 2. de Pœnit: *facilius inveni, qui innocentiam servavit, quam qui congruè pœnitentiam egerit.* Hujus autem terribilis asserti triplex potissimum ratio reddi potest.

I. *Quia, ad veram, seu congruam, Pœnitentiam plura requiruntur, quorum vel uno deficiente, pœnitentia coram DEO non subsistit.* Hinc, quamvis Saul, posteaquam contra DEI præceptum percussit Agag Regi Amalec, & ob hoc peccatum à Samuele redargutus fuisset, de illo pœnituerit, 1. Reg. 15. v. 24. tamen

tamen remissionem peccati sui non obtinuit. Quamvis *Antiochus*, de peccatis in *Jerusalem* perpetratis vehementer doluerit, & à DEO multis lacrymis veniam exoraverit, tamen de illo scriptum reperitur : *Orabat autem hic sceleratus Dominum, à quo non esset misericordiam consecuturus.* 2. *Mach.* 9. v. 13. Quamvis plerique Christianorum, priusquam ab hac vita discedant, de peccatis suis pœnitentiã agere videantur, & raro aliquis absque præviam peccatorum suorum confessione moriatur; probabile tamen est: *etiam ex his, plures damnari, quàm salvari.*

II. Quia, veram de peccatis pœnitentiam agere, & omnia ad eam requisita condignè præstare, non est tam facile, uti plerique sibi imaginantur; qui, eò pœnitendi modò, sibi ab Omnipotente DEO veniam pollicentur, quò, nec à vilissimo homine eam obtinerent. Quamvis enim *Publicanus* ille, *Lucæ* 18. v. 13. pauculis hisce verbis: *DEUS propitius esto mihi peccatori;* quin imò *Rex David,*  
unico

unico propemodum verbo; *peccavi Domino*, veniam à DEO impetraverit.

2. *Reg: 12. v. 13.* quantum tamen verbum illud ponderaverit, & quantam efficaciam in se habuerit, continua totius subsequenti vitæ ejus pœnitentia, satis declaravit.

III. *Quia, vera de peccatis pœnitentia, quæ, juxta modò dicta, per se quidem difficilis, attamen, gratia DEI adjuvante, cuius est possibilis, nonnullis, Diabolicâ delusione deceptis, prorsus videtur impracticabilis.* Unde, si eis, qui ob nimiam negligentiam pereunt *præsumendo*, adjungantur illi, qui, Diabolicô astû delusi, intereunt *desperando*: paucissimi repertiuntur, qui singula ab eis requisita toto corde præstent, *verè pœnitendo*.

## MEDITATIO XXXI.

### *De dilatione Pœnitentiæ.*

Peccavi. Ergo: *aut pœnitere debeo, aut perire.* Ego autem; pro eo, ut de  
priori-

prioribus peccatis meis pœniteam, *soli  
spei futurae pœnitentiae nixus*, nova peccata  
in dies committo: & de his pœnitentiam  
agere, de die in diem differo.

Cùm tamen ignorem:

- I. Num tempus pœnitendi deinceps  
habebo?
- II. Num si tempus habuero, pœnitebo?
- III. Num si pœnituerò, in bono finaliter  
perseverabo? Præsertim: cùm  
peccata *multiplicare*, & pœnitentiam  
*procrastinare*, sit habitus malos augere,  
& relapsum facilitare.

Fructus.

*Hodie si vocem ejus audieritis, nolite obdu-  
rare corda vestra. Ps. 94. v. 8.*

*Surgam, & ibo ad Patrem meum. Lucæ  
15. v. 18. hoc est: adibo Confessarium me-  
um, & sinè ulteriori dilatione, rationes  
meas cum DEO componam. Pater nos-  
ter. Ave Maria.*

### *Lectio Spiritualis.*

**P**Eccator: qui pœnitentiam, quam  
*statim agere posset, differt in crasti-*  
*niam,*

*num*, similis est pertinacissimo Pharaoni, qui interrogatus à Moyse, quando vellet liberari à ranarum plaga? *respondit: cras. Exodi. 8. v. 10.* dum liberari potuisset *statim*. Quàm stulta autem, & simul quàm periculosa sit ejusce-modi procrastinatio, tres sequentes ostendunt rationes:

I. *Quia*, tales procrastinatores, dum *pœnitentiam de die in diem differunt*, *gratiam pœnitendi plerumque amittunt* Nescit enim tarda molimina, inquit S. Ambrosius lib. 2. in Lucam. Sancti Spiritûs gratia.

II. *Quia*, *pœnitentiam differentes*, & *præsentem gratiam recusantes*, *utrum alio tempore illam iterum sint adepturi*, & *pœnitentiæ tempus deinceps habituri*, *prorsus ignorant*. Præsertim cùm scriptum sit: Spiritus, id est: gratia Sancti Spiritûs, ubi vult spirat: & vocem ejus audis, sed nescis unæ veniat, aut quò vadat. Joan. 3. v. 8. seu, quando iterum spirare intendat. Unde Christus Dominus, ju-  
veni illi, qui eum sequi quidem volebat,  
sed



sed prius Patrem defunctum sepelire parabat, respondit: *sequere me, & dimitte mortuos sepelire mortuos suos. Matth. 8. v. 22.* Alteri autem, prius domesticis valedicere volenti, expressè dixit: *nemo mittens manum suam ad aratrum, & respiciens retrò, aptus est Regno DEI. Luca. 9. v. 62.* certissimè de utroque prænoscens: quòd, nisi *absque omni dilatione* præsenti gratiæ statim cooperarentur, & vocantem illicò sequerentur, *similem gratiam deinceps non consequerentur.*

III. *Quia, quo diutius pœnitentia differtur, eo difficilior evadit.* In cujus rei figuram Sunamitis illa, quæ defunctum filium suum à Propheta Eliseo resuscitari cupiebat, *festinanter* ad Prophetam se conferebat, mandans servo suo ductori: *mina & propera, nè mihi moram facias in cundo. 4 Reg. 4. v. 24.* Et ipse etiam Eliseus, ad suscitandum puerum iussit Giezi famulum suum *properare*, & nè detineretur in via, obviantes prohibuit salutare, *ibid. v. 29.* quin & Christus ipse, *cui quidem difficilius non fuit*

*fuit quatrIduanum Lazarum suscitare, quàm recens mortuum Viduæ Filium ad vitam revocare, tamen, ut ostenderet, peccatorem: quem uterque mortuus figurabat: diutius in peccatis hærentem, ab hac morte spiritali, ad vitam gratiæ difficilioris revocari; filium Viduæ facilius, Lucæ 7. v. 14. Lazarum, spectatis circumstantijs, & ad apparentiam, resuscitavit difficilioris. Ioan. 11. v. 43. Ergo non tardes, converti ad Dominum, nec differas de die in diem. Eccles. 5. v. 8. sed appropinquare celeriter throno gratiæ ejus, qui appropinquantes ad se peccatores recipit. Lucæ 15. v. 1. & 2. appropinquare autem nolentes, in tempore vindictæ disperdit. Eccles. 5. v. 9.*

## MEDITATIO XXXII.

*De morte, & incertitudine illius.*

*Lata est sententia: certò moriar. Statutum est Hominibus semel mori.  
ad Hebræ. 9. v. 27.*

I. Sed nescio *quando* : possum mori *hac hora*.

II. Nescio *ubi* : possum mori *in hoc loco*.

III. Nescio *quomodo* : possum mori *in hoc peccato*. Et tamen pecco *tam audacter*, reincido in priora peccata *tam faciliter*, nec vito *occasiones* peccandi. Quæ ergo est Fides mea ?

Fructus.

*Vigilate itaque, quia nescitis diem, neque horam. Matth. 25. v. 3.*

Quoties peccandi occasio se mihi obtulerit, ita me ipsum alloquar : *quid fieret de me, si factô hõc peccatô vitam finirem ? Pater noster. Ave Maria.*

### *Lectio spiritualis.*

Cùm die quodam, S. Propheta Amos, per visum conspexisset uncinum pomorum, nec sciret, quid uncinus ille denotare deberet, Divino instructus oraculo intellexit : uncinum illum significare mortem : *Venit finis super populum meum. Amos 8. v. 2.* Hæc tamen visio,

fio, non erat adæquata mortis repræsentatio, sed solummodo quoad eam partem ejus repræsentatio fuit, quâ parte, mors omnibus est *æqualis*, & supremos æquè ac infimos, arboris vitæ colligit fructus, *æquo*, ut ait Horatius, *pulsans pede pauperum tabernas, Regumque turres*. Quoad alteram autem partem, quâ maximè est *inæqualis*, hoc symbolo adumbrata non fuit. Qui enim, ope uncini poma collecturus, intrat pomarium: immaturos fructus non decerpit, sed sinit eos maturescere: solos interim maturos colligens; aut, si quò casu, etiam immaturos colligat, floribus saltem parcit. Mors verò, non tantum fructus immaturos præ maturis, sed & juventutis flores, præ fructibus maturæ senectutis, colligere solet. Juxta illud *Cant: 2. v. 12. flores apparuerunt in terra nostra, tempus putationis advenit*. Hæc enim:

I. Crudelis illa bellua est: quam Habacuc Propheta *ambulantem*, Christi; resurgentis triumphum, *quasi fractis*

*cruribus, lentô passu præcedentem, mirabatur. Ante faciem ejus ibit mors. Habacuc 3. v. 5.*

II. Hæc ipsa est : quam S. Joannes Evangelista in Apocalypsi sua *equitantem* se vidisse testatur : & ecce ! *equus pallidus* : & qui sedebat super eum, nomen illi mors. Apoc. 6. v. 8.

III. Hæc denique ipsissima est : quam, *gladium volentem*, appellat ipse DEUS Ezech. 32. v. 10. Nullam gressûs æqualitatem servat ; sed his *ambulat*, alijs *equitat*, alijs *volat*. Hos *celerrimè* ipso vitæ exordio, & propè eadem qua nascuntur hora ; alios *tardiùs*, medio quasi in cursu ; aliquos autem *tardissimè*, ac non nisi in ultima senectâ, assequitur. In hoc uno semper *æqualis*, quòd omnibus sit *inæqualis*, & prorsus incerta.

## MEDITATIO XXXIII.

### *De nuncio Mortis.*

Si non fuero mortuus morte repentina : nunciabitur mihi, *aliquando graviter*



*viter agrotanti, instantis mortis periculum; &, ut me ad bene moriendum disponam, admonebor.*

- I. Sed, *habebóne tunc tempus confitendi?* dum vix loqui licebit, præ doloris magnitudine?
- II. *Poteróne tunc ante actam vitam meam examinare?* dum vix me ipsum capiam, præ timoris multitudinem?
- III. *Habebóne animum verè pœnitendi?* multiplici afflictus intricatæ conscientiae amaritudine? O mi DEUS! quid ergo faciam?

Fructus.

*Dum tempus habemus, operemur bonum.*  
*ad Galat: 6. v. 10.*

Id, ô anima mea, nunc faciam, quod *tunc*, me *nunc* fecisse vellem. Id est: hodie adhuc faciam confessionem generalem vitæ meæ, & impofterum Christianè magis vivam, in his N. N. me specialiter emendando. *Pater noster.*  
*Ave Maria.*

## Lectio Spiritualis.

Quàm difficile sit peccatorem moribundum converti ad DEUM, declarat latronis ad latus Christi (*pro ipso sanguinem actu fundentis*, & inter tanta prodigia in cruce *actu morientis*) obstinatio, & damnatio. Quàm pauci autem eam difficultatem, *in mortis articulo constituti*, superent : & *veram ac sinceram* de peccatis pœnitentiam agant : indicat alterius latronis *insolita absolutio* ; quam ei, *non in forma ordinaria*, uti alijs passim peccatoribus. *Matth. 9. v. 2. Lucae 7. v. 48. Joan. 8. v. 11 &c.* sed *speciali cum energia*, elargitus est Christus, dicens : *Amen dico tibi : hodie mecum eris in Paradiso. Lucae 23. v. 43.* Quasi innuere voluerit : quamvis *non impossibile*, adeò tamen *rarum*, & *penè incredibile* esse, peccatorem : qui *sanus pœnitere noluit*, in mortis articulo jam constitutum, tunc *primò, verè de peccatis pœnitere*, ut ad faciendam hujus rei fidem : *singulari planè asssecuratione opus fuerit.* Idque triplici potissimùm de causa. I. Quia

I. *Quia, rarissimè fallit regula, quotidiana experientiâ comprobata, & à S. Bernardo, ser: 28. in parvis, universaliter stabilita: Qualis vita, finis ità.*

II. *Quia, ordinariè, ut ait S. Augustinus, serm: 3. de innoc: Percutitur hac animadversione peccator, ut moriens obliviscatur sui, qui dum viveret, oblitus est DEI.* Contingitque illi, quod infelicissimo contigit Absoloni, qui tametsi *ad latus suum gladium haberet*, quo capillos re secare, & se ipsum de Quercu poterat liberare, in illis tamen angustiis, gladio suo debitè *uti oblitus fuit*, & ità, pendulus remanens, occubuit deprehensus à Joab. 2. Reg. 18. v. 14. Simili enim modo peccator, in articulo mortis constitutus, tametsi *gladium pœnitentiæ arripere*, & illo bene utendo, contra Diabolum victoriam adhuc reportare posset: plerumque tamen, *terrore imminuentis mortis stupefactus, gladio hoc uti obliviscetur*, aut certè, tam perfunctoriè utetur, ut in ea ultima pugna, semel pro semper, à Diabolo superetur. Quod confirmans

S. Psalmista David *Pf. 6. v. 6.* ait: *Quoniam non est in morte qui memor sit tui,* quasi dicat: *in mortis articulo,* nec tui Domine, nec sui ipsius: sed aliarum prorsus rerum ordinariè recordatur homo; videlicet: *desolata Uxor,* quam viduam relinquit; *filiorum,* quos Orphanos deserit; *divitiarum,* quas ei mors eripit; *commoditatum vite,* quibus valedicere debet, &c. Aut cum illo Juvene *4. Reg. 4. v. 19.* identidem exclamat: *caput meum dolco, caput meum doleo.* Aliud nec dicere, nec cogitare valens.

III. *Quia, tantum abest: ut qui malus erat vivendo, bonus fiat moriendo;* ut potius præsumi debeat: eum qui *malus* fuit vivendo, *pejorem* evasurum moriendo. Exemplum habemus in suprà memorato sinistro latrone, qui: pro eo, quòd moriturus converti debebat ad Christum, ipse obstinator factus, blasphemabat Christum. *Luca 23. v. 39.* Et in parabola de villico, qui dissipaverat bona Domini sui, &, quasi in articulo mortis constitutus, rationem villicationis

nis suæ reddere iussus : *redde rationem villicationis tuæ : jam enim non poteris villicare.* Luca 16. v. 2: pro eo, quòd iniquitatem suam debebat deplorare, multiplicata fraude, eandem præsumpsit cumulare. *ibid.* v. 6. & 7. Ut proinde non immeritò dixerit, magnus Ecclesiæ Doctor S. Hieronymus: *vix ex centum millibus hominum, quorum mala fuit vita, in Morte Divinam indulgentiam, obtinebit unus.*

## MEDITATIO XXXIV.

### *De statu Moribundi.*

- I. *Præterita* eum affligunt. Tanta peccata, de quibus, num sufficientem pœnitentiam egerit, *ipse nescit.*
- II. *Præsentia* eum contristant. Tanta pericula, quæ quomodo evadat, *non videt.*
- III. *Futura* eum terroribus replent. In limine æternitatis se constitutum cernit, quæ, num felix, num infelix sibi futura sit, *prorsus ignorat.*



## Fructus.

*Omors! bonum est iudicium tuum. Eccles.*

*41. v. 3.*

Nunc ego doce me, Mundum, & vanitates ejus, non curare; soli que DEO, qui decipere nescit, fideliter servire.

*Pater noster. Ave Maria.*

*Lectio Spiritualis.*

**A**D eludendam Cauponum calliditatem, communis per Italiam consuetudo obtinuit: viatores Italos, de ferculorum sibi in diversorijs apponendorum pretio, ante eorum degustationem pacisci; & siquidem iusto offerantur, ea acceptare: sin minus, alia levioris pretij postulare; atque ita, absque nimiae exactionis periculo, hilares manducare, & è caupona securos migrare. Quem morem, si omnes viatores Christiani in diversorio hujus Mundi observarent, profecto, vanitatibus ejus non adeò inhiarent, nec oblatas voluptates faciliè acceptarent; quin potius, cum Demosthene, à meretrice sollicitato, exclamantes:

clamantes: *non emo tanti pœnitere!* illas omnimodè repudiarent; & ità, in mortis articulo, sine timore è caupona hujus Mundi securi migrarent. Adverte-  
rent enim:

I. *Omnia hæc instabilia esse*, & nullius prorsus momenti; quorum vanitatem, & momentaneitatem, nec ipse Diabolus celare valens, ea, *Luca 4. v. 5. ostendit --- in momento*, & nè diutiùs, seu diligentius, considerata spernerentur: *unico videri voluit momento*. Ipsa enim, falso splendore, oculos hoc momento decipiunt, & simul, quasi ipso momento, jam non esse incipiunt. Aman lætus cum Rege epulatur, & è loco convivij repentè ejectus, post paucula momenta, jubente Rege, suffocatur. *Ether. 7. v. 10. hodie, Hosanna filio David, benedictus qui venit in nomine Domini. Matth. 21. v. 9. tota gratulabunda resonat Jerosolyma*, post pauculas autem dies: *crucifige crucifige eum. Joann. 19. v. 6. tota peristrepit Synagoga, &c.*

II. *Esse felicitates tantùm somnias, &*  
nec

nec ad momentum revera tales. In cuius rei figuram : Nabuchodonosor per somnium vidit statuam, cuius caput aureum, gloriam Regni ejus designabat, *Daniel. 2. v. 37. & 38. Sed hoc somnium erat,* inquit S. Ambrosius, libro de Joseph, & *omnis potentia sæculi somnium, non veritas est.* Cui etiam subscribens S. Augustinus, ait : *Omnes felicitates, quæ videntur, sæculi, somnia sunt dormientium, & quemadmodum qui videt thesauros in somnijs, dormiens dives est, sed evigilabit, & pauper erit ; sic omnia ista vana hujus sæculi, de quibus homines gaudent, in somno gaudent, evigilabunt autem quando nolent, si non modo evigilant quando utile est, & invenerint somnia illa fuisse, & transiisse.* Juxta illud *Pf. 75. v. 6. Dormierunt somnum suum : & nihil invenerunt omnes viri divitiarum in manibus suis.*

III. *Omnia hæc valde carò constituta, utpote, quæ, in mortis articulo, ingentes angustias sunt causatura, & nihilo minus æternā pœnam allatura : quam Divina Justitia, certò certius, peccatori est*

est inflictura, quæ nullum peccatum  
impunitum est relictura.

## MEDITATIO XXXV.

### *De ultimo momento vitæ.*

- I. *In illo momento*, separabitur anima à corpore, & corpus à delicijs hujus Mundi.
- II. *In illo momento*, cessabunt honores, divitiæ, amici.
- III. *In illo momento*, possum æternum damnari. Si hoc ipsum, in quo hæc recogito, ultimum esset vitæ meæ momentum, quid fieret de me?

#### Fructus.

*Beati mortui, qui in Domino moriuntur. Apoc. 14. v. 13. Illi nempe sunt beati: qui mortui moriuntur. Illi, qui priusquam moriantur, moriuntur; qui, priusquam corpore moriantur, jam corde mortui sunt Mundo, & vanitatibus ejus. Qui S. Pauli 1. ad Corint. 7. v. 31. monitum sequen-*

sequentes : ità *utuntur hoc Mundo, tanquam non utantur.* Tu autem, ô anima mea, quomodo hoc Mundo huc usque usa es? quæ, tam inordinato affectu, his N. N. Mundi deliramentis adhæsisti.  
*Pater noster. Ave Maria.*

### *Lectio spiritualis.*

*M*ortem, seu ultimum momentū vitæ humanæ, *omnium terribilium terribilissimum esse*, Aristoteles universaliter pronuntiavit : qui inter bonam mortem bonorum, & malam mortem malorum, distinguere nescivit. Nos autem : *Fide Divina illuminati*, inter agone in Justorum, & exitum peccatorum discernentes, *mortem quidem malorum*, omni ex parte horribilem non negamus, *finem autem Justorum*, haud terribilem autumamus : quin vitam potiùs, quàm mortem nominari, & votis omnibus exoptari debere, putamus. Unde non immeritò S. Mater Ecclesia, diem mortis Sanctorum, passim vocat *natalem eorum*, & Psalmista David, *solos*  
*impios*



*impios morituros innuit : dum obtenta peccati sui venia à DEO justificatus, atq; hoc ipso è numero moriturorum se exemptum ratus Ps. 117. v. 17. ait : Non moriar, sed vivam: & narrabo opera Domini. Quin imò S. Paulus Apostolus, beatam mortem Justorum, non modò horrore & amaritudine carere, aut vitam potiùs, quàm mortem appellari oportere: sed & vitæ ipsi præferri debere putabat, dum hanc præ illa exoptando, suo, & omnium Justorum nomine, identidem repetebat: mihi enim vivere Christus est, & mori lucrum. ad Philip. 1. v. 21. Hæc ergo Justorum ut & nobis obtingat beata sors, & nè tunc, cùm de hoc Mundo discessuri: modicum, & jam non videbitis me. Joan. 16. amicis nostris sumus dicturi, mala malorum nos perterreat mors; tres industrias in tempore adhibeamus.*

*I. Sobriè, & justè, & piè, vivamus in hoc seculo. ad Tit. 2. v. 12. Frustra enim mortem expectat piorum, inquit: moriatur anima mea morte justorum. Num.*

23. v. 10. qui, cum perverso Balaam, vitam vivit peccatorum.

II. *Vanitatibus Mundi cor non apponamus: juxta illud Ps. 61. v. 11. Divitiæ si affluant, nolite cor apponere.* Nè alioquin nobis contingat in Morte, quod Propheta Baruch, in persona Mundi, de ejusdem amatoribus cap. 4. v. 11. ait: *nutrivi enim illos cum jucunditate: dimisi autem illos cum fletu & luctu: exclamantes, & suspirantes: siccine separat amara mors.* 1 Reg. 15. v. 32. Non enim deferi potest absque dolore, quod possidetur cum amore.

III. *Mortis nunquam obliviscamur: sed præ oculis eam habentes, & quasi continuo morientes: morte mortem impugnemus, & usu perpetuo aculeum ejus hebetemus, donec eam perfecte vincamus, &, ad nocendum nobis, impotem reddamus.*

## MEDITATIO XXXVI.

## *De statu corporis post mortem.*

- I. Imaginabor mihi, me, post mortem meam, contemplari corpus meum.
- II. Et ecce ! Pallidum, squalidum, & deforme jacet cadaver. Nec videt, nec audit, nec loquitur : finè comite solum, & ab omnibus derelictum.
- III. Nè foetore suo inficiat domum, ad locum defertur sepulturæ, ubi, terrâ obrutum, vermibus traditur consumendum. *Et hoc ipsum vile corpus, ego tam delicatè tractabo, & ob ejus comoda, DEI legem violabo ?*

### *Fructus.*

*Concidit cadaver tuum : subter te sternetur tineæ, & operimentum tuum erunt vermes. Isaia 14. v. 11.*

Hodie me ad aliquam, sepulturæ fidelium destinatam Ecclesiam, data opera conferam : ibiq; salutato priùs SS. Eucharistiæ Sacramento, obvium considerans sepulchrum, corpus meum in

K

hæc

hæc verba attentè alloquar: *Simile, ô corpus meum, te expectat domicilium, ut in eo putrescas, vermium esca. Pat. nost. Ave M.*

## *Lectio spiritualis.*

**S**apientissimus Magister noster Christus, cæcum illuminare volens, *linxit lutum super oculos ejus, Joan. 9. v. 6.* ut nos doceret: nihil æquè cæcitati humanæ mederi, ac *sordidissimum lutum*, in quod moriendo resolvemur. Hoc enim quàm primùm, permodum spiritualis emplastri, oculis suis admovet, & attentâ consideratione perpendit homo, protinus videre incipit, quæ nec vidit defacto, nec vidisset deinceps. Intuetur enim:

I. *Omnia, quæ Mundus habet, & quæ in eo pretiosa putantur, lutea esse, ac in morte evanescere omnia; nec magis æstimari debere, quàm ea æstimaverit S. Paulus, qui ad Philip. 3. v. 8. ajebat: Omnia --- arbitror ut stercora, ut Christum lucri faciam.*

II. Cum ipsa vita finiri honores, & inge-

ingenitæ nobilitatis præstantiam, juxta illud *Pf. 29. v. 10. Quæ utilitas in sanguine meo, nobili, dum descendero in corruptionem?*

III. *Omnem, quantumvis maximam, amicitia Mundanam, non durare nisi usq; ad mortem: & ex tunc, nullius effectam momenti, ad ostium terminari monu- menti.* Id enim, clarè satis innuit, ipse Christus, qui, dum de morte Lazari ob- scurioribus verbis loqueretur, eumq, non mortuum esse, sed tantum dormire diceret: amicū appellabat: *Lazarus amicus noster dormit. Joan. II. v. II.* Ast ubi non jam ob- scuris, sed clavis, & à Mundo intelligibilibus verbis, revera mortuum ajebat: non am- pliùs amicū, sed tantum Lazarum sim- pliciter nominabat: *Lazarus mortuus est. ibid. v. 14.* Talis enim est amicitia Mundana: *quandiu aliquis vivus puta- tur, & nondum mortuus, sed tantum dor- miens existimatur: tam diu solitis obse- quijs honoratur, & inter amicos numera- tur.* Quàm primùm autem revera mor- tuus intelligitur, omnis amicitia finitur.



Ut proinde non immeritò, in persona  
 cujuslibet defuncti, lamentetur S. Da-  
 vid Ps. 30. v. 13. & 14. inquit : *Oblivi-  
 oni datus sum, tanquam mortuus à corde.  
 Factus sum tanquam vas perditum.* Quasi  
 dicat : Quemadmodum si vas aliquod,  
 valde elegans, in convivio frangatur, ab  
 omnibus quidem recumbentibus super  
 eo conclamatur, & quilibet de eo fracto  
 lamentatur : postquam autem in cloa-  
 cam ejectum fuerit, nemo amplius illi-  
 us recordatur ; ità : *dum quispiam à mor-  
 te exanimatur*, communi ejulatu fractū  
*vas, seu perditus amicus*, deploratur ;  
 quàm primùm autem *sepulchro* injectus  
 fuerit, *à nemine amplius curatur*, & quasi  
 non modò non amicus, verùm etiam  
 nec notus fuisset, oblivioni ab omnibus  
 datur.

## MEDITATIO XXX VII.

*De universali resurrectione  
 corporum.*

Ad clangorem tubæ Angelicæ :

- I. Resurget hoc corpus meum.
- II. Cui reunietur, aut beata, aut damnata, anima mea.
- III. Ut cum ea, immortale sit & corpus.

Fructus.

*Oportuit pati Christum, & ita intrare in gloriam suam. Lucae 24. v. 26. Regnum caelorum vim patitur. Matth. II. v. 12.*

Si ergo, ô corpus meum, cum anima tua, beatam tibi exoptas immortalitatem, & infelicem declinare cupis æternitatē : nunc ab illicitis abstine voluptatibus, & hæc N. N. omni conatu evita. Sustine quæso suave jugum Christi, ut impassibile sis in æternum. *Pat. nost. Ave Mar.*

## *Lectio Spiritualis.*

**A**Rcanô Divinæ Sapientiæ consiliô, nec omnes divites, nec omnes nobiles, nec omnes nascimur Domini. Sed ipse, id est : DEUS, dedit quosdam quidem Apostolos, quosdam autem Prophetas, alios verò Evangelistas, alios autem Pastores, & Doctores. *ad Ephes. 4. v. 11, eâ dexte-*

ritate dona sua *dividens singulis prout vult.* 1. *ad Cor.* 12. v. 11. ut nec accipiens, de *gratis* acceptis, vallet gloriari, nec nō accipiens, de *non acceptis*, possit querulari. Idq; triplici potissimū de causa.

I. Quia ille, qui, DEO sic disponente, alijs major factus est, *naturaliter talis nascendo*, minor fieri potest, culpā suā, *supernaturaliter alius resurgendo.* Et qui *minor fuit in prima generatione*, major, virtute suā, *evadere potest in futura regeneratione*: ubi non ampliū filij casuum fortuitarum, sed *filij erimus operum nostrorum*, tales tunc comparituri, quales nunc sumus victuri.

II. Quia humilitas fortuitæ nativitatīs, augmentum potiū, quā decrementum habet, sinceræ felicitatis; dum quilibet, obscuris licet ortus natalibus, virtute propriā altiū valet eluctari, quā à fortuna, in hoc Mundo, potuisset exaltari; atque hoc ipso, per totam æternitatem, *tantò solatiosius* gradum suum possidebit, *quantò evidentiū*, non à cæca fortuna sibi donatum, sed  
me-

merito virtutis suæ comparatum, eum videbit.

III. Quia obscuritas temporalis nati-  
vitatæ, non obscurat opera meritoria  
æternæ claritatæ; quin potius, tantò ma-  
gis reddere videtur stupenda, quantò  
minus à subjecto obscuro erant speran-  
da. Si enim *nobiliter natus*, in futura  
regeneratione, *nobilis fuerit resuscitatus*:  
censebitur quidem nobilitate sua dig-  
nus, generosum, ac verè nobilem ani-  
mum in nobili corpore gessisse, & ob  
id ipsum plurimum laudis promeritus  
fuisse: si autem *filius hominis Plebei*, in  
corpore non nobili, nobilem servans  
animum, meritò suò, *resurrexerit filius*  
*DEI*, id fortè magis stupebit omnis  
creatura, eaque sic resurgentis major  
gloria est futura.

## MEDITATIO XXXVIII.

*De separatione reproborum  
ab Electis.*

In præfenti vita, mali convivunt bonis,  
& post mortem invicem permixti  
tumulantur. Ast, extrema rebus om-  
nibus illucescente die, tota repente  
mutabitur scena : *Exibunt enim An-  
geli, & separabunt malos de medio Justo-  
rum. Matth. 13. v. 49.*

- I. *A dextris stabunt Electi*, & forsitan hi  
ipsi : quos ut stultos contempfi.
- II. *A sinistris stabunt reprobi*, & forsitan  
hi ipsi : cum quibus sæpius peccavi.
- III. *Ego autem ubi ?*

Fructus.

*Ecce! ego mittam Angelum meum, qui præ-  
cedat te, & custodiat in via; --- observa-  
eum, & audi vocem ejus. Exodi 23.  
v. 20. & 21.*

Ut igitur, in die illa tremenda, non à  
sinistris, sed à dextris colloceris ab An-  
gelis, Angelos cole, ô anima mea, &  
præsertim Angelum tuum custodem;  
quem cum magis colere non possis,  
quàm ejus inspirationibus obediendo :  
ea propter, bene tibi suadenti obediens  
esto, & audi vocem ejus. *Pat. nost. Ave M.*

*Lectio*



*Lectio spiritualis.*

Cùm die quodam S. Patriarcha Abraham, hostiam solemnem offerre volens DEO, victimam sacrificij divideret, & *partem unam à dextris, alteram à sinistris collocaret* : insolitus eum pavor repentè invasit, & assurgentibus præ horrore capillis, totus quasi ex animis factus, incidit in agoniam : *Horror magnus & tenebrosus invasit eum Gen. 15. v. 12.* Hujus autem tam excessivi horroris, si S. Augustino credimus, alia causa non fuit, quàm : *quòd per eam carnalis victimæ divisionem*, significaretur horribilis illa separatio in valle Josaphat aliquando facienda, dum scilicet : *exibunt Angeli & separabunt malos de medio Justorū. Matth. 13. v. 49.* & eos etiam, qui in hoc Mundo *cor unum, & caro una videbantur*, ab invicem segregantes, atque pro cujuslibet merito, à dextris vel sinistris locantes : separabunt Patrem à Filio, Fratrem à Fratre, Maritum ab Uxore ; seu : Abrahamum ab Ismaël, Cainum

ab Abel, Affverum ab Esther. Cur autem, sola hujus futuræ separationis adumbratio, tantū horrorem Abrahamo incusserit, triplex potissimū ratio reddi potest.

I. Quia, videbat illam esse incertam, *Quis enim cognovit sensum Domini? aut quis consiliarius ejus fuit? ad Rom. II. v. 34. Ipse scit, quos elegerit Joan. 13. v. 18. nos autem nescimus utrū amore, an odio digni simus. Eccles. 9. v. 1. & ideo cum metu & tremore nostram salutem operari debemus. ad Philip. 2. v. 12. per bona opera, quantum humanitus fieri potest, certam nostram vocationem & electionem facientes. 2. Petri 1. v. 10.*

II. Quia, sciebat illam esse æternam.

III. Quia, credebat, se, utpote Patrem-familias, alijs à DEO præpositum, majori salutis periculo esse expolitum. Quod etiam S. Paulus innuere volebat, qui, tametsi de sua prædestinatione certus esset, & ad Timotheum scribens indubitanter dixerit: *reposita est mihi corona justitiæ, quam reddet mihi Dominus in illa die*

*dic justus Judex. 2. Timoth. 4. v. 8. dum tamen, se alijs prælatum, & autoritate prædicationis à DEO meminit decoratum: multum sibi visus est timere, & omnem præcautionem diligentissimè voluit adhibere, dicens: castigo corpus meum, & in servitutem redigo: nè fortè, cum alijs prædicaverim, ipse reprobus efficiar. I. Corinth. 9. v. 27.*

## MEDITATIO XXXIX.

### *Designis Judicii Extremi.*

Signa Universale Judicium præcessura, fide indubia credimus: quia ea prædixit Christus.

**I. Erunt plurima:** Sol obscurabitur, Luna non dabit lumen suum, stellæ cadent de cælo, & omnis simul alterabitur creatura: arescentibus hominibus præ timore & expectatione, quæ supervenient universo Orbi. *Lucæ 21. v. 26. & Matth. 24. v. 29.*

**II. E-**

II. *Erunt inexpectata* : Dum Mundus de eis minimè cogitando, impudenti-  
us peccabit. *Quia dies Domini, sicut fur in nocte, ita veniet. 1. Tessal. 5. v. 2.*

III. *Erunt terribilia.* Quandoquidem & homines, & animalia, & Urbes, & totum, quà latè patet, terrarũ Orbem, voracibus consumet flammis deciduus è cœlo ignis. *2. Petri 3. v. 10.* O horrendũ spectaculum; quod creaturas omnes summò replebit terrore, sed nullum æquè, ac miserum peccatorem.

#### Fructus.

*Peccata tua Eleemosynis redime. Dan. 4. v. 24.* Jacob præmisit munera, ut placaret Esau. *Gen. 32. v. 18.* & ego Christum Judicem mihi placare conabor: munera per manus pauperum, eidem præmittens. *Pater noster. Ave Maria.*

#### Lectio Spiritualis.

Q Uamvis dies extremi Judicij, ad terrorem peccatorum, *dies Domini. Soph. 1. v. 14.* per antonomasiam appellatur.

letur. Eò, quòd in illa die : *speciali modo, revelaturus sit DEUS gloriam suam.* In qua tandem *videbunt peccatores, in quem transfixerunt.* Joan. 19. v. 37. & in quantum Dominum tela peccatorum suorum vibraverunt. *Maximam etiam ostensurus sit potentiam suam : tunc videbunt Filium hominis venientem in nube cum potestate magna.* Luca 21. v. 27. Et denique *ipse factururus sit voluntatem suam.* Qui nunc pœnitentiâ nostrâ subinde disarmatus, aut Sanctorum intercessionibus ligatus, vi promissionis suæ, *nostram facere debet voluntatem ; juxta illud : dimitte me, ut irascatur furor meus.* Exodi 32. v. 10. *Non dimittam te.* Gen. 32. v. 26. Hæc tamen, tremenda dies, paucissimos nunc terret peccatores : & quæ, non modò de somno vitiorum, innumeros olim excitavit dormientes, sed & plurimos in speluncis & antris, absq; somno vivos, quodammodo sepelivit pœnitentes ; nunc : quamvis eâdem, quâ olim, fide credatur ; nihil tamen miri in nobis operatur. Idque triplici potissimùm de causa. .

I. Quia



I. Quia, de hac tremenda die, nunquā seriò cogitamus. Sed, quasi per somnium, eam, *perfunctoriè* tantum, nobis repræsentamus; quam tamen, cœlestis Magister noster Christus, non sinè causa *Matth. 24. & Lucæ 21.* ità patheticè descripsit, ut ferè oculis videatur, & quasi præsens conspiciatur.

II. Quia, *longissimè* eam adhuc distare putamus, & jam de ea seriò cogitare, superfluum autumamus; cùm tamen Christus, non longè eam dixerit abesse, quin imò, jam quodammodo inchoatā declaraverit esse, inquiens: *nunc judicium est Mundi. Joan. 12. v. 31.* Eò, quòd peccata nostra, *præsens sint condemnatio nostra*, quæ, hoc ipso, quòd à nobis malè vivatur, *nunc pro tunc*, contra nos à Christo fulminatur.

III. Quia, si quando de ea seriò cogitamus, horrorem ejus quasi *inevitabilem*, & necessariò subeundum, nobis repræsentamus; cùm tamen horror illius possit vitari, & piè vivendo, *nunc pro tunc*, à nobis declinari.

# MEDITATIO

## XL.

### *Processus Judicij Extremi.*

Sacro-Sancta præcedente cruce, innumerâ cœlestium Spirituum sociatus catervâ, Apostolorum circumdatus coronâ, comitante se Beatissima Matre sua, vultu iratô, & ad ultionem injuriarum, sibi à peccatoribus factarum, severè compositô : comparebit in nubibus cœli, Christus Judex. Eique :

- I. *Ut creatori*, rationem reddere debebo, de tantis medijs salutis, quibus, aut non usus, aut abusus fui.
- II. *Ut Patri*, de tanto amore, cui non correspon-di.
- III. *Ut Redemptori*, de tanto sanguine pro me effuso, quem peccando conculcavi.

Fructus.

*Si nós met ipsos dijudicaremus, non utiq;  
judicaremur, 1. Cor. II, v. 31.*

Ho-

Hodie, & deinceps die quolibet, eâ, quâ par est, diligentia, examen conscientiae vesperi ante somnum institutam. In quo: posteaquam pro universis beneficijs totius vitæ, & præsertim illius diei, humiles DEO gratias egero: conscientiam meam diligentissimè excutiam; & de bene actis DEO gratias agam, de universis autem illius diei peccatis, offensionibus, & negligentijs meis, corde contritò, emendationem proponens, veniam petam. *Pater noster. Ave Maria.*

### *Lectio spiritualis.*

**I**Nter omnia Attributa Divina, nullû minus in præsentî sæculo cognoscit Mundus: quàm *Justitiam*; juxta illud. *Joan. 17. v. 25. Pater Juste, Mundus te non cognovit.* In futuro autem sæculo, cum *Dominus ad judicandum venerit*, rigorem Justitiæ ejus luculentissimè experiemur omnes. Dum:

I. Exactissimam rationem à nobis petet, *de omni cogitatione*, quia: *Spirituû*  
(hoc

(hoc est, cogitationum) ponderator est Dominus. *Prov. 16. v. 2. De omni verbo, quia: omne verbum otiosum, quod locuti fuerint homines, reddent rationem de eo in die Judicij. Matth. 12. v. 36. De omni opere, quia: tunc reddet unicuique secundum opera ejus. Matth. 16. v. 27. Et, assumpta bilance Ezechielis, omnem capillum dividet, ac ponderabit, ipsasque etiam justitias nostras, districtè judicabit. Ps. 74. v. 3. & nisi abundaverint plus quam Scribarum & Pharisaorum, insufficientes declarabit. Matth. 5. v. 20.*

II. De thesauro suo (sapientiæ, & scientiæ DEI. *ad Rom. 11. v. 33.*) proferet, nobisque ob oculos ponet, nova & vetera. *Matth. 13. 52.* hoc est: non modò recen-ter à nobis acta, quorum, utpote novorum, speciem retinemus factorum, sed & juventutis nostræ delicta, quorum, utpote antiquorum, jam non recordamur gestorum.

III. Scrutabitur Jerusalem in lucernis. *Soph. 1. v. 12.* omnesque circumstantias, sequelas, & caudas peccatorum dili-

gentissimè perquiret, & pro modo culpæ, justissimam cuilibet pœnam infliget. Eritque tunc diluvium illud grande, de quo vaticinabatur David *Pf. 31. v. 6.* inquit : *in diluvio aquarum multarum, ad eum non approximabunt.* Ubi diem extremi Judicij, non sinè mysterio, diluvium vocat *aquarum multarum*, ad distinctionem prioris diluvij, quod respectivè erat *aquarum paucarum*. In illo enim priore diluvio, aquæ iræ DEI non erant tantæ, ut omnis peccatoribus negaretur spes veniæ, quia: ut pulchre observat Origenes *in Gen.* adhuc columba invenit, pacis symbolum, virentem olivam *Gen. 8. v. 11.* In hoc autem secundo diluvio : *mentietur opus olive.* *Habac. 3. v. 17.* & nulla peccatoribus restabit spes veniæ, nec ullus accessus erit ampliùs ad thronum misericordiæ.



# MEDITATIO XLI.

## *De Inferno.*

Quid est Infernus?

- I. Est squalidissimus carcer, æternis ligans catenis: sinè spe acquirendæ libertatis.
- II. Est succensa fornax, æternis urens flammis: sinè spe futuræ remissionis.
- III. Est omnium tormentorum aggregatione horribilis carnificina, ubi omnis poenarum varietas invenitur: & nunquam de aliquo refrigerio auditur.

### Fructus.

*Cruciabitur igne & Sulphure in conspectu Angelorum Sanctorum, & ante conspectum Agni: & fumus tormentorum eorum ascendet in secula seculorum. Ap. 14. v. 10. & 11.*

Tres sequentes actus eliciam. 1. *Ti-*  
*moris*: ex consideratione Divinæ Justi-  
tiæ. 2. *Contritionis*: ex consideratione

L 2 pec-

peccatorum meorum. 3. *Humilis petitionis*: ex consideratione, æqualis cum Iustitia, infinitæ DEI Misericordiæ. *Pater noster. Ave Maria.*

### *Lectio Spiritualis.*

**Q**Vanta, & quàm horrenda sint inferorum supplicia, nulla lingua edicere, nec ullus potest intellectus percipere. De his enim loquens S. David Ps. 10. v. 7. ait: *Ignis & Sulphur, & Spiritus procellarum, pars calicis eorum.* Sed si hæc pars tantum sunt calicis damnatorum, quanta igitur erit tota pœna eorum, qui, non partem tantum, sed integrum iræ DEI calicem, bibent in sæcula sæculorū? Præsertim cùm ignis ille, qui non tota pœna, sed aliqua tantum pars dicitur pœnæ eorum, per se præcisè, acerbitatem excedat omnium Mundi tormentorū, & ignem nostrum in tantum videatur superare, ut hunc, respectu illius, *frigidum* possimus appellare. Idq̃ve triplici potissimum de causa.

I. Quia, ut passim ex sacris litteris colligitur:

ligitur: ignis infernalis, non, quemadmodum ordinarius ignis noster, *successivè & gradatim* operatur, sed *simultaneè* omnes internas & externas partes damnatorum inflamat; ità, ut *una eadèmq; attività*, pellem, carnem, ossa, medullam, & ipsam denique damnatorum penetret animam. Cùm, è contrà, ordinarius ignis noster, *gradatim, & successivè* agat in corpora, ità, ut primò quidem pellem, deinde carnem, tum ossa, ac tandem medullam aggrediatur, & ità singulas partes, *non nisi successivè*, depascatur.

II. Quia, corpora damnatorum ardore suo *non mortificat*, nec insensibilia reddit, sed eamdem semper facit sentire ardoris vivacitatem, & adustionis poenalitatem; juxta illud: *dabit enim ignem, & vermes in carnes eorum, ut urantur, & sentiant usque in sempiternum. Judith. 16. v. 21.* Cùm, è contrà, ordinarius ignis noster, corpus, quod perfectè adurit, *totum stupidum reddat*, ut non nisi in alia parte, nondum adusta, calo-

rem, aut frigus, imposterum sentiat.

III. Quia, ignis ille infernalis, *non agit virtute sua naturali*: sed veluti instrumentum obedientiale Omnipotentiae DEI; quæ activitatem ejus ultra naturalem elevat vigorem, & specialem ei tribuit ardorem: Insufflans eum spiritu oris sui, & armans *creaturam ad ultionem inimicorum*. Sapi: 5. v. 18.

## MEDITATIO XLII.

### *De infelici statu Damna- torum.*

Præcipua infelicitas statûs Damna-  
torum, consistit:

- I. In æterna amissione infiniti boni eorum.
- II. In acerbissimis doloribus æternæ punitionis eorum.
- III. In funestissimis operationibus, rabidæ desperationis eorum.

Fruc-

Fructus.

*Vermis eorum non morietur, & ignis eorum non exstinguetur. Isaia 66. v. 24.*

Hodie, captivis, qui (ultimò supplicio perimendi) in publicis carceribus vincti detinentur, sumptibus meis prandium parabo: &, ut me à carcere æterno præservet DEUS, instanter eum orabo. *Pater noster. Ave Maria.*

*Lectio spiritualis.*

*Q*uis mihi hoc tribuat, ut in inferno protegas me? inquit S. Job. c. 14. v. 13. optimè sciens: protectionem contra infernum, quæri debere in ipso inferno. Hoc est: eos, qui volunt vitare infernum, æternam illam combustionem: quam in figura Zizaniorum Matth. 13. peccatoribus minatur Christus, attenta meditatione perpendendo, juxta consilium Psalmi 54. v. 16. descendere debere in infernum viventes, nè, ut exponit S. Bernardus Orat. ad Fratres de monte, eo descendant morientes. Idque triplici potissimum de causa.



I. *Quia, talis meditatio, peccata nos facit vitare, nè hæc ad infernum nos queant deturbare, dicente Ecclesiæ: c. 7. v. 40. memorare novissima tua, & in æternum non peccabis. Quis enim audebit peccare, qui horrendam inferni fornacem, peccantes perpenderit expectare? cujus ardorem nimis accensa fornax illa Babylonica figurabat, quæ Danielis 3. v. 47. quadraginta novem cubitis flammæ suas effundebat, quinquagesimum autem cubitum, seu Jubilæum numerum remissionis, non attingebat.*

II. *Quia, talis meditatio, opera pœnitentiæ suadet exercere, nè eo deveniamus, ubi jam nemo utiliter poterit pœnitere. Juxta illud: ligatis manibus & pedibus ejus, mittite eum in tenebras exteriores: ibi erit fletus, & stridor dentium. Matth. 22. v. 13. Dammati enim, ligatas habent manus, & nihil boni jam possunt præstare, ligatos habent pedes, & nullo jam passu cœlo possunt appropinquare; quia, super eos venit nox quando nemo potest operari. Joan. 9. v. 4.*

III. *Quia*

III. *Quia, talis meditatio, Justitiam DEI docet timere, nè, se non timentes, hæc puniat severè.*

## MEDITATIO XLIII.

*De numero damnandorum.*

I. Facile est damnari: *quia lata porta, & spatiosa via est, quæ ducit ad perditionem, & multi sunt, qui intrant per eam. Matth. 7. v. 13.*

II. Difficile est salvari: *quia angusta porta, & arcta via est, quæ ducit ad vitam: & pauci sunt, qui inveniunt eam. Matth. 7. v. 14.*

III. A Mundi exordio usque ad hæc tempora plurimos perijisse scimus, & plurimos perituros nõ dubitamus, electionem autem nostram, per bona opera, certam facere, non adlaboramus.

Fructus.

*Nescit homo, utrum amore an odio dignus sit, Eccles. 9. v. 1.*

*Quapropter fratres magis satagite, ut per bona opera certam vestram vocationem & electionem faciatis. 2. Petr. I. v. 10.*

In conventu, & conversatione parium meorum, ut apud argumentosa, Christo deservire, & pro posse meo, peccata v. g. detractionis, turpiloquij, dissensionis &c. si quæ obstrepere advertero, discretè, & prudenter, impedire studebo. *Pater noster. Ave Maria.*

### *Lectio Spiritualis.*

**P**Lurimos damnari, paucos salvari, Christi nos docent termini clari, discentis: *multi enim sunt vocati, pauci vero electi. Matth. 20. v. 16.* & S. Paulus idipsum satis declarat *1. Cor. 9. v. 24.* inquit: *Qui in stadio currunt, omnes quidem currunt, sed unus accipit bravium.* Ubi, interprete S. Thoma, per *stadium*, denotatur Mundus, seu tota universitas viatorum; per *cursum*, multitudo ad fidem vocatorum; per *unum* autem *comprehensorem*, paucitas electorum. Quod ut plenius intelligatur, tria notari debent.

I. Superiorem doctrinam non procedere genericè, *de omnibus in Mundo existentibus hominibus*. Quia, cum S. fides Catholica ( utpote *sola fides vera*, sine qua, *impossibile est placere DEO*, ad Heb. 11. v. 6. ) ad salutem sit necessaria; hanc autem, *major hominum pars*, aut ignoret, aut non sequatur: aliunde certum est, *ex omnibus in Mundo existentibus hominibus*, plures damnari quàm salvari.

II. Non procedere, *de omnibus simul sumptis Ecclesiæ Catholicæ filiis*. Quia, cum ad hunc numerum, non solum fideles adulti, sed &, rationis usum nondum assecuti, pertineant omnes ritè Baptizati; horum autem ( ut experientia docet ) plures, priusquàm rationis usum adipiscantur, in statu innocentiae moriuntur: certum est ( his accedente insuper numero adultorum, in gratia DEI morientium ) multò plures salvari, quàm damnari.

III. Hanc doctrinam procedere: *de solis Catholicis adultis*, è quibus, teste S. Basilio,

*Basilio, Chrysostomo, Gregorio, Augustino, Hieronymo &c.* plures damnantur, quàm salvantur. Idque triplici potissimum de causa.

I. Quia, tametsi omnes isti, in *Credo* sint *fideles*, pauci tamen ex ipsis, in *decalogo* sunt *fideles*; Catholicè quidem *credentes*: sed Ethnicè *viventes*.

II. Quia, tametsi omnis isti, credant in *Christum*: pauci tamen ex ipsis, credunt *Christo*, dicenti: divitias, instar *Spinarum*, animam fauciare. *Lucæ 8. v. 14.* Honores, coram DEO, humiliare. *Matth. 23. 12.* voluptates, ad infernum deturbare, *Lucæ 16. v. 22.*

III. Quia, tametsi omnes isti, dicant *se velle salvari*: pauci tamen ex ipsis, *volunt conari*.

## MEDITATIO XLIV.

### *De æterna damnatione.*

Quid est æternum damnari?

I. *Est, cælum, Deumque perdere: & quidem perdere irrecuperabiliter.*

II. *Est*



II. *Est, torqueri pœnis maximis : & torqueri incessanter.*

III. *Est, desperationis immergi barathro : & immergi ineluctabiliter. O æterna calamitas ! cujus finis nullus.*

Fructus.

*Quis poterit habitare de vobis cum igne devorante ? quis habitabit ex vobis cum ardoribus sempiternis ? Isaie 33. v. 14.*

Semel, aut iterum, acu manum tangens, ità carnem meam alloqvar : ô delicata nimium caro mea ! quomodo habitare poteris, per omnem æternitatem, *cum igne devorante ?* quæ levissimam unius acus puncturam ; vix ferre potes ? Miserere quæso, tui ipsius, ah miserere ! quæ, non solum æternitatem pœnarum infernalium vitare potes, sed & , nunquam delitura cœli gaudia, exiguo mercari labore, modò serio velis. *Ecce ! nunc tempus acceptabile, ecce ! nunc dies salutis, 2. ad Cor. 6. v. 2. Pater noster. Ave Maria,*

*Lectio*

*Lectio spiritualis.*

**C**ongregabo super eos mala, & sagittas meas complebo in eis: inquit de æternis reproborum pœnis ipse DEUS, *Deut.* 32. v. 23. quasi hæc tam enormes sint: ut pro completis haberi queant, quibus vix aliquid ultra superaddi possit. Et sanè: Torquentur enim infelices damnati *in tota anima*: seu in omnibus animæ potentijs, & *in toto corpore*: seu in omnibus corporis sensibus. Ut de singulis eorum meritò dici possit illud: *Isaia* 1. v. 6. à planta pedis usque ad verticem, non est in eo sanitas. hoc est: non modò inferior, sed & superior, totus, per totum, excrucietur homo. Et quidem;

I. *Intellectus* eorum dirè affligitur, continua apprehensione summi boni, *irrecuperabiliter à se amissi*. Quæ apprehensio, inperceptibilem eis adfert mœrorem, & tristitiam inexplicabilem, juxta illud *Psal.* 3. v. 10. *Peccator videbit, DEUM se amisisse, & irascetur, DEO, & sibi ipsi, dentibus suis fremet, totus rabidus,*

bidus, & *tabescet*, præ mœrore. *Voluntas* torquetur, intensissimo odio *DEI*, cui nocere non possunt; & odio sui, cui satisfacere non possunt. *Memoria* angitur, *continua recordatione plurimorum præhabitorum mediorum*, per quæ, *facillimè*, damnationem suam vitare potuissent.

II. *Visus* affligitur, aspectu horrendarum larvarum infernalium: *personæ tristes illis apparentes pavorem illis præstabit.* *Sapient. 17. v. 4. Auditus* incommodatur, dissono fletu & ululatu, ac stridore dentium: *ibierit fletus, & Stridor dentium. Matth. 8. v. 12. Gustus* torquetur, fele draconum infernalium: *fel draconum vinum eorum, & venenum aspidum insanabile. Deut. 32. v. 33. Odoratus* excrucietur, foetore intolerabili: *de cadaveribus eorum ascendet foetor. Isaie 34. v. 3. Tactus* excarnificatur, omni genere tormentorum: *Ignis & Sulphur, & Spiritus procellarum, pars calicis eorum. Ps. 10. v. 7.*

III. Hæc omnia patientur damnati,  
per

per totam æternitatem , & *fumus tormentorum eorum ascendet in sæcula sæculorum. Apoc. 14. v. 11.* quia , quidquid apud inferos est , æternum est : quemadmodum & ipsi æterni sunt.

## MEDITATIO XLV.

### *Confessio Christianæ Animæ Damnatæ.*

I. DEUS, ut me salvaret, tanta fecit! tantis me prævenit beneficijs, naturæ, & gratiæ: per quæ meum erga se provocaret amorem. Tantis illustravit luminibus, stimulavit exemplis, confortavit Sacramentis, sollicitavit promissis, terruit minis: tam longanimiter patientia præstolabatur ad veniam.

II. Facile salvari poteram , modò huic & illi Sanctæ inspirationi non resistissem, hanc & illam peccandi occasionem vitâissem, in hoc & illo Sancto  
pro.

proposito constans fuiſſem. Unica  
heroica reſolutio, unica generoſa re-  
pudiatio, unica ſyncera peccatorum  
confeſſio cœlū mihi referare poterat.

III. Ego verò, neglectis his omnibus,  
genio meo ſatisfacere volens, in hoc  
baratrum æternæ infelicitatis me lu-  
bens demerſi.

Fruſtus.

*Tempus non erit ampliùs. Apoc. 10. v. 6.*

Nihil eis tunc proderit æterna lamen-  
tatio, quos nunc non frænât recta ratio.

*Pater noſter. Ave Maria.*

### *Lectio ſpiritualis.*

Quia, juxta effatū Eccleſiaſtæ, c. 4. v. 12.  
*funiculus triplex difficilè rumpitur.*  
Ut nos ad ſe tantò fortiùs traheret DE-  
US, tres adhibuit ſolidiſſimos funes, ſci-  
licet: *Amorem, pudorem, timorem.* Ec-  
quidem:

I. *Adhibuit Amorem.* Innumeris be-  
neficijs nos præveniando, &, non mo-  
dò ſua omnia, ſed & *corpus, & animam*  
*ſuam* nobis donando, ſeu pro nobis dan-

M

do;



do. *Animam meam pono pro ovibus meis.*  
*Joann. 10. v. 15.* Quàm fortis autem sit  
 funis iste benefici amoris, facilè intelli-  
 git: quisquis honestū animum in pec-  
 tore gerit. Certè cum DEUS vice  
 quādam interrogāssēt Diabolum, quid  
 sibi videretur de Sancto Job? hic incunc-  
 tanter respondit: *nunquid Job frustra*  
*timet DEUM? nōne tu vallāsti eum?* Job  
*1. v. 9. & 10.* quasi dicere vellet: quid  
 mirum, quòd Job DEO adhæreat, quem  
 DEUS protectione sua vallavit, & for-  
 tissimo beneficiorum nexu, sibi intimè  
 copulavit. Certè ipsis bestiis, & brutis  
 animantibus pejor esset, si post hæc om-  
 nia DEO adhuc non serviret; præser-  
 tim, cū etiam canis, ob datam sibi par-  
 tem ficci panis, Domino suo adhæreat,  
 & eidem fideliter serviat.

II. *Adhibuit Pudorem.* Innumera  
 Sanctorum exempla nobis proponen-  
 do, & per hæc: *quæ multi eorum in ætate*  
*adhuc puerili, aut sexu fragiliori, fortiter*  
*gesserunt,* pudore nos suffundendo: si ea  
 præstare non conemur, *quæ tēnerrimæ,*  
 promptò

promptô animô, præstiterunt Virgines,  
& debilissimi potuerunt impuberes.

III. *Adhibuit Timorem.* Maximis minis nos terrendo, & palàm nobis declarando: *quartum funem omnes illos expectare*, qui tribus prioribus se non permiserint ligare: ut eo æternum ligati, sinè fine crucientur damnati: *ligatis manibus & pedibus ejus, mittite eum in tenebras exteriores: ibi erit fletus, & stridor dentium.* Matt. 22. v. 13.

## MEDITATIO XLVI.

### *De Cœlo.*

- I. *O Israel, quàm magna est Domus DEI, & ingens locus possessionis ejus! Bar. 3. v. 24.*
- II. *Quàm splendida! Ipsa Civitas, aurum mundum simile vitro mundo. Apoc. 21. v. 18.*
- II. *Quàm beata! Non eget sole, neque luna, Apoc. 21. v. 23. In eo habens omnia, in quo sunt bona omnia.*

## Fructus.

*Domine quis habitabit in tabernaculo tuo?  
aut quis requiescet in monte Sancto tuo ?*

*Pf. 14. v. 1.*

Elevatis in cœlum oculis, ita me ipsū  
alloquar : O ! pulchra domus ; in qua  
æternū habitare possum modò seriò  
velim.

*Lectio Spiritualis.*

*Q*uod in cœlo præparavit DEUS dili-  
gentibus se, inquit S. Augustinus,  
*Fide non capitur, Spe non attingitur, Cha-  
ritate non comprehenditur, acquiri potest,  
æstimari non potest. Idque triplici potis-  
simū de causa.*

I. Quia, ut ait S. Paulus *1. ad Cor. 2. v. 9.*  
*Oculus non vidit, tam miram rerum va-  
rietatem, quæ in uno DEO omne bonū  
complectens, simul excludit fastidiosam  
saturitatem, & nunquam inducit fame-  
licam anxietatem. Ubi, juxta illud: Matt.  
18. v. 10. Angeli in cœlis semper vident fa-  
ciem Patris mei, qui in cœlis est. & simul  
faciem DEI, quali nondum à se visam,  
semper*

*semper videre desiderant, juxta illud: 1 Pet. 1. v. 12. In quem desiderant Angeli prospicere. Desiderant autem sine labore, inquit S. Gregorius, l. 18. moral. c. 28. quia desiderium satietas comitatur, & satiantur sine fastidio, quia ipsa satietas ex desiderio semper accenditur.*

II. Quia, *nec auris audivit*, de tam mira dulcedinis suavitate. Quæ, teste S. Augustino, tanta pollet activitate, ut, si vel unica illius gutta in infernum decideret, infinitam damnatorum amaritudinem dulcem redderet. Unde & damnatus Epulo, non plus, quam unicam, hujus supernæ consolationis guttulam, ab Abrahamo, per manum Lazari, sibi transmitti petebat, inquit : *Pater Abraham, miserere mei, & mitte Lazarum, ut intingat extremum digiti sui in aquam, ut refrigeret linguam meam. Lucae 16. v. 24.* quia, hanc solam, extinguendis ardoribus suis, sufficere posse sciebat.

III. Quia, *nec in cor hominis ascendit*, tanta gaudij plenitudo, quæ omnem cogitatum humanum transcendens, cor

nostrum sola poterit fatiare, cujus desideria sola poterit adæquare.

## MEDITATIO XLVII.

### *De consecutione Cæli.*

- I. Ut cælum consequar : *parùm* petit à me DEUS; id unum scilicet : ut adimpleam legem ejus. Legem *facillimam*, Legem *justissimam*, Legem *sua-  
vissimam*.
- II. Hoc *parùm*, majori ex parte efficit ipse : tantis *gratijs*, quibus prævenior; tantis *Sacramentis*, quibus confortor; tantis *exemplis*, quibus allicior.
- III. Hoc *parùm*, plurimùm remuneratur DEUS: *Paucas tribulationes*, æternis gaudiis; *Paucos labores*, requie perpetuâ; *Paucos dolores*, perenni gloriâ.

#### Fructus.

*Si autem vis ad vitam ingredi, serva mandata. Matth. 19. v. 17.*

Has N. N. malas consuetudines serio deponam. *Pater noster. Ave Maria.*

*Lectio*



*Lectio spiritualis.*

**D**EUS minùs à nobis petit, quò cœ-  
lum consequamur, quam Diabo-  
lus, quò infernum mereamur. DEUS  
enim :

I. *Syncerè adjuvat nos* : plus ipse fa-  
ciendo, quàm nobis imponendo ; juxta  
illud: *Isaia 26. v. 12. Domine ---- omnia*  
*enim opera nostra operatus es nobis.* Quia,  
tamen si bona opera nostra, hoc ipso  
quod à nobis, seu cooperante libero arbi-  
trio nostro, fiant : *aliquatenus nostra sint* :  
inquantum tamen, *DEO auctore* ( finè  
quo nihil facere possumus. *Joan. 15. v. 5.* )  
non modò concipiuntur, sed & perfici-  
untur : *DEI potiùs, quàm nostra esse dig-*  
*noscentur.* Ipse enim excitat nos, *ut veli-*  
*mus,* & insuper facit, *ut possimus.* Dum  
è contra Diabolus, multo graviore far-  
cinâ suos onerat, & nullò digitò illos  
sublevat.

II. *Paucis contentatur,* omnisque ob-  
sequij sibi præstiti, diligentissimè recor-  
datur : & nec calicem aquæ frigidaë, *sui*

*amore datum, finit esse irremuneratum. Juxta illud: Matth. 10. v. 42. Quicumque potum dederit uni ex minimis istis calicem aquæ frigidae tantum in nomine Discipuli: amen dico vobis, non perdet mercedem suam. Dum è contrà Diabolus, ingentem exigit conatum, ut per viam divitiarum, honorum, & voluptatum, ad infernum abire sinat hominem, his dementatum.*

III. *Si bonum opus, à nobis veraciter intentum, absque culpa nostra, perficere non valemus: bonam voluntatem nostram, pro ipso opere reputari ab illo videmus. Juxta illud: Gen. 22. v. 16. Quia fecisti hanc rem, & non pepercisti filio tuo unigenito propter me. Ubi Abrahamus à DEO laudatur, quasi filium suum eidem sacrificasset: qui tamen eum, revera, non sacrificavit, sed tantum sacrificare paravit. Et illud: Matth. 25. v. 35. & 36. Esurivi enim & dedistis mihi manducare: sitiivi, & dedistis mihi bibere: hospes eram & collegistis me: nudus, & cooperuistis me. &c. Juxta quem textum, Christus, in die extremi Judicij, etiam illos Electos, qui*  
*pau-*

*pauperrimi in hoc Mundo erant, &, quod alijs erogarent, non habebant: eleemosynarios fuisse declarabit; quia voluntatem illorum bonam, pro opere reputabit. Dum è contrà Mundus, & Diabolus, conatum hominis ridet, si opus intentum subsequi non videt.*

## MEDITATIO XLVIII.

### *De ingressu Cœli.*

*Ad primum Cœli ingressum.*

- I. Omnium vitæ hujus ærumnarum penitus oblitus, majoribus, quàm mihi imaginari possim, obruar delicijs, veris fruar solatijs, purissimis replebor voluptatibus.
- II. Socij gaudiorum, chori erunt Angelorum, Sanctorum agmina, Beatissima Mater, Christus ipse.
- III. Nec de hoc tam felici statu excidendi, ullum me terrebit periculum, quò sinè ullis angustijs, tota frui licebit æternitate.

Fructus.

*Momentaneum & leve tribulationis nostræ, supramodum in sublimitate æternæ gloriæ pondus operatur in nobis.*  
*2. ad Cor. 4. v. 17.*

Omnia adversa, quæ Legem DEI servare volenti passim occurrunt, libenter tolerabo; nec oblocutionum, aut irrifusionum metu, à recto virtutis tramite ullatenus declinabo. *Pater nost. Ave M.*

*Lectio Spiritualis.*

**B**Eati Cœli incolæ, meritò illud: *Gen. 41. v. 51.* usurpare possunt, ac dicere: *oblivisci me fecit D E U S omnium laborum meorum. Non enim sunt condignæ passionēs hujus temporis ad futuram gloriam. Rom. 8. v. 18.* quin imò, sunt indignæ, quarum tunc recordentur, aut quæ ab ipsis condignum meritum tantæ gloriæ, æstimentur. Nos autem cœci mortales, hanc sublimem cœli gloriam ideo tam parùm curamus, quia cœlum à verbo *cælo* derivamus, & celatas cœli delicias, aut penitus ignoramus: aut  
 terrena

terrena terreni cogitantes, delicijs hujus Mundi similes putamus. Quæ tamen his assimilari nullatenus possunt, & triplici potissimum de causa, incomparabiliter eas excedunt.

I. Quia, *undequaque sunt perfectæ*. Nullam habentes doloris admixtionem, juxta illud: *Absterget DEUS omnem lachrymarum ab oculis eorum. Apoc. 21. v. 4.*

II. Quia, *'undequaque sunt maximæ*. Omnem explentes appetitum in homine, juxta illud: *satiabor cum apparuerit gloria tua. Psal. 16. v. 15.*

III. Quia, *undequaque sunt firmæ*. Ut pote superlunares, & supernaturales, mutationibus Lunæ, in nullo vectigales. Cùm è contrà bona hujus Mundi:

I. *Sint bona malis sociata*, juxta illud: *4. Reg. . . v. 1. Erat autem vir fortis & dives, sed leprosus. & illud: Prov. 14. v. 13. risus dolore miscebitur, & extrema gaudij luctus occupat.*

II. *Sint bona non nisi somniata*, juxta illud: *Ps. 75. v. 6. Dormierunt somnum suum:*



*um : & nihil invenerunt omnes viri divitiarum in manibus suis.*

III. *Sint bona procellis agitata. Quæ Gen. c. i. inter nutantes, & instabiles aquas à DEO creata, quasi fluctuans navicula, contrariis ventis semper fuere oppugnata.*

## MEDITATIO XLIX.

### *De bello Christianorum.*

Rex noster Christus, contra *Mundum, carnem, & Diabolum*, aciem instructurus: victoriam, & copiosa bellaturis promittens spolia, sua nos in castra vocat.

- I. *Honestum est ire, & vocanti obedire*: quia indecens est, ipso pugnante Duce, militem stare nolle in acie.
- II. *Utile est ire, & vocanti obedire*: quia strenuè pugnantes, possidebunt lætantes, cælum pro spolio.
- III. *Necesse est ire, & vocanti obedire*: quia si non pugnabimus, Christo non conregnabimus, exclusi à gloria.

Fructus.

## Fructus.

*Non coronatur, nisi legitimè certaverit. 2.*

*Tim. 2. v. 5.*

DEI adjutorium implorabo : contra  
Mundum, carnem, & Diabolum, in his  
N.N. magis strenuè pugnabo. *Pater no-  
ster. Ave Maria.*

*Lectio Spiritualis.*

**M**ultitia est vita hominis super terram;  
inquit S. Job. c. 7. v. 1. in qua mul-  
ti superantur, pauci coronantur. Idque  
triplici potissimùm de causa.

I. Quia, multi tam segniter pro D E O  
pugnant, ut hostem Diabolum suū pugnā  
non offendant. Hi autem non modò  
valde displicent D E O, dicenti: qui non  
est mecum, id est: qui toto corde non ad-  
hæret mihi, contra me est. Luca. 11. v. 23.  
sed etiam, ordinariè reprobantur ab eo;  
juxta illud Apoc. 3. v. 16. Quia tepidus es,  
& nec frigidus, nec calidus, incipiam te  
evomere ex ore meo. Ubi per vomitum  
æterna denotari videtur reprobatio, &  
non qualiscunque, sed perpetua, sinè spe  
recep.

*receptionis, signari abjectio. Qvod enim ab aliquo simpliciter tantum abjicitur, subindè ab eo iterum resumitur; quod autem vomitu ejicitur, à nemine, præterquam à porcis & canibus, denuo recipitur.*

II. *Quia, pauci sequuntur Christum, ducem, bajulando suam crucem, & viâ illâ incedendo, quam monstravit præcedendo, dicens: Si quis vult post me venire, abneget semetipsum, & tollat crucem suam quotidie, & sequatur me. Lucæ. 9. v. 23. Pauci enim nunc reperiuntur, qui ingenuum militem Uriam sequantur: & quemadmodum ipse, Ducem suum Joab, super faciem terræ pernoctare recordatus, in domo sua molliter cubare turpe futurum ratus, ajebat Davidi: Dominus meus Joab, & servi Domini mei, super faciem terræ manent: & ego ingrediar domum meam, ut comedam & bibam, & dormiam cum Uxore mea? per salutem tuam, & per salutem animæ tuæ, non faciam rem hanc. 2. Reg. II. v. II. Ipsi quoque, sub Christi fronte spinis coronata, membra nolint esse delicata.*

III. *Quia, tametsi multi bene videantur inchoare, pauci in bono conantur perseverare. Cùm tamen scriptum sit: qui autem perseveraverit usque in finem, hic salvus erit. Matth. 10. v. 22.*

## MEDITATIO L.

### *Vita CHRISTI, Passio continua.*

Christus, non priùs vivere, quàm pati, finiit, qui non priùs esse, quàm pati, cœpit.

- I. Præter communem mortalium sortem, ab ipso Incarnationis instanti, plenô rationis usu præditus, & virili prudentiâ iam ex tunc potitus: *Vir oriens. Zach. 6. v. 12.* novem Mensibus finè motu, finè luce, in Virginalis uteri clausus carcere, molestissimam pro nobis pertulit captivitatem.
- II. Cùmque natus esset, temporis ac loci afflictus injurijs, rigidissimæ hyemis nocte media, male tectô corpusculô, reclinatur in fœno.

III. Re-

III. Residuo dein vitæ decursu, his duriora passus: infami tandem necatus supplicio, spirare desiit in crucis patibulo, *Vir dolorum. Isaia. 53. v. 3.*

### Fructus.

*Facito secundum exemplar, quod tibi ostensum est in monte. Hebr. 8. v. 5.*

Hac determinata commoditate N. quâ, utpote licita & honesta, die hodierna frui possem, me sponte privabo: & quidquid deinceps, præsertim autem hac die, adversi mihi acciderit, speciali affectu, amantissimo meo offeram Redemptori, qui mei amore tanta tulit. *Pater noster. Ave Maria.*

### Lectio Spiritualis.

**B**Ene quidem S. Evangelista Lucas c. 9. v. 31. passionem Christi appellavit excessum, dicens: Erant autem Moyses & Elias, visi in Majestate: & dicebant excessum ejus, quem completurus erat in Jerusalem. Hæc enim:

I. *Excessit in duratione.* Quia prius fuit



fuit inchoata, quàm Christi fuerit humanitas nata: & quasi ultra ipsam Christi vitam protrahebatur nondum finita, cum jam Christus cessisset è vita. Juxta illud *Joan. 19. v. 33. & 34. Ut viderunt eum jam mortuum -- unus militum lanceâ latus ejus aperuit.*

II. *Excessit in mensura.* Quia, infinitum Christi amorem habuit pro mensura.

III. *Excessit in modo.* Quia, in omnibus facta absque modo.

Meliùs tamen *ipsi amori*, quô Christus dilexit nos, *nomen aptatur excessûs*: vi cujus nempe, hunc ipsum passionis excessum, inaudito plane excessû:

I. *Ardentissimè desiderabat*, dicens *Judæ: Quod facis, fac citius. Joan. 13. v. 27.*

II. *Adaugeri cupiebat*, inquires: *sitio.* *Joan. 19. v. 28.* non potum appetendo, sed majora tormenta ambiendo.

III. *Prolongari satagebat*, exclamans: *DEUS meus, DEUS meus, ut quid dereliquisti me? Matth. 27. v. 46.* Cum enim natura Divina, Sacro-Sanctâ ejus

N

Huma-

Humanitatem, ad illam usque horam extraordinariè confortaret, & inter acerbissimos illos dolores, vitam illius miraculosè prolongaret; ex tunc autem, ulteriorem virtutem ei subtrahens, mori eum jam permetteret; ipse, *plura adhuc pro nobis pati desiderans*, hanc amore refertam querimoniam Patri proposuit, dicens: *DEUS meus, DEUS meus, ut quid dereliquisti me?* Quasi diceret: cur ô Pater æterne, vitam meam, quam hucusque miraculosè prolongâsti, ulteriùs protrahere non vis, & pro hominum amore diutiùs me pati non finis? dum, *quod sufficit redemptioni*, ut ait S. Chrysost: Serm. 128. *nondum sufficit amori.*

## MEDITATIO LI.

### *De Patientia in adversis.*

In adversitatibus meis, recogitabo:

- I. *Peccata mea:* quibus majora merui.
- II. *Laboriosissimam vitam: dolorosissimam Passionem: crudelissimam interfectionem*

*nem innocentissimi JESU; mei amore æquanimiter ab eo supportatam.*

III. *Gaudia Cœli: quæ præparavit DEUS diligentibus se, & patientibus propter se. Fructus.*

*Si quis vult post me venire, -- tollat crucem suam. Lucæ. 9. v. 23.*

*Patientiam à DEO postulabo. Pater noster. Ave Maria.*

### *Lectio spiritualis.*

**N**ihil magis, in hac mortali vita, sanctis omnibus comune fuit, quam: pati persecutiones, tolerare probra, sustinere adversa. Hæc enim fors, omnium, tam novi quam veteris testamenti, fuit Justorum: & hæc communi viâ in cœlum ascendit universitas Electorum. Ut proinde non immerito, quemadmodum in capite omnium prædestinatorum, Christo Domino, *patientiam in adversis*, præ omnibus alijs signis & prodigijs, *evidentissimam Divinitatis ejus probationem exstitisse*: & hanc, in complementum omnium signorum,

quasi ultimum, & maximum miraculum omnium miraculorum, perfidis Judæis in monte Calvariæ clariùs adhuc demonstrandam, ab ipso, *Matth.* 12. v. 39. promissam fuisse, non ignoramus; ità, *hanc ipsam in adversis patientiam*, præ omnibus prædestinationis nostræ, seu adoptivæ filiationis indicijs, conjecturis, & signis, *magis evidens illius indicium*, meritò æstimare debeamus. Idque triplici potissimum de causa.

I. Quia: *Hæc conditio est, sinè qua non.* Dicente S. Paulo: *si tamen compatimur, ut & conglorificemur. ad Rom. 8. v. 17.*

II. Quia: *Patientia in adversis, gratiæ DEI nos reddit securos.* In cujus rei figuram, Jonathas indicaturus Davidi, utrùm in gratia Regis Saulis esset, necne? hoc ei signum dedit: *Sedebis juxta lapidem, cui nomen est Ezel. Et ego tres sagittas mittam juxta eum, & jiciam quasi exercens me ad signum. Mittam quoque & puerum dicens ei: vade & asser mihi sagittas; si dixero puero: ecce! sagittæ intrate sunt, tolle eas; tu veni ad me, quia*  

pax

*pax tibi est, & nihil est mali, vivit Dominus. Si autem sic locutus fuero puero: ecce! sagittæ ultra te sunt: vade in pace, quia dimisit te Dominus. 1. Reg. 20. Sagittæ enim DEI intrâ nos sunt, & per consequens, gratiæ ejus securos nos reddunt: quando immissæ à DEO tribulationes, lubenti animo à nobis suscipiuntur, & patienter supportantur; quando autem nulla adversa nobis à DEO immittuntur, aut hæc per impatientiam à nobis rejiciuntur: tunc enim verò sagittæ Divinæ ultra nos esse dignoscuntur, & nos, quasi filios illegitimos, à DEO non amari, quodammodo ipsæ loquuntur. Juxta illud: Quod si extra disciplinam estis, cujus participes facti sunt omnes: ego adulteri, & non filij estis. ad Hebr. 12. v. 8.*

III. Quia: ut ait Eliu Jobi cap. 37. v. 22. *Ab Aquilone aurum venit. Hoc est: à rigore adversitatis, spirituales proveniunt Divitiæ, & thesauri meritorum, quibus homo Christianus ditatur, & Cælum sibi mercatur. Quod bene sci-*



ens dilecta sponsa *Can: 4. v. 16. ajebat:*  
*surge Aquilo, & veni Auster, perfla hor-*  
*tum meum, & fluant aromata illius. Quæ*  
*alioquin non fluerent, nec odorem*  
*exererent, nî contrarij venti hortum*  
*invaderent.*

## MEDITATIO LII.

### *De vera consolatione.*

Vera consolatio:

- I. *In Mundo non datur:* Nisi de cœlo in Mundum mittatur.
- II. *In Mundum missa, in Mundo non moratur:* nisi cor à Mundo segregatum ab ea inveniat.
- III. *In solo DEO reperitur:* Qui servis suis eam largitur.

Fructus.

*In Domino gaudebo: & exultabo in DEO*  
*JESU meo. Habac. 3. v. 18.*

Solatia mundana non quærens, ipsi  
 toto corde adhærens. *Pater noster. Ave*  
*Maria.*

*Lectio*

*Lectio Spiritualis.*

**P**Lerique homines, consolationem & quietem animi in hoc Mundo quærunt, eamque in divitijs, honoribus, & voluptatibus se invenire posse credunt. Sed falluntur. Hæc enim *in solo D E O hospitatur*, & ab ipso solo hominibus datur, qui unicum centrum veræ quietis existens, *solus Paraclitus*, seu *Consolator*, jure appellatur. Unde experienciâ tandem discunt, verum esse, quod eosdem subfannans dixit S. Augustinus : *Non est requies ubi quæritis eam. Quærite quod quæritis; sed ibi non est ubi quæritis. Beatam vitam quæritis in regione mortis; non est illic; quomodo enim beata vita, ubi nec vita?* Idq; triplici potissimum de causa.

I. Quia, *objectum voluntatis nostræ, juxta S. Thomam, est omne bonum. Bona autem hujus Mundi, utpote in se ipsis limitata, non habent rationem omnis boni, & consequenter desideria voluntatis nostræ explere, & animum*

nostrum verâ consolatione replere, nullatenus possunt; sed respectu capacitatis dictæ voluntatis, sunt veluti pauculæ guttulæ aquæ, respectu maximi incendij: quæ eidem injectæ, illud non exstingvunt, sed magis potius accendunt: dum cor nostrum, extra centrum veræ quietis vagari facientes, sinè requie, compellunt in gyrum, juxta illud *Pf. 105. v. 14. Concupierunt, filij Israel, concupiscentiam in deserto. Quâ adeptâ, utique non contentabantur; quia: non quietem, sed concupiscentiam adipiscebantur, & per hanc, novis concupiscentiæ fluctibus, denuo involvebantur.*

II. Quia, omne bonum creatum, *bonum non est: nisi in DEUM relatum.* Si ergo in illo sistamus, & in DEUM illud non referamus, quod bonum non est, *bonum falso putamus, eoque satiari frustra anhelamus.*

III. Quia, *bona hujus Mundi subjecit DEUS pedibus nostris: omnia subjecisti sub pedibus ejus. Pf. 8. v. 8. ut ea spernendo*

do pedibus premamus, si succum veræ  
consolationis acquirere desideramus.

## MEDITATIO LIII.

*De conformatione nostræ  
voluntatis cum Divina.*

Divinæ voluntati conformatus:

- I. DEO est acceptissimus. Quia eidem  
obsequentissimus.
- II. In hac vita beatissimus. Quia in om-  
nibus contentissimus.
- III. De cœli gloria securissimus. Quia  
fini suo conjunctissimus.

Fructus.

*Dicite Justo, quoniam bene. Isaia 3. v. 10.*

Divinæ voluntati etiam in his N. N.  
me conformabo. *Pater noster. Ave M.*

### *Lectio Spiritualis.*

**D**Um in Gynæceo Regis Assveri ser-  
varetur Esther, rarô inter fœminas  
exemplô, voluntatis propriæ, & genij  
sui prorsus oblita, ea tantum pro corpo-

Ns ris

ris adornatione adhibebat, quæ Egeus Eunuchus sponte eidem suppeditabat, seu aptiora fore judicabat, *Esther* 2. v. 12. Unde & factum legimus, eam præ omnibus dicti Gynæcei puellis, Regi Assvero placuisse, & nuptiali foedere eidem sociatam, universi Regni Dominam fuisse ab eo declaratam. *ibid.* v. 17. & 18. Per quod mysticè figurabatur: Christianam animam, in Gynæceo hujus Mundi commorantem, seu nuptias cœlestes præstolantem: DEO præ ceteris placituram, & amoris ejus amplexu æternum fruituram, si propriæ voluntatis oblita, ea quæ vult DEUS, approbando: & quia ipse *bene omnia fecit*, *Marc.* 7. v. 37. cordicitus æstimando: voluntati illius se studuerit conformare, & providentissimæ ordinationi voluerit resignare. Idque triplici potissimum de causa.

I. Quia, hoc modo, *cœlestem vitam vivet in terra*, voluntatem DEI adimplens: *sicut in Cœlo, & in terra.* *Math.* 6. v. 10.

II. Quia, ob id ipsum, *familia cœlesti sociari*



*sociari merebitur, Christi, dicentis: Qui-  
cumque enim fecerit voluntatem Patris  
mei, qui in cœlis est; ipse meus Frater, &  
Soror, & Mater est. Matth. 12. v. 50.*

III. Quia, digna censëbitur consortio An-  
gelorum, quæ, virtute suâ, æquanimi-  
tem naturalem adequabit eorum. Dum:  
quemadmodum in scala Jacob, Gen. 28,  
v. 12. eadem promptitudine descendebant,  
quâ ascendebant Angeli: ipsa etiam,  
Divinæ voluntati perfectè inhærendo,  
sive à DEO exaltetur, sive pro ejus glo-  
ria humilietur, in omnibus contenta re-  
perietur.

## MEDITATIO LIV.

*De amore DEI erga homi-  
nem.*

Infinitus DEI erga hominem amor:

I. Se ipsum prodidit in creatione.

II. Magis eluxit in Redemptione.

III. Plenius cognoscetur in beatifica cœli  
visione.

visione. Ubi tandem licebit intelligere, quanta DEUS fecerit pro homine.

### Fructus.

*Quid est quod debui ultrà facere vinee meae, & non feci ei? Isaiæ 5. v. 4.*

Beneficiorum DEI sedulò recordabor. *Pater noster. Ave Maria.*

### Lectio spiritualis.

**T**Ametsi infinitus DEI erga hominem amor, in se ipso incomprehensibilis sit; tamen, ut magnitudinem ejus, pro modulo nostro, aliquatenus saltem cognoscamus: sequentes circumstantias attentius perpendamus.

I. DEUM nos amâsse priusquàm essemus, qui: in Charitate perpetua dilexit nos. *Jerem. 31. v. 3.* Hoc est: ut explicat S. Bonav. ab æterno amavit nos. Seu: ut inquit S. Cyrillus I. Thes. c. I. nostri amorem, coæternum voluit esse comitem illius amoris, quô diligit se ipsum. *Non citius sui, quàm nostri existens amator.*

II. DEUM nos amâsse cùm jam essemus,

mus, *sed ab eo nos amari nondum scire-*  
*mus.*

III. DEUM nos amâsse cùm essemus,  
& ab eo nos amari quidem sciremus:  
*sed infinitum ejus amorem condignè æsti-*  
*mare, ex tunc in æternum, incapaces es-*  
*semus.*

Et hic amor eò usque excrevit :

I. Ut, Pater æternus: *Filium suum uni-*  
*genitum*, pro homine, daret. *Joan. 13.*  
*v. 16.*

II. Filius: mori pro eo non dubitaret.  
*Joan. 10. v. 15.*

III. Spiritus Sanctus: omnibus gratiæ  
thesauris eum dignum reputaret.

*Hic autem amor :*

I. Nullum DEO attulit, nec adferre  
potuit commodum.

II. Innumeris Filium ejus subjecit in-  
commodis.

III. Ingratis impensus est hominibus.

# MEDITATIO LV.

## *De diligendo DEO.*

- I. DEUS amari *debet* : quia, ut eum amemus districtè præcipit. *Dignus est*: quia, bonitas est infinita. *Meretur*: quia, prior dilexit nos.
- II. Ejus amorem petit, *creatio* : continua exigit, *conservatio*: jure deponit, pretiosa nostri *redemptio*.
- III. Hunc *nisi amemus* : æterna nos manent inferorum supplicia; *si amemus*: cœli expectant tripudia.

Fructus.

*Domine - - tu scis, quia amo te. Ioan. 21. v. 17.*

Et nè, tractu temporis, amor meus tepescat erga te: tui nunquam oblitus, persolutis præcibus meis matutinis (juxta propositum in quarta Meditatione jam ante à me conceptum, & hodie renovatum) ut minùs per quartam unius horæ partem, die quolibet, piè aliquid meditando, cor meum levabo ad te. *Pater noster. Ave Maria.*

*Lectio*

## Lectio spiritualis.

**N**ON finè mysterio *Leuitici* 6. v. 12. præcepit DEUS: ignem in altari suo perpetuo ali, nè unquam exstingveretur: *Ignis autem in altari semper ardebit.* Per id enim, *juxta expositionem S. Gregorij*, innuebatur: DEUM velle: *ut in altari cordis nostri ignis Divini amoris nunquam exstingvatur.* Idque triplici potissimùm de causa:

I. Quia, *perpetuum ei debemus amorem*, qui perpetuum & infinitum bonum, in se ipso, existens: nobis quoque, perpetuum & infinitum bonum fieri volens, perpetuô & infinitô amore, prior dilexit nos. 1 *Ioan.* 4. v. 19.

II. Quia, *sola Charitas nos ei perfectè copulat*, quæ sola in perpetuum conitans perseverat. *Charitas enim nunquam excidit, siue prophetie evacuabuntur, siue lingvæ cessabunt, &c.* 1. *ad Cor.* 13. v. 8. Cui etiam soli perpetua promittitur merces, dicente eodem Apostolo 1. *ad Cor.* 2. v. 9. *oculus non vidit, nec auris audivit, nec in*



*cor hominis ascendit, quæ preparavit DE-  
US ijs, qui diligunt illum.*

III. Quia, opera nostra, Charitate non  
impingvata, munera sunt Cain, DEO  
minus grata, utpote sinè adipse eidem ob-  
lata. Gen. 4. v. 3. Charitas enim adeps vir-  
tutum est, quæ actiones nostras, quan-  
tumvis in se ipsis alioquin macilentas,  
& valde exiguas, mirè dignificat; &  
quæ, teste S. Augustino, Sola sufficit, si  
adsit; dum omnia nihil prosunt. si sola ipsa  
desit. juxta illud: Si linguis hominum  
loquar, & Angelorum, Charitatem autem  
non habeam, factus sum velut æs sonans,  
aut cymbalum tinniens --- & si habuero  
omnem fidem, ità ut montes transferam,  
charitatem autem non habuero, nihil sum,  
--- & si tradidero corpus meum, ità ut  
ardeam, charitatem autem non habuero,  
nihil mihi prodest. 1. Cor. 13.

v. 1. 2. 3.



## Notandum.

Ut suprà positæ spirituales lectiones, *non solum doctioribus: sed etiam, litterarum ignaris, prodesse possint rudioribus; materias præbent Concionum, in Dominicas totius Anni. Quæ, à Zelosis verbi Divini Præconibus, facilè dilatarì; &, Fideli Populo, ordine sequente, poterunt prædicari.*

### Pro Dominica I. Adventus.

Valebit lectio Spiritualis XXXIX. Meditationis: *De signis Judicij Extremi.* Argumentum illius est: *Diem Extremi Judicij nos credere, & expectare: & tamen vitam nostram nequaquam emendare.* Thema, seu textus concioni præfigendus, sumi poterit ex Evangelio ejusdem Dominicæ: *Erunt signa in Sole, & Luna, & Stellis. Lucæ 21. v. 25.*

### Pro Dominica II. Adventus.

Lectio Spiritualis LI Meditationis: *De Patientia in adversis.* Argumentum, *Patientia in adversis, spes certa prædestinationis.* Thema, seu textus Evangelij: *Joannes autem cum esset in vinculis opera Christi. Matth. 11. v. 2.*

Pro Dominica III. Adventus.

Leſtio Spiritualis XXV. Meditationis: *De vitio ſuperbiæ. Argumentum. Non habemus cauſam ſuperbiendi. Thema, ſeu textus Evangelij: Tu quis eſt? Joan. 1. v. 19.*

Pro Dominica IV. Adventus.

Leſtio Spiritualis IV. Meditationis: *De negotio ſalutis. Argumentum. Negotijs forrenſibus periculoſè implicamur, nî priùs in Sancta ſolitudine a DEO inſtruamur. Thema, ſeu textus Evangelij: Factum eſt verbum Domini ſuper Joannem, Zachariæ filium, in deſerto. Luca 3. v. 2.*

Pro Dominica infra octavam Nativitatis Chriſti.

Leſtio Spiritualis X. Meditationis. *De bona prolium educatione. Argumentum. Bona prolium educatio, optatum plerumque ſortitur eſſeſtum. Thema, ſeu textus Evangelij: Puer autem creſcebat, & confortabatur, plenus ſapientiâ. Luca 2. v. 40.*

Pro Dominica poſt octavam Nativitatis Chriſti.

Leſtio Spiritualis XI. Meditationis: *De modo bonæ prolium educationis. Argumentum. Quales Parentes, tales ordinariò eorum filij. Thema,*



ma, seu textus Evangelij: *Audiens autem, quod Archelaus regnaret in Iudaea pro Herode Patre suo, timuit illò ire. Matth. 2. v. 22.*

Pro Dominica I. post Epiphan.

Lectio Spiritualis XVIII. Meditationis: *De SS. Missæ sacrificio. Argumentum. Missam audire, plurimum juvat. Thema, seu textus Evangelij: Invenerunt illum in templo. Luca 2. v. 46.*

Pro Dominica II. post Epiphaniam.

Lectio Spiritualis XXVII. Meditationis: *De vitio Gulae & Ebrietatis. Argumentum. Gula Mater vitiorum. Thema, seu textus Evangelij: Omnis homo primum bonum vinum potuit: & cum inebriati fuerint, tunc id, quod detervinsest. Joan. 2. v. 10.*

Pro Dominica III. post Epiphaniam.

Lectio Spiritualis XLI. Meditationis: *De Inferno: Argumentum. Pœna Inferni excedunt captum nostrum. Thema, seu textus Evangelij: ibi erit fletus, & stridor dentium. Matth. 8. v. 12.*

Pro Dominica IV. post Epiphaniam.

Lectio Spiritualis XLVIII. Meditationis: *De Ingressu Cœli. Argumentum. Bona Cœli, bonis Mundi equiparari non possunt. Thema, seu textus Evangelij: Et ecce motus magnus, factus*

*est in Mari , ita ut navicala operiretur fluctibus.*  
*Matth. 8. v. 24.*

Pro Dominica V. post Epiphaniam.

Leſtio Spiritualis XLII. Meditationis: *De infelici statu Damnatorum. Argumentum. Qui vult evitare Infernum , seriò meditetur Infernum. Thema, seu textus Evangelij: Colligite primum Zizania , & alligate ea in fasciculos ad comburendum. Matth. 13. v. 30.*

Pro Dominica VI. post Epiphaniam.

Leſtio Spiritualis XLVI. Meditationis: *De Cælo. Argumentum. Beatitudo Cæli, ineffabilis , & imperceptibilis est. Thema , seu textus Evangelij: Eructabo abscondita à constitutione Mundi, Matth. 13. v. 35.*

Pro Dominica in Septuagesima.

Leſtio Spiritualis XX. Meditationis: *De otio vitando. Argumentum. Otium vitare oportet. Thema, seu textus Evangelij: Quid hic statis tota die otiosi? Matth. 20. v. 6.*

Pro Dominica in Sexagesima.

Leſtio Spiritualis XXI. Meditationis: *De vitandis peccandi occasionibus. Argumentum. Occasiones peccandi necessariò vitandæ. Thema, seu textus Evangelij: Aliud cecidit secus viam, & conculcatum est, Luc. 8. v. 5.*



Pro Dominica in Quinquagesima.

Leſtio Spiritualis XXVIII. Meditationis:  
De vitio *Avaritia*. Argumentum. *Avaritia,*  
*ſummè excœcat hominem.* Thema, ſeu textus  
Evangelij: *Cæcus quidam ſedebat ſecus viam.*  
*Lucæ 18. v. 35.*

Pro Dominica I. Quadrageſimæ.

Leſtio Spiritualis I. Meditationis: De  
*creatione, & ſine creationis Univerſorum.* Argu-  
mentum. *DEO, tanquam ſupremo Domino, ſer-*  
*vire debet homo.* Thema, ſeu textus Evange-  
lij: *Dominum Deum tuum adorabis, & illi ſoli ſer-*  
*vies. Matth. 4 v. 10.*

Pro Dominica II. Quadrageſimæ.

Leſtio Spiritualis L. Meditationis: *Vita*  
*Chriſti, Paſſio continua.* Argumentum. *Exceſ-*  
*ſus paſſionis, exceſſus amoris.* Thema, ſeu tex-  
tus Evangelij: *Et ecce! apparuerunt illis Moyses*  
*& Elias cum eo loquentes. Matth. 17. v. 3.*

Pro Dominica III. Quadrageſimæ.

Leſtio Spiritualis XLIX. Meditationis:  
*De bello Chriſtianorum.* Argumentum. *Cur*  
*tam pauci victoriam reportent de Diabolo?* The-  
ma, ſeu textus Evangelij: *Qui non eſt mecum,*  
*contra me eſt. Lucæ 11. v. 23.*

## Pro Dominica IV. Quadragesimæ.

Lectio Spiritualis XII. Meditationis: *De fiducia in DEI providentia. Argumentum. Divina Providentia securè nos committimus. Thema, seu textus Evangelij: Unde ememus panes, ut manducent hi? hoc autem dicebat tentans eum: Ipse enim sciebat, quid esset factururus. Joan. 6. v. 5. & 6.*

## Pro Dominica Passionis.

Lectio Spiritualis XVII. Meditationis: *De Concionibus, & Spiritualibus exhortationibus, diligenter frequentandis. Argumentum. Sacre conciones diligenter frequentanda. Thema, seu textus Evangelij: Qui ex DEO est, verba DEI audit. Joan. 8. v. 47.*

## Pro Dominica Palmarum.

Lectio Spiritualis XXXIV. Meditationis: *De statu Moribundi. Argumentum. Facile bona Mundi, ipsūque Mundum, & omnem gloriam ejus contemnit, qui horum vanitatem attentè expendit. Thema, seu textus Evangelij: Hosanna Filio David: benedictus, qui venit in nomine Domini. Matth. 21. v. 9.*

## Pro Dominica Resurrectionis Domini.

Lectio Spiritualis XXXVII. Meditationis: *De universali resurrectione corporum. Argumentum.*



tum. *Non habet cur superbiat nobiliter natus: nec cur tristetur ignobilis procreatus.* Thema, seu textus Evangelij: *Surrexit. Marci. 16. v. 6.*

Pro Dominica I. post Pascha.

Lectio Spiritualis XIV. Meditationis: *De Sacerdotibus honorandis.* Argumentum. *Sacerdotes sunt honorandi.* Thema, seu textus Evangelij: *Quorum remisistis peccata, remittuntur eis: & quorum retinueritis, retenta sunt.* Joan. 20. v. 23.

Pro Dominica II. post Pascha.

Lectio Spiritualis XLV. Meditationis: *Confessio Christianæ anime damnata.* Argumentum. *DEUS, omnes tentavit modos, ut sibi uniret hominem.* Thema, seu textus Evangelij: *Et animam meam pono pro ovibus meis.* Joan. 10. v. 15.

Pro Dominica III. post Pascha.

Lectio Spiritualis XXXV. Meditationis: *De ultimo momento vitæ.* Argumentum. *Vivito bene, nè moriaris malè.* Thema, seu textus Evangelij: *Modicum, & jam non videbitis me.* Joan. 16. v. 16.

Pro Dominica IV. post Pascha.

Lectio Spiritualis XXII. Meditationis: *De peccato mortali.* Argumentum. *Per quodlibet*



*peccatum Mortale, in summo damnationis periculo constituimur. Thema, seu textus Evangelij: Arguet Mundum de peccato. Joan. 16. v. 8.*

Pro Dominica V. post Pascha.

*Lectio Spiritualis LIV. Meditationis: De amore DEI erga hominem. Argumentum. Summus DEI erga hominem amor. Thema, seu textus Evangelij: Ipse enim Pater amat vos. Joan. 16. v. 27.*

Pro Dominica VI. post Pascha.

*Lectio Spiritualis XVI. Meditationis: De alienis peccatis occultis non propalandis. Argumentum. Peccata aliena non sunt propalanda. Thema, seu textus Evangelij: Venit hora, ut omnis, qui interficit vos, arbitretur obsequium se prestare DEO. Joan. 16, v. 2.*

Pro Dominica Pentecostes.

*Lectio Spiritualis LII. Meditationis: De vera consolatione. Argumentum. Solus Deus, Paracletus, & consolator noster est. Thema, seu textus Evangelij: Paracletus autem Spiritus Sanctus. Joan. 14. v. 26.*

Pro Dominica Trinitatis.

*Lectio Spiritualis III. Meditationis: De dignitate hominis Christiani. Argumentum. Dignitatis nostrae utiliter recordamur. Thema, seu*

seu textus Evangelij: *Baptizantes eos in nomine Patris, & Filij, & Spiritus sancti. Matth. 28. v. 19.*

Pro Dominica II. post Pentecosten.

Lectio Spiritualis XXIX. Meditationis: *De vitio Luxuria. Argumentum. Amor Mulierum, plurimos perdit. Thema, seu textus Evangelij: Uxorem duxi, & ideo non possum venire. Luca 14. v. 20.*

Pro Dominica III. post Pentecosten.

Lectio Spiritualis XXXI. Meditationis: *De dilatione Pœnitentiæ. Argumentum. Periculosissimum est pœnitentiam differre in crastinum. Thema, seu textus Evangelij: Erant autem appropinquantés ei Publicani, & Peccatores. Luca 15. v. 1.*

Pro Dominica IV. post Pentecosten.

Lectio Spiritualis XXIV. Meditationis: *De pœnis peccati Mortalis. Argumentum. Omnium malorum fons & origo peccatum. Thema, seu Textus Evangelij: Per totam noctem laborantes, nihil cepimus. Luca 5. v. 5.*

Pro Dominica V. post Pentecosten.

Lectio Spiritualis XL. Meditationis: *Processus Iudicij Extremi. Argumentum. Rigor Divinæ Iustitiæ, in extrema patebit Iudicij die. Thema, seu textus Evangelij: Nisi abundaverit*





*Justitia vestra plus quam Scribarum, & Phariseo-  
rum, non intrabitis in Regnum Cælorum. Matth. 5.  
v. 20.*

Pro Dominica VI. post Pentecosten.

Lectio Spiritualis IX. Meditationis: *De  
juvandis animabus Purgatorij. Argumentum.  
Cur multi negligant juvare animas purgatorij?  
Thema, seu textus Evangelij: Misereor super  
urbam, Marci 8. v. 2.*

vel

Lectio Spiritualis XIX. Meditationis: *De  
frequenti, & devota, SS. Eucharistiæ sumptione.  
Argumentum. Sæpius Eucharistiam devotè su-  
mentes, suavitatem illius experiuntur. Thema,  
seu textus Evangelij: Et manducaverunt, &  
saturati sunt. Marci 8. v. 8.*

Pro Dominica VII. post Pentecosten.

Lectio Spiritualis VI. Meditationis: *De  
necessitate bonorum operum. Argumentum.  
Bona opera, necessaria sunt ad consequendam sa-  
lutem æternam. Thema, seu textus Evange-  
lij: Omnis arbor, quæ non facit fructum bonum ex-  
scindetur, & in ignem mittetur. Matth. 7. v. 19.*

Pro Dominica VIII. post Pentecosten.

Lectio Spiritualis XXXIII. Meditationis:  
*De nuntio Mortis. Argumentum. Peccator in  
articulo mortis constitutus, difficillimè convertitur  
ad*



*ad Deum. Thema, seu textus Evangelij: Redde rationem villicationis tuae, jam enim non poteris villicare. Luca 16. v. 2.*

Pro Dominica IX. post Pentecosten.

*Lectio Spiritualis XIII. Meditationis: De reverentia templis debita. Argumentum. Deus zelat honorem templorum suorum. Thema, seu textus Evangelij: Et ingressus in templum, cepit ejicere vendentes, in illo, & ementes. Luca 19. v. 45.*

Pro Dominica X. post Pentecosten.

*Lectio Spiritualis XXX. Meditationis: De vera Pœnitentia. Argumentum. Paucissimi veram de peccatis Pœnitentiam agunt. Thema, seu textus Evangelij: Deus propitius esto mihi Peccatori. Luca 18. v. 13.*

Pro Dominica XI. post Pentecosten.

*Lectio Spiritualis LIII. Meditationis: De conformatione nostræ voluntatis cum Divina. Argumentum. DEO præprimis grati, voluntati ejus conformati. Thema, seu textus Evangelij: Bene omnia fecit. Marci 7. v. 37.*

Pro Dominica XII. post Pentecosten.

*Lectio Spiritualis XLVII. Meditationis: De consecutione Cæli, Argumentum. Facile Cælum*

*Cælum consequi possumus. Thema, seu textus Evangelij: Magister, quid faciendo vitam eternam possidebo. Luca 10. v. 25.*

Pro Dominica XIII. post Pentecosten.

Lectionis Spiritualis XXVI. Meditationis: *De vitio Ingratitudinis. Argumentum. Cur plerique homines pro acceptis beneficijs Ingratos se exhibeant? Thema, seu textus Evangelij: Nonne decem mundati sunt: & novem ubi sunt? non est inventus qui rediret, & daret gloriam Deo, nisi hic Alienigena. Luca 17. v. 17. & 18.*

Pro Dominica XIV. post Pentecosten.

Lectionis Spiritualis V. Meditationis: *De ordine negotiorum. Argumentum. In alijs negotijs diligentes, in negotio salutis plerumque negligentes. Thema, seu textus Evangelij: Quare ergo primum Regnum Dei, & justitiam ejus: & hæc omnia adjicientur vobis. Matth. 6. v. 33.*

Pro Dominica XV. post Pentecosten.

Lectionis Spiritualis XXXII. Meditationis: *De Morte, & incertitudine illius. Argumentum. Mors omnibus incerta. Thema, seu textus Evangelij: Ecce! defunctus efferebatur filius unicus Matris sue, Luca 7. v. 12.*

Pro

Pro Dominica XVI. post Pentecosten.

Lectionis Spiritualis XV. Meditationis: *De*  
*Judicio temerario. Argumentum. Cur plerique*  
*ad temerè iudicandum proximum sint proclives?*  
Thema, seu textus Evangelij: *Et ipsi obser-*  
*vabant eum. Lucæ 14. v. 1.*

Pro Dominica XVII. post Pentecosten.

Lectionis Spiritualis LV. Meditationis: *De*  
*diligendo DEO. Argumentum. Bonum sinè*  
*sine, amandum sinè sine.* Thema, seu textus  
Evangelij: *Diliges Dominum DEUM tuum ex*  
*toto corde tuo. Matth. 22. v. 37.*

Pro Dominica XVIII. post Pentecosten.

Lectionis Spiritualis XXIII. Meditationis:  
*De temeritate peccantis. Argumentum. Deus*  
*nos videt peccantes.* Thema, seu textus Evan-  
gelij: *Et cum vidisset JESUS cogitationes eorum,*  
*dixit: ut quid cogitatis mala in cordibus vestris?*  
*Matth. 9. v. 4.*

Pro Dominica XIX. post Pentecosten.

Lectionis Spiritualis XLIII. Meditationis:  
*De numero damnandorum. Argumentum. Fi-*  
*delium adulterum plures damnantur, quàm sal-*  
*ventur.* Thema, seu textus Evangelij: *Multi*  
*enim sunt vocati, pauci verò electi, Matth. 22. v. 14.*  
vel.

vel.

Lectio Spiritualis XLIV. Meditationis: *De aeterna damnatione.* Argumentum. *Pœnis damnatorum vix aliquid ultra addi posse videtur.* Thema, seu textus Evangelij: *ubi erit fletus, & stridor dentium. Matth. 22. v. 13.*

Pro Dominica XX. post Pentecosten.

Lectio Spiritualis VII. Meditationis: *De peccato veniali deliberatè commisso.* Argumentum. *Non tantum peccata Mortalia, sed etiam peccata Venialia, pro posse, vitare oportet.* Thema, seu textus Evangelij: *Domine, descende priusquam moriatur filius meus. Joan. 4. v. 49.*

Pro Dominica XXI. post Pentecosten.

Lectio Spiritualis VIII. Meditationis: *De pœnis Purgatorij.* Argumentum. *Pœne Purgatorij sunt acerbissimæ.* Thema, seu textus Evangelij: *Tradidit eum tortoribus, quoadusque redderet universum debitum. Matth. 18. v. 34.*

Pro Dominica XXII. post Pentecosten.

Lectio Spiritualis II. Meditationis: *De pretio anime humane.* Argumentum. *Anima hominis, ad imaginem DEI condita, pretiosissimus thesaurus est, sed à paucis condignè æstimatur.* Thema, seu textus Evangelij: *Cujus est imago hac? Matth. 22. v. 20.*

Pro





Pro Dominica XXIII. post Pentecosten.

Lectio Spiritualis XXXVI. Meditationis:

*De statu corporis post Mortem. Argumentum. Seria consideratio luti, in quod resolvemur mortui, oculos aperit hominis vivi. Thema, seu textus Evangelij: Domine, filia mea modò defuncta est. Matth. 9. v. 18.*

Pro Dominica XXIV. & ultima  
post Pentecosten.

Lectio Spiritualis XXXVIII Meditationis:

*De separatione Reproborum ab Electis. Argumentum. Horrenda Reproborum ab Electis segregatio. Thema, seu textus Evangelij: Et mittet Angelos suos cum tuba, & voce magna: & congregabunt Electos eius à quatuor ventis.*

*Matth. 24. v. 31.*

O. A. M. D. G.



BIBLIOTHECA  
UNIV.  L. ELL.  
CRACOVENSIS

*[Faint handwritten text, possibly "K 73"]*

Laurentius Latorina p.  
Illuminatus Luminari Arcanif  
1772  
Latorina  
Latorina



Biblioteka Jagiellońska



stdr0023277

*An. loci ut prostrata figurata.*

